

中國邊疆史志集成

從蒙古史志

33

中國邊疆史志集成

內蒙古史志
59

全國圖書館文獻
縮微復制中心

兵旣多柴米一貴耕牧無所實於生計無益原議
設副都統一員添兵七百名之處似應暫行停止
臣查獨石口外北行三十餘里卽係平原曠野土
木肥腴再五十里爲紅城子垣墻猶在襟山帶河
平疇沃衍遠勝於獨石口內再百餘里爲開平城
卽元之上都也城廣十六里有奇龍岡秀發灤水
迴環實屬形勝之區計開平紅城之間可耕之田
不下數萬頃再張家口外北行七十餘里爲興和
城西行百餘里爲新平城川原甚廣一望無際土

脉之肥過於開平計興和新平之間可耕之田亦不下數萬頃查有明之初常遇春逐元兵於漠北建大寧開平興和三衛東通遼碣西控豐勝爲北邊外屏後漸棄而不守尙論者有餘惜焉今熱河八溝皆大寧之舊境現議添兵駐防其豐川東勝境內歸化綏遠諸城均有重兵彈壓惟開平興和境內田疇未墾弁兵未設東西聲援似覺間隔

臣

詳度形勢所宜約計田疇所出大約開平可駐滿兵三千紅城子可駐滿兵二千興和城可駐三千

新平城可駐二千若開墾田土修葺城垣而廣爲
駐防沃野千里控強萬騎左提右挈其於邊防大
有裨益再國家八旗禁旅生齒日繁我

皇上聖謀遠慮屢爲旗人籌畫生計今幸有此閒曠地畝
若令民人耕種擇其近城之地平方寬行者畫爲
公田其餘皆爲民田每墾民田二頃者必令墾公
田一頃民田以爲世業公田分給旗人得完租粟
再加之以月給錢糧衣食自益寬裕且山場可牧
平原可獵弓馬自益嫻習此實王道自然之富強

旗民久遠之長計也或疑口外聚集多人恐於蒙古滋擾諸城左右皆各旗王公大人牧馬之厰今墾爲田恐旗人有所不便又或疑天寒霜早恐其難於收穫山少林木恐其艱於柴薪凡此疑難之處臣皆徧觀而細訪之口外之山綿亘千餘里名曰大壩凡壩內之田皆已招民墾種現徵錢糧此諸城之地逼近大壩俱係旗人牧厰與蒙古無涉旗厰之外乃太僕寺遊牧之地遊牧之外乃察哈爾居住之處察哈爾乃爲內扎薩克地方彼此隔

遠無由滋擾八旗牧廠所佔甚大多有餘閒可以
併省又遊牧之地方數千里割其一隅即可充給
至柴薪稍遠未嘗缺乏且壩內諸山多有產煤之
所若招民開採自可足用臣於三月十三日在獨
石口草芽未青十四日至紅城子青草長大一寸
氣候可以春耕開平城外隴畝猶存碾碓尚在若
非種植何以有此興和地氣較暖於開平其爲可
以耕種必無疑也臣之愚意仰懇

聖恩於今年秋間特簡王公大臣前往開平興和諸城境

內查閱各旗放青之馬共有若干約需牧地若干
將舊日所分牧地通盤計算可併者併之可省者
省之可兌給者兌之務使牧廠之地與耕種之地
疆界分清不致混淆臣於明春飭地方官招民墾
種遊員前往經理區畫三年之間田疇可以盡闢
然後漸次修葺城垣蓋造房屋通商惠工約計五
年百物皆備然後派撥滿兵前往駐防則凡邊之
外皆成樂土往駐之人自各便安天地之氣與人
相通人烟既聚則天氣益暖天氣益暖則田疇益

闢田疇益闢則駐防之兵可以陸續增添然則其所益於九邊之防維八旗之生計者億萬斯年而未有已也

承德府志卷四十九

承德府志卷五十

藝文三

議

漢

論匈奴保塞議

侯應

周秦以來匈奴暴桀寇侵邊境漢興元被其害臣聞北邊至遼東外有陰山東西千餘里草木茂盛多禽獸草木冒頓單于依阻其中治作弓矢來出爲寇是其苑囿也至孝武世出師征伐斥奪此地攘之于幕北建塞徼

起亭隧築外城設屯戍以守之然後邊境得用少安幕
北地平少草木多大沙匈奴來寇少所蔽隱從塞以南
徑深山谷往來差難邊長老言匈奴失陰山之後過之
未嘗不哭也如罷備塞戍卒示外裔之大利不可一也
今聖德廣被天覆匈奴匈奴得蒙全活之恩稽首來臣
夫外裔之情困則卑順強則驕逆天性然也前以罷外
城省亭隧今裁足以候望通烽火而已古者安不忘危
不可復罷二也中國有禮義之教刑罰之誅愚民猶尙
犯禁又况單于能必其衆不犯約哉三也自古中國尙

建關梁以制諸侯所以絕臣下之覬覦也設塞徼置屯戍非獨爲匈奴而已亦爲諸屬國降民本故匈奴之人恐其思舊逃亡四也近西羌保塞與漢人交通吏民貪利侵盜其畜產妻子以此怨恨起而背畔世世不絕今罷乘塞則生嫚易分爭之漸五也往者從軍多沒不還者子孫貧困一旦亡出從其親戚六也又邊人奴婢愁苦欲亡者多日聞匈奴中樂無奈侯望急何然時有亡出塞者七也盜賊桀黠羣輩犯法如其窘急亡走北出則不可制八也起塞以來百有餘年非皆以土垣也或

因山巖石木柴僵落谿谷水門稍稍平之卒徒築治功費久遠不可勝計臣恐議者不深慮其始終欲以壹切省繇戍十年之外百歲之內卒有他變障塞破壞亭隧滅絕當更發屯繕治累世之功不可卒復九也如罷戍卒省候望單于自以保塞守禦必深德漢請求無已小失其意則不可測開外裔之隙虧中國之固十也非所以永持至安威制百蠻之長策也

唐

駁宋慶禮諡議

張九齡

慶禮在人苦節爲國勞臣一行邊陲三十年所戶庭可
樂彼獨安于傳遞稼穡惟艱又能實于軍廩莫不服勞
辱之事而匪懈其心守貞堅之規而自盡其力有一于
此人之所難况營州者鎮彼戎夷扼喉斷臂逆則制其
死命順則爲其主人是稱樂都其來尙矣往緣趙翽作
牧馭之非才自經隳廢便長寇孽故二十年間有事東
鄙僵尸暴骨敗將覆軍蓋不可勝紀大明臨下聖謀獨
斷恢祖宗之舊復大禹之迹以數千之役徒無甲兵之
強衛指期遂往稟命而行于是量畚築執鼙鼓親總其

役不愆所慮俾柳城爲金湯之險林胡生腹心之疾蓋
爲此也尋而罷海運收歲儲邊亭晏然河朔無擾與夫
興師之費轉輸之勞較其優劣孰爲利害而云所亡萬
計一何謬哉及契丹背誕之日俱我犄角之勢雖鼠穴
自固而駒牧無侵蓋張星彼都繁賴之力也安有踐其
迹以制其實貶其諡以詢其虛採慮始之謗聲忘經遠
之權利義非得所孰謂其可請以所議更下太常庶素
行之迹可尋易名之典不墜者也

案唐營州都督府初治柳城扼制奚契丹

武后時爲兩蕃所攻移治漁陽元宗時奚契丹款付欲復治柳城宋璟固爭不可獨慶禮以爲利乃詔爲使築

城纔三旬畢九齡所言專指營州築城事故錄於此是
篇曲江集未載欽定熱河志從舊唐書宋慶禮
傳錄出所云張星彼都蓋張皇之譌因初議慶禮諡
者爲太常博士張星本傳前後俱有張星字而誤也

記

遼

釋迦定光二佛舍利塔記

僧慧材

竊聞三千化寶百億尊復往之迹以無垠方便之門
而莫限應願榮辭于天界權儀降誕于王宮孜孜而示
倦龍庭默默而優游鳳苑顰眉闕返嚴駕驂迴老病死
苦以因觀法報化身而是慕奢華涕厭午夜逾城苦行

石堅六年修道浴泥恒河已赴菩提樹來斷障降魔既
登于佛果垂慈應請乃轉于法輪始從鹿苑終至鶴林
時經四十九年教演一十二分所應度者皆以隨宜方
便度訖其未度者亦已與作得度因緣顧此土之緣周
念地方之化益于是就力士生地之內詣堅固樹林之
間足南首北背東面西以足枕肱現四儀之究竟收心
住定示八象之窮終金口緘以絕言玉毫掩而闕綵四
生乏主悲摧凡聖之心三界無依哀變乾坤之色堅勞
之壽既已云亡金剛之身故亦是壞閣維訖于寶樹舍

利分以金罍爰興宰堵波以利薩達疇育王西出

闕二字

八萬四千隨帝東臨並造三十六所于凝固之道體雖

闕然不然而轉變之化身亦法爾窅爾是以

闕二字

之刹

土咸建多

闕

之塔婆垂青蔭而廣大施慧燈以遐延凡

以興一供之因定尅干生之果粵有

闕四字

重和十五年

陶冶甄鑄鐵塔一所立十三簷亘二百尺往往夜晦屢

放紅光福常住以豐肥祐上下而和睦邇後展討殿宇

津置堂廊每嗟佛壠閃于南隩大衆僉議欲移中央卽

有惠行大德潛資義倉提點雲敷共捨淨資一千緡其

諸釋侶量力施錢共四百千用充功費尋擇良辰亦得
吉卦圻至十簷獲定光佛舍利六百餘顆至地宮內獲
釋迦佛舍利一千三百餘顆再選定四月八日午時依
舊如法安葬竊以慧材狼山冗學龍苑庸夫赧扣瑣材
聊編盛事伏願三乘五性承茲乃共捨臧軒七趣十生
仗此乃同登轍駕更願陵遷谷變懿範不凋地久天長
徽猷永固云爾

書

後漢

擬答北匈奴書

班彪

臣聞孝宣皇帝勅邊守尉曰匈奴大國多變詐交接得其情則卻敵折衝應對入其數則反爲輕欺今北匈奴見南單于來附懼謀其國故數乞和親又遠驅牛馬與漢合市重遣名王多所貢獻斯皆外示富強以相欺誑也臣見其獻益重知其國益虛歸親愈數爲懼愈多然今旣未獲助南則亦不宜絕北羈縻之義禮無不答謂可頗知賞賜畧與所獻相當明加曉告以前世呼韓邪郵支行事報答之辭令必有適今立橐草並上曰單于

不忘漢恩追念先祖舊約欲修和親以輔身安國計議甚高爲單于嘉之往者匈奴數有乖亂呼韓郅支自相讐隙並蒙孝宣皇帝垂恩救護故各遣侍子稱藩保塞其後郅支忿戾自絕皇澤而呼韓附親忠孝彌著及漢滅郅支遂保國傳嗣子孫相繼今南單于攜衆向南欵塞歸命自以呼韓嫡長次第當立而侵奪失職猜疑相背數請兵將歸掃北庭策謀紛紜無所不至惟念斯言不可獨聽又以北單于比年貢獻欲修和親故拒而未許將以成單于忠孝之義漢秉威信總率萬國日月所

照皆爲臣妾殊俗百蠻義無親疎服順者褒賞畔逆者
誅罰善惡之效呼韓郅支是也今單于欲修和親欵誠
已達何嫌而欲率西域諸國俱來獻見西域國屬匈奴
與屬漢何異單于數遭兵亂國內虛耗貢物裁以通禮
何必獻馬裘今齋雜繒五百疋弓韃韞丸一矢四發遣
遺單于又賜獻馬左骨都侯右谷蠡王雜繒各四百疋
斬馬劍各一單于前言先帝時所賜呼韓郅支空侯
皆敗願復裁賜念單于國尚未安方勵武節以戰攻爲
務竽瑟之用不如良弓利劍故未以齋朕不愛小物于

單于便宜所欲遣驛以聞

諫伐鮮卑書

蔡邕

書戒猾夏湯伐鬼方周有獫狁蠻荆之師漢有閩顏瀚
海之事征討殊類所由尙矣然而時有異同勢有可否
故謀有得失事有成敗不可齊也武帝情存遠畧志闢
四方南誅百越北討強戎西伐大宛東并朝鮮因文景
之蓄積天下之饒數十年間官民俱匱乃興鹽鐵酒榷
之利設告緡重稅之令民不堪命起爲盜賊關東紛擾
道路不通繡衣直指之使奮鐵鉞而並出旣而覺悟乃

息兵罷役封丞相爲富民侯故主父偃曰夫務戰勝窮
武未有不悔者也夫以世宗神武將帥良猛財富充足
富當所拓廣遠猶有悔焉况今人財並乏事方昔時乎
作賦自匈奴遁逃鮮卑強盛據其故地稱兵十萬才力勁健
意智日生加以關塞不嚴禁網多漏精金良鐵皆爲賊
有漢人逋逃爲之謀主兵利馬疾過于匈奴昔段熲良
將習兵善戰有事西羌猶十餘年今育晏才策未必過
類鮮卑種衆不弱于曩時而虛計二載自許有成若禍
結兵連豈得中休當復徵發衆人轉運無已是爲耗竭

諸夏并力蠻夷夫邊垂之患手足之疥搔中國之困胸背之癩疽方今郡縣盜賊尙不能禁况此強鹵而可伏乎昔高祖忍平城之恥吕后棄慢書之諾方之于今何者爲甚天設山河秦築長城漢起塞垣所以別內外異殊俗也苟無賊國內侮之患則可矣豈與蟲螿狡寇計爭往來哉雖或破之豈可殄盡而乃令本朝爲之盱食乎夫專勝者未必克挾疑者未必敗衆所謂危聖人不行朝議有嫌明主不行也昔淮南王安諫伐越曰天子之兵有征無戰言其莫敢校也如使越人蒙死以逆執

事斯輿之卒有一不備而歸者雖得越王之首而猶爲大漢羞之而欲以齊民易強鹵威辱外裔就如其言猶已危矣况乎得失不可量耶昔珠崖郡反孝元皇帝納賈捐之言而下詔曰珠崖背叛今議者或曰可討或曰棄之朕日夜惟思羞威不行則欲誅之通于時變復憂萬民夫萬民之飢與遠蠻之不討何者爲大宗廟之祭凶年猶有不備况避不嫌之辱哉今關東大困無以相贍又當動兵非但勞民而已其罷珠崖郡此元帝所以發德音也夫恤民救急雖成郡列縣尙猶棄之况障塞

卷五十一
九
之外未嘗爲民居者乎守邊之術李牧善其畧保塞之
論嚴尤申其要遺業猶在文章具存循二子之策守先
帝之規臣曰可矣

前燕

上慕容皝書

封裕

臣聞聖王之宰國也薄賦而藏于百姓分之以三等之
田十一而稅之寒者衣之飢者食之使家給人足雖水
旱而不爲災者何也高選農官務盡勸課人治周田百
畝亦不假牛力力田者受旌顯之賞惰農者有不齒之

罰又量事置官量官置人使官必稱須人不虛位度歲
入多少裁而祿之供百僚之外藏之太倉三年之耕餘
一年之粟以斯而積公用于何不足水旱其如百姓何
雖務農之令屢發二千石令長莫有志勤在公銳盡地

力一作利

者故漢祖知其如此以墾田不實徵殺二千石

以十數所以明章之世號次昇平自永嘉喪亂百姓流
亡中原蕭索千里無烟飢寒流隕相繼溝壑武宣王以
神武聖畧保全一方威以殄奸德以懷遠故九州之人
寒燠殊俗襁負萬里若赤子之歸慈父流人之多于舊

土十倍有餘人殷地狹故無田者十有三四殿下以英
聖之資克廣先業南摧強趙東滅句驪北取宇文拓境
三千里增民十萬戶繼武闡廣之功有高西伯宜悉罷
諸苑以業流人人至而無資產者賜之以牧牛不當更
收重稅也且以殿下之人用殿下之牛牛非殿下之有
將何在哉善藏者藏于百姓若斯而已矣爾者則深副
樂土之望戎旗南指之日中國之人皆將壺餐奉迎石
虎誰與居乎且魏晉雖道消之世猶削百姓不至于七
八持官牛田者官得六分百姓得四分私牛而官田者

與官中分百姓安之人皆悅樂臣猶曰非明王之道而况增乎且水旱之厄堯湯所不免王者宜濬治溝澮循鄭白西門史起灌溉之法旱者決溝爲雨水則入于溝澮上無雲漢之憂下無昏墊之患句驪百濟及宇文段部之民皆兵勢所徙非如中國慕義而至咸有思歸之心今戶垂十萬狹湊都城恐方爲國家深患宜分其兄弟宗屬徙于西境撫之以恩檢之以法使不得散在居人知國之虛實今中原未平資畜宜廣官司猥多游食不少一夫不耕歲受其飢必取于耕者而食之一人食

一人之力游食數萬損亦如之安可以家給人足治致
昇平殿下降覽古今之事多矣政之巨患莫甚于斯其
有經畧出世才稱時求者自可隨須致置一作之列位非

此已往其耕而食蠶而衣亦天之道也殿下聖性寬明
思言若渴故人盡芻蕘有犯無隱前者參軍王憲大夫
劉明並竭忠獻欵以貢至言雖頗有逆鱗意在無責主
者奏以妖言犯上致之于法殿下慈宏包納恕其大辟
猶削出禁錮不齒于朝其言是也殿下固宜納之如其
非是宜亮其狂狷置諫臣而求直言亦猶北行趨越必

不得其所志矣右長史宋該等阿媚苟容輕劾諫士已無骨鯁嫉人之有掩蔽耳目不忠之甚四業者國之所資教學者有國盛事習戰務農尤其本也百工商賈特其末耳宜量軍國所須置其員數已外歸之于農教之戰法學者三年無成亦宜歸之于農不可徒充大員以塞聰儻之路臣之所言當也時速施行非也亟加罪戮使天下知朝廷從善如流罰惡不掩王憲劉明忠臣也願宥忤鱗之愆收其藥石之效

金

答李天英書

趙秉文

天英足下自足下失意東歸無日不思况如三歲向得
來音甚悉動靜爲慰所望所寄雜詩疾讀數過擊節屢
嘆足下天才英逸不假繩削豈復老夫所可擬議然似
受之天而不受之人屢欲貢悃誠山川間之坐成浮沈
况勤厚如此過望默化僕非其人筆拙思荒自濡其涸
况望餘波耶豈以犬馬齒在前欲俯就先後進禮耶聊
布一二所聞于師傳間者幸恕不揆常聞古人之詩各
得其一偏又多其性似者若陶淵明謝靈運韋蘇州王

維柳子厚白樂天得其沖淡江淹鮑明遠李白李賀得其峭峻孟東野賈浪仙又得其幽憂不平之氣若老杜可謂兼之矣然杜知詩之爲詩未知不詩之爲詩而韓愈又以古文之渾浩溢而爲詩然後古今之變盡矣太白辭勝于理樂天理勝于辭東坡又以太白之豪樂天之理合而爲一是以高視古人然亦不能廢古人足下以唐宋詩人得處雖能免俗殊乏風雅過矣所謂近風雅豈規規然如晉宋辭人蹈襲用一律耶若曰子厚近古退之變古此屏山守株之論非僕所敢知也詩至于

李杜以爲未足是畫至于無形聽至于無聲其爲怪且
迂也甚矣其于書也亦然足下立言指意不蹈襲前人
一語此最詩人妙處然亦從古人中入譬如彈琴不師
譜稱物不稱衡工匠不師繩墨獨自師心雖終身無成
可也故爲文當師六經左邱明莊周太史公賈誼劉向
揚雄韓愈爲詩當師三百篇離騷文選古詩十九首下
及李杜學書當師三代金石鍾王歐虞顏柳盡得諸人
所長然後卓然自成一家非有意于專師古人也亦非
有意于專擯古人也自書契以來未有離古人而獨立

者若揚子雲不師古人然亦有擬相如四賦韓退之惟
陳言之務去若進學解則客難之變也南山詩則子厚
之餘也豈據汗漫自師胸臆至不成語然後爲快哉然
此詩人造語之工謂之一藝可也至于詩文之意當以
明王道輔教化爲主六經吾師也可以一藝名之哉賈
誼董仲舒司馬遷揚子雲韓退之歐陽修司馬溫公文
儒之文也僕未之能學焉梁肅裴休晁迥張旼盡名理
之文也吾師之太白杜陵東坡詞人之文吾師其辭不
師其意淵明樂天高士之詩也吾師其意不師其辭然

吾老矣眼昏力綿雖欲學古人力不足也足下書來自
言近日欲作字然滯于藏鋒不能飛動詩欲古體然僻
于幽隱不能豪放足下自知之僕尙何言然藏鋒書之
一端所貴徧學古人昔人謂法書豈是率意而爲之也
又須真積力久自楷法來前人所謂未有未能坐而能
走者飛動乃吾輩胸中之妙非所學也若市人能積學
而不能飛動吾輩能飛動而不能積學皆一偏之弊耳
東坡論十八草書以爲鶯哥嬌數日相見曰此書何如
曰乃秦吉了耳足下之書無乃近似之乎精神所注間

出竒逸稍怠之際如病痲腫得免秦吉了足矣想當捧
腹大笑也寄來詩如雜詩五首老昏殊不可曉然此迄
令大成不過長吉盧仝合而爲一未能以故爲新以俗
爲雅非所望于吾友也昔人有吹簫學鳳鳴不可得聞
時有梟音耳君毋乃間有梟音乎向者屏山嘗語足下
云自李賀死二百年無此作矣理誠有之僕亦云然李
公愛才然知足下深者莫如老夫願足下以古人之心
爲心不願足下受之天而不受之人如世輕薄子也與
足下知心故道此意幸稍安無躁

與姚公茂書

楊 奐

奐頓首復別四五年思渴之甚所欲言者不一也握手
未期此懷可知子善至得書審玉眷佳裕且知北還喜
甚去歲子善云新築祠堂而石室在正位不知何所據
及見朱文公家禮圖說亦云在北架似不安也且宗廟
五廟七廟而已雖有成言所以作室次第于經則無所
見朱文公後宋人也建炎南渡廟社之禮一蕩就有故
老或鬱鬱下僚無所見于世此說在中庸或問中畧見
之所可信者止是昭穆位次于神主于石室皆不及也

家禮所載神主樣式亦非奐三十時入汴梁得宮室廟社法度于一故老處又五年因秋比以生徒之衆寓長安慈恩寺有僧曰了遷者乘間請觀寺之西南杜相公讀書堂奐一見知其家廟也其廟制如世之所謂吳殿也凡石室並在西壁高與人胸臆齊其僧猶以爲藏書龕旣而來洛下于楊正卿家閱稽古編文信乎其爲杜祁公之家廟也文粹韓文温公集多有家廟碑止說三室四室或云第一第二第三第四室又有出東室者亦不在石室方位之所在夫禮也者制度名數之所寓也

不有所據必有所見文公所述未見其所據當以奠之
所目覩者爲廟之定制天子與諸侯卿大夫同所以異
者名數也今汴梁太廟法度故家具有圖說自己亥春
定課時有告隱匿官粟者親入倉檢視而倉卽太廟也
因得考其制度焉石室在西壁正殿凡二十五間始祖
室三間內附祧廟神主五位其石室皆在西壁而近南
牖世祖二間內附肅宗一位穆宗二間內附康宗一位
太祖以下至宣宗各二間係八室計一十六間其神主
石室並在西壁東西夾室各一間凡有神主處每一間

門一牖一門在左牖在右以上共二十五間近有客曰
毛正卿至自保州曾爲先朝太祝談舊禮如在目前是
日坐客甚衆談竟奠問之曰如公所言行禮時以將在
秋冬而不及春夏也客問何以知之奠曰以公止見虎
席故知其秋冬也若春夏則席以桃枝桃枝竹也客
曰適在冬耳奠又問公之行禮將屬時享而不及禘祫
客問何以知之奠曰禘祫則太祖神主位于埆下而東
向焉而昭在于北南向之穆在于南而北向之公所言
而曰太祖神主在門之內南向焉故知其不及禘祫也

客謝未嘗及禘祫吁此定禮也患不素考耳是與非吾友訂之恐不宜襲家禮之誤也著書非細事也古之聖賢未嘗敢自作古所謂神主之說容面告焉

說

明

棄開平說

尹耕

案開平元之上都也灤水繞南龍岡奠北東連遼碣西帶豐勝蓋形勝之地也元人以之肇基成祖北伐往來由之東路有涼亭枕河賽峯黃崖四驛以接大寧西路

有桓州威鹵明安隰寧四驛以接獨石巨鎮隱然屏我
山後遇有警急則宣遼有首尾之援居常防戍則京師
得封殖之固夫國家定鼎北平不患帶几之無憑而患
于肩背之失恃大寧旣委三衛開平復移獨石遂使京
師之北僅存藩籬漠北遊魂藉聲黃內所關豈細故哉
究而論之則屯田便宜于轉輸一勞可以永利大寧要
害于開平易置亦頗非難夫五原在豐勝之外沙磧之
間昔人且猶開渠營田以規全利何龍岡之沃灤水之
潤開平獨不可田耶夫失開平則後背雖空尙有宣府

獨石之固失大寧則左肩全弱宜遼隔絕矣故嘗爲薛
祿計曰開平可田屯田可也不可田則易置大寧可也
夫劉秉忠諸人皆于開平樹藝卜隱則開平無不可田
之理開平爲元故都山水明秀壞城郭宮闕而留其民
居以與三衛則三衛亦無不樂從之理二策無不可就
也土人稱祿馳驅邊塞悉心經營然祿知謹于封疆之
小利而昧于中外之大防知懲乎目前之紛擾而滯乎
經世之權變開平孤遠不易守矣而北門單弱之不恤
餉道艱難不易致矣而屯田開墾之不求割棄境土三

百餘里不之惜矣而易置三衛之不講此所以效成于一時而禍伏于異日恩加于近塞而謀失于遠猷智者窮源不能無慨也

跋

金

跋趙太常擬試賦後

楊 奐

金大定中君臣上下以淳德相尚學校自京師達于郡國專事經術教養故士大夫之學少華而多實明昌以後朝野無事侈靡成風喜歌詩故士大夫之學多華而

少實上病其然也當泰和丙寅春二月二十五日萬寧宮試貢士總兩科無慮千三百輩上躬命賦題曰日合天統侍臣初甚難之而太常卿北京趙公適統御前讀卷官獨以爲不難卽日奏賦議乃定旣而中選者纔二十有八人僕時甫冠獲試廷下而席屋偶居前列朝隙聞異香出殿櫺問一紫衣顧予起問題之難易及名氏里質年齒而去少頃復相慶曰適駕至矣薄暮出宮傳以爲希遇退而志之後四十五年僕以河南漕長告老于燕過太常之孫承祖家得所擬賦感存歿不能不憫

然爲敘其未以舊詩歸之所謂月淡長楊曉色清天題
飛下寂無聲南山霧豹文章在北海雲鵬羽翼成玉檻
玲瓏紅露重金爐縹緲翠烟輕誰言半夜曾前席白日
君王問賈生者是余少作也無可取以其紀一時之事
庶附趙氏家傳或見于後世云

明

題王庭筠秋山應制詩稿

宋 濂

金源之制每歲以正月幸春水九月幸秋山五日之間
羣臣一進起居表其嚴慎如此之至者志非在于畋遊

將修兵政而紓民賦也道陵如薊門至秋山河東王庭筠以翰林修撰扈從左右應制賦詩三十餘篇甚被獎眷蓋自大定以來累洽重熙文物聲名可擬漢唐故其一時君臣遇合天施地受雨露無際浹于太和此乃金極盛之時自當時言之孰不效上林羽獵以侈大樂觀而庭筠乃能以秋山不合圍爲風則庭筠者亦良士也哉此卷庭筠所具之稿惟十四首而逸其大半詩序中所謂九日正泰和元年九日丙辰然道陵以是月七日甲寅發京師二十九日丙子至自秋山道塗所歷凡二

十有三日其幸香林平頂山溫泉等什皆可以次而推
至若牡丹醕醺松影三詩則不知作於何時案庭筠以
明昌三年供奉翰林八月遷修撰未幾謫鄭州防禦判
官承安四年復起爲應奉翰林文字泰和改元又轉修
撰明年遂亡壽甫四十七爾詩題旣曰奉旨而作雖不
能必於何年其決在禁林之日矣案春水秋山初無定
處洪皓續松漠紀聞謂去國數百里逐水草而居處也

案平頂山在今豐寧縣境者二溫泉今在豐寧縣
者三未知庭筠所賦者屬何處然總在今境地

國朝

御製避暑山莊三十六景詩恭跋

張廷玉

康熙五十一年六月臣等恭注

御製避暑山莊三十六景詩仰見

皇上聖學崇深含經味道純粹以精發爲詩歌上繼雅頌

囊括百家臣等學識舛陋管窺蠡測未能宣揚盛

美茲蒙

恩諭俾得附名簡末且喜且愧不容於懷欽惟我

皇上聲教覃敷極天所覆蓋入版籍要荒之外率同畿甸

自京師東北行羣峯迴合清流縈繞至熱河而形

勢融結蔚然深秀古稱西北山川多雄奇東南多
幽曲茲地實兼美焉蓋造化靈淑特鍾於此前代
威德不能遠孚人跡罕至

皇上時巡過此見而異之念此地舊無居人闢爲離宮無
侵民田廬之害又去京師至近章奏朝發夕至綜
理萬幾與宮中無異乃相其岡原發其榛莽凡所
營構皆因巖壑天然之妙開林滌澗不采不斲工
費省約而綺縠繡錯煙景萬狀標其尤者凡三十
有六清涼爽塏於夏爲宜每至盛暑則奉

皇太后駐蹕焉泉甘土沃居此逾時

聖容豐裕精神益健蓋

皇上憂勞萬民德合於天故天特開靈境以待

皇上之遊息也

臣

等忝列侍從時

賜燕遊諸景皆嘗目擊而莫能摹寫及伏讀

御製詩則林泉蒼靄一一湧現於胸中蓋此地之景乃天

地山川自然之氣所發著非

皇上化工之筆莫能傳也而

臣

等尤有厚幸者伏讀

皇上御製避暑山莊記及諸詩奉

慈闈則徵寢門問膳之誠憑臺榭則見茅茨不剪之意觀
漑種則念稼穡之艱難覽藝蒔則驗陰陽之氣候
玩禽魚則思萬物之咸若凡讀者因詩以求諸景
之勝豈獨未見者如親歷哉卽

皇上敬天勤民與覆載同流之氣象可以昭示天下萬世
永永無極矣

御製古長城說恭跋

汪由敦

御製古長城說以化工之筆行自然之文深入顯出宇宙
在手尋繹再四心目曠然在昔山經地志類出文

人承傳沿襲掇拾諏採輒矜爲創獲其經目覩記
可覆案者百不一二數也况絕塞僻遠遊躅所不
至之地哉茲以

六御所經名王部長旃裘之衆親履而指數之其核實爲
何如者且謂天地自然所生以限南北尤不易之
論蓋嘗觀之百家之聚千室之邑率有岡巒川阜
縈迴環抱之勢至通都郡國則其阨塞阻要顯然
爲之疆域屏翰皆非人力所能爲者聖人爲之相
其陰陽建城郭宮室規重門禦暴之制無非因其

自然易曰地險山川邱陵也王公設險以守其國
此物此志也蒙恬之爲長城後人專罪其長惡剿
民其垂死所歎爲絕地脈者一若設詞以自文而
不知其拂天地之經而不因其自然彼固未嘗不
自知之而深悔之也然非親歷而得其實其孰從
而證之或疑塞外蕃部聯屬雖逐水草亦各有分
地且此故元上都興州近境安知非昔之居是者
殘壁故壘荒畧失傳者也是或未可知然西北之
瀚海流沙東北之窩集是非天地所限也不寧惟

是凡大川之達江海其入處必有沙橫亘若戶闕
然濬輒復淤是乃在水中又豈昔人所爲耶觀此
則天地所生自然者益信

承德府志卷五十一

藝文四

碑銘

元

中書左丞姚文獻公神道碑

姚燧

茲公諱樞字公茂事世祖潛邸十年左右宸極十有九年居近密之地受尊寵之任可謂必世之久惟其不因富貴進退禮敬窮達一節不易寒士故不取耻當時明哲保身以薨帝爲震悼賻楮泉爲千者千五百閔惟子

煒生十五年未授之室賜聘財如所賻明年官以禮部
郎中皆異數也後十九年當元貞二年裕聖太后以嘗
侍講裕宗言之成宗贈諡榮祿大夫少師文獻公至大
三年武宗追號嘉猷程世舊學功臣太師開府儀同三
司魯國公又推恩再世考仲宏贈太保儀同三司魯國
康懿公祖錡銀青榮祿大夫大司徒魯國惠靖公妣張
氏祖妣李氏皆魯國夫人惟姚氏爲神明之後五季梁
唐六鎮節度使勅生金吾將軍漢英周廣順初太祖遣
之使遼見留事世景聖三宗加安時制節宏化翊亮功

臣開府儀同三司樞密使檢校太師兼政事令上柱國
東陽郡公生中書門下平章事北面宣徽使衡之生給
事中同中書門下平章事居正生太師左金吾衛上將
軍虔州節度使景祥生太子洗馬企華生金東上閣門
使金州團練使玠生閤門祇候武德將軍佺生武德將
軍獲嘉令錡生安遠大將軍慶陽安化丞淵後更仲宏
生公及禎格公自稚弱力于學晝則經紀其家嚮晦則
讀書夜分不輟魯國夫人恐傷耽苦每止之乃塞牕不
使見燭就枕必盡三鼓聞將遷關中康懿公錄事判官

于許俾取師氏姑及姑之夫子昌以來公徒行懷書困
休于樹宿止于邸亦出以誦自期甚高宋內翰九嘉少
登科甲時有重名方間居許摧折行位與之游一日賓
會錄事名召公內翰怒曰公茂負王佐之畧豈可若是
易之先祖曰同僚呼兒輩宜然猶竟席不樂其爲前輩
見推如此壬辰許城被圍州版公軍資庫使與副夜直
四鼓聞窻外歎曰人獻東門出索之無得副曰吾嘗遇
兵河朔鬼物云然宜掠吾家乃相與歸街陌橫鈴索斷
行見其懷印若赴州計事者至家乃盡出金銀酒具匱

飾裹餼糧爲逃死計日出而東門果破邀軍將蕭姓者
入家盡付所出蕭曰吾嘗受邱真人教汝軍中惟救人
無殺吾掾乃死公聞太宗詔學士十八人卽長春宮教
之俾楊中書惟中監督則往依焉中書少公六年兄稱
之與偕北覲時龍庭無漢人士夫帝喜其來甚重之乙
未詔二太子南征俾公從楊中書卽軍中求儒道釋醫
卜酒工樂人會破棗陽併公所招將盡坑之大將幕竹
林間公辨析明詔如此他日將何以復命乃蹙數人逃
入竹中潛歸其營匿嚴侯軍中纔脫死數十人繼拔德

安得江漢先生趙仁甫與之言信奇士出所爲文數十篇以九族殫殘不欲北與公訣斬死公留宿帳中旣覺月皓而盈惟寢衣存乃鞍馬號積尸間求至水裔脫屣被髮仰天而號欲投溺而未入也公曉以徒死無益汝存則子孫或可傳緒百世保吾而北無他也遂還盡出程朱二子性理之書付公江漢至燕學徒從者百人北方經學自茲始歲辛丑賜錦衣金符以郎中扎爾固齊舊作魯瓦赤今改正行臺于燕時事貨賂天下諸侯競以掎克入媚以公幕長必分及之乃一切拒絕人有以銀二笏來

見旣謝卻乃出置璫簾間遣人追及與之徙家來輝墾
荒雲門糞田數百畝修二水輪誅茅爲堂城中置私廟
奉祀四世堂龕魯司寇容傍垂周兩程張邵司馬六君
子像讀書其間衣冠莊肅以道學自鳴佳時則鳴琴百
泉之上遁世而樂天若將終身後生薄夫或造庭除出
語人曰幾褫吾魄又汲汲以化民成俗爲心自版小學
書語孟或問家禮俾楊中書版四書田和鄉尙書版毛
詩折衷易程傳書蔡傳春秋胡傳皆于燕又以小學書
流布未廣教弟子楊古爲沈氏活版與近思錄東萊經

史論說諸書散之四方時先師許魏國文正公魯齋衡
出入經傳子史泛濫釋老下至醫卜星筮兵刑貨殖水
利算數靡所不究公過魏與竇漢卿聚茅齋聽公言義
正粹先師遂造蘇門盡錄是數書以歸謂其徒曰向所
授受皆非今始聞進學之序若必欲相從當盡棄前習
以從事于小學四書爲進德基不然當求他師衆皆曰
惟先生命則魏國公由窮理致知反躬踐實爲世大儒
者又公所梯接云歲庚戌盡室來輝相依以居會上在
潛邸遺托克托

舊作脫兀
脫今改正

故平章趙璧驛至彰德恐公

逃避托克托留璧獨至輝以過客見審其爲公始致見
徵之旨公曰天下之人同是姓名何限恐其誤徵不敢
妄應璧曰汝非棄扎爾固齊隱此者乎公曰是則然矣
璧曰良是乃偕往彰德受命遂行既至上大喜曰客遇
之俾居衛從後列惟不直宿時召與語隨問而言久之
詢及治道公見上聰明神聖才不世出虛已受言可大
有爲感以一介見信之深見問之切乃許捐身驅馳宣
力盡其平生所學敷心瀝膽爲書數千百言首以二帝
三王爲學之本爲治之序與治國平天下之大經彙爲

八目曰修身力學尊賢親親畏天愛民好善遠佞次及其救時之弊爲條三十曰立省部則庶政出一綱舉紀張令不行于朝而變于夕辟才行舉逸遺慎銓選汰職員則不專世爵而人才出班俸祿則賊穢塞而公道開定法律審刑獄則收生殺之權于朝諸侯不得而專邱山之罪不致苟免毫髮之過免惟極法而冤抑有伸設監司明黜陟則善良姦竅可得而舉刺閣徵斂則部族不橫于誅求簡驛傳則州郡不困于需索修學校崇經術旌節孝以爲育人才厚風俗美教化之基使士不媮

于文華重農桑寬賦稅省徭役禁游惰則民力紓不趨
于浮僞且免習工技者歲加富溢勤耕織者日就饑寒
肅軍政使田里不知行營往復之擾攘賙匱乏恤鰥寡
使顛連無告者有養布屯田以實邊戍通漕運以廩京
都紕債負則賈胡不得以子爲母如牴生牴牛十年千
頭之法破稱貸之家廣儲蓄復常平以待凶荒立平準
以權物估郤利便以塞倖塗杜告奸以絕訟源各疏張
弛之方其下本末兼該細大不遺文不具述上奇其才
由是動必見詢使授太子經以太師淇陽王之兄故丞

相特默格爾

舊作土木谷
兒今改正

故右丞巴哈濟達

舊作不華
吉丁今改

正

今司徒瑪努勒

舊作買奴
今改正

為之伴讀日以三綱五常

先哲格言薰陶德性明年憲宗即位詔凡軍民在齊拉

袞

舊作赤老
溫今改正

山南者聽上總之為張宴羣下罷酒將出

遣人止公頃者諸人皆賀汝獨默然豈有意耶對曰臣

欲陳之他日不謂遽問且天下土地之廣人民之殷財

賦之阜有加漢地者乎軍民吾盡有之天子何為異時

庭臣聞之必悔見奪不若惟手兵權供億之須取之有

司則勢順理安上曰慮所不及者遣人入間願總兵與

國戮力報可公策太祖承天大命兵取天下功未及竟而遂防遐太祖平金遣二太子總大軍南伐降唐鄧均德安四城拔棗陽光化留軍戍邊襄樊壽泗繼亦來歸而壽泗之民盡爲軍官分有由是降附路絕雖歲加兵淮蜀軍將惟利剽殺若以秋去春來之兵分屯要地寇至則戰寇去則耕積穀高廩邊備旣實俟時大舉則宋可平上善之始置屯田經畧司于汴西起襄鄧宿重兵與襄陽制閩犄角東連陳亳清口桃源列障守之又置都運司于衛轉粟于河繼餽諸州陝西則移隴右汪義

武公戍利州劉惠忠公黑馬于成都割河東解之鹽池
歸陝西置從官所中糧興元猶懼不繼置行部秦州順
嘉陵漕魚關沔池轉粟入利其年大封同姓勅上于南
京關中自擇其一公曰南京河徙無常土薄水淺瀉鹵
生之不若關中厥田上古名天府陸海上願有關中
帝曰是地戶寡河南懷孟地狹民夥可取自益遂兼有
河內壬子夏入覲受命徵大理至察遜諾爾舊作曲先
腦而今改
正
夜宴羣下公爲陳宋祖遣曹彬取南唐救無效潘美
伐蜀嗜殺及克金陵未嘗戮一人市不易肆以其主歸

明日早行上據鞍呼曰汝昨言曹彬不殺者吾能爲之
吾能爲之公馬上賀曰聖人之心仁明如此生民之幸
有國福也明年夏禡牙六盤大張教條俾公以王府尙
書身至京兆置宣撫司以楊中書爲使奏諸干夫長不
法奪有人室者旬月之間民大和浹道不拾遺師行留
裕宗後謂曰姚公茂吾不能離恐廢汝學今遣竇漢卿
教汝先遣三使入大理諭招許不殺掠大軍經吐番刊
木求塗以前三使先至諭旨彼以爲誑磔其尸于樹大
師及城其相高祥登陴望之見吾軍威之盛駭愕口張

不收飭公盡裂橐帛爲幟書止殺之令分號街陌由是
其民父子完保軍士無一人敢取一錢直者惟急求三
使之首或曰投洱水中遣漁者網之無得也俾公爲文
以祭賜其家人數千戶世無有與及歸馬多道死公惟
一馬瘠不可乘牽之襟穀數升時搖木盃以飼雪深三
尺軍馬所經踏爲冰梯惟旄牛負橐以從徒步千里中
原馬至分賚之始免繭足上駐六盤公疾求諸關中教
使勸農身至八州諸縣諭上重農之旨凡今關中桑成
刈者皆所訓植歲丙辰公入見或讒王府得中土心帝

遣阿藍答兒大爲勾考置局關中集經畧宣撫官吏下
及征商無遺羅以百四十二條曰俟終局日入此羅者
惟劉史兩萬戶以聞餘悉不請以誅上聞不樂公曰帝
君也兄也吾弟且臣事難與較遠將受禍未若盡是邸
如王以行爲久居謀疑將自釋復初好矣上難之翼日
語再及曰臣過是無策思久之曰從汝從汝先遣使以
來覲告時帝在河西聞不信之曰是心異矣曰來詐也
再使至詔許馳二百乘傳棄輜重先及見天顏始霽大
會之次上立酒尊前帝酌之拜退復坐及再至又酌至

再帝泣然上亦泣下竟不令有所白而上勅罷關西鈞
考廢行部安撫經畧宣撫都漕諸司帝親自將南伐與
上閱地圖俾公跽指瀕江州郡津步要地可舟越者遂
復上兵遣由鄂入歲己未秋及江而憲廟崩渝問至上
猶濟江駐兵結層樓蒙以臯比日居其上臨攻鄂城東
北賈似道聞公諮謀軍中比爲王猛城垂拔前茅上及
長沙下及隆興聞叛王將爲非覬于家追前茅還遂振
旅斷淨梁以歸帝卽大位以王文統爲平章盡出藩府
舊臣立十道宣撫使諸侯惟嚴忠濟爲強橫難制乃以

公爲東平至居庸北制下受命卽南或勸無行當入覲
陸辭公曰文統新當國彼將以我爲奪其位至治郡置
勸農檢察二人以監之推物力以均賦役罷鐵官居三
月大駕北征天后留燕遣使召公兒輩幼時汝授之書
何久留彼時特默格爾爲丞相惟專從衛宮闕諸事疑
則見謀二年拜太子太師公曰皇太子未立安可先有
太師還制中書改大司農公奏在太宗世詔孔子五十
一代孫元措仍襲封衍聖公卒其子與族爭求嗣爲訟
及潘藩邸時曰第往力學俟有成德達才我則官之又

聞曲阜有太常雅樂命東平守臣輦取其歌工舞郎與樂色俎豆衣服至日月山帝親臨觀飭東平守臣員缺充補無輟肄習臣宣撫東平嘗閔先聖大賢之後詩書不通義理不究與凡庶等版洛士楊庸選孔顏孟三族諸生俊秀者授之經而學夫禮盍真授庸教官以成國家育才待聘風動四方之美又詳議王鏞亦善士鍊習故實宜令提舉禮樂庶其歲久不致崩壞皆從之又具奏八事曰舉老成以輔皇子重省臣以振朝綱定法制以齊庶政立銓選以轉百官其四如兵衛屯田學校農

桑皆所屢陳又具四事保民守信強幹弱枝備內治外
敦本抑末于兵衛又申奏曰內地之民不習武事不耐
勞苦第可使出賦財帛以資國用西京北京諸路之民
習武耐勞可盡復其差賦充本路保甲屯田使進有取
而後出有歸可鎮內竊以禦外侮漢軍除守禦南邊可選
精勇富强三萬燕京東西分屯置營以壯神都此左右
中三衛起本者詔赴中書議事講定條格且勉諭曰姚
樞辭避台司朕甚嘉焉省中庶務須賴一二老成同心
圖贊仰與左三部尚書劉肅往盡乃心其尙無隱條成

與丞相史忠武公奏之帝深嘉納後詔中書右丞相安

國舊作安童今改正同知樞密院事布延舊作伯顏今改正翰林學士

承旨和爾果斯舊作和禮霍孫今改正近史天澤姚樞講定新格

朕已親覽可行于今卿等聞否亦當一一叅攷速行其

間一二可增損者已錄以聞李璫召其質子彥簡竊歸

反有迹矣帝問卿料如何對曰使璫乘吾北徵之釁留

後兵寡瀕海搗燕閉關居庸惶駭人心爲上策與宋連

和負固持久令數擾邊使吾罷于奔救爲中策如出兵

濟南待山東諸侯應援此成擒耳帝曰若是賊將何出

對曰出下策三年文統伏誅西域之人爲所壓抑者伏
闕羣言回回雖時盜國錢物未若秀才敢爲反逆帝曰
在昔潛藩商訂天下人物亦及文統姚公茂云此人學
術不純以游說干諸侯他日必反去年竇漢卿上書累
數千言亦發其必爲亂首秀才豈盡皆斯人然文統之
相叅知政事商公挺實譽之至是費寅以九事中時恚
忌訟商公爲文統西南之朋引陝西郎中行宣撫使趙
良弼爲徵幽商公上都以良弼多智畧疑爲文統流亞
械繫于獄會遣鄂托克舊作阿脫
今改正行院成都而無輔行

俾省擇人公奏惟商挺可陛下寬其前罪責成斯行遂
出而遣之公又奏方踐祚之初非良弼詞事關中恐後
事會寧身負矯擅誅東西川兩帥之罪以寬陛下西顧
之憂推是爲心忠純皎然安得與文統蓄異志者相比
臣請質闔門百口必其無他帝悟出之四年拜中書左
丞至元之元出省臣三罷世侯置牧守遷轉河東山西
河南山東官吏公行省河南山西明年而歸或言中書
政事大壞帝怒斥降大臣罪有人不測者公上言太祖
開創跨越前古施治未遑自後數朝官盛刑濫民困財

殫陛下天資仁聖自昔在潛聽聖典訪老成日講治道如邢州河南陝西皆不治之甚者爲置安撫經畧宣撫三司其法選人以居職頒俸以養廉去污濫以清政勸農桑以富民不及三年號稱大治諸路之民望陛下之治已如赤子之求毋先帝陟遐國難並興天開聖人纘承大統卽用歷代遺制內立省部外設監司自中統至今五六年間外侮內叛繼繼不絕然能使官離債負民安賦役府庫粗實倉廩粗完鈔法粗行國用粗足官吏轉換政事更新皆陛下克保祖宗之基信用先王之法

所致今陛下于基業爲守成于治道爲創始正宜息聖
心答天心睦親族以固本建儲副以重祚定大臣以當
圖開經筵以格心修邊備以防虞蓄糧餉以待歉立學
校以育才勸農桑以厚生是可以光先烈可以成帝德
可以遺子孫可以流遠譽以陛下才畧行此有餘邇者
伏聞聰聽日煩朝廷政令日改月異如始栽之木生而
復移旣架之屋起而復毀遠近臣民不勝戰懼惟恐大
木一廢遠業難成爲陛下之後憂國家之重害帝恚爲
釋五年用兵襄陽立河南行省經理屯田以公僉省八

年入覲十年拜昭文館大學士詳定禮儀事其年襄陽
下問其事宜公對呂文煥以江淮一使兼上路總管生
券軍縱還熟券徒之河北皆可十一年初議大舉奏如
求大將非中書右丞相妄圖同知樞密事布延舊作伯
顏今改
正不可七月左丞相布延陞辭付勅書惟逆戰者如軍
律餘止殺掠古之善取江南者惟曹彬一人汝能不殺
是亦一彬也既濟江下鄂使至夜召見公帝憂見色曰
自太祖戡定天下列聖繼之豈固存之令久帝制南國
邪蓋天命未絕朕昔濟江而家難作天不終此大惠而

歸今布延雖濟江天能終此與否猶未可知是家三百年天命未在于吾家先在于彼勿易視之其有事宜可書以進公言嚴兵守鄂無使荆闔斷陽羅渡先遣使責負歲幣留行人之罪明年公又言由陛下降不殺之詔布延濟江兵不踰時西起蜀川東薄海隅降城三十戶踰百萬自古平南未有若此之神捷者然自夏徂秋一城不降皆由軍官不思國之大計不體陛下之深仁利財剽殺是致降城四壁之外縣邑邱墟曠土無民國將安用比聞揚州焦山淮安人殊死戰我雖克勝所傷亦多

宋之不能爲國審矣而臨安未肯輕下好生惡死人之常情蓋不敢也惟懼吾招徠止殺之信不堅詐其來耳是用力拒宜申遣公幹官專輔布延宣布止殺之詔有犯令者必誅無赦若此則賞罰必立恩信必行聖慮不勞軍力不費老氏有曰大兵之後必有凶年疾疫隨之軍雖不試而民止得其半况今民去南畝來歲之食將安所仰帕首腰刀必倡爲亂袒臂一呼數十萬衆不難集也雖非勁軍壁山柵水卒未易平是一宋未亡復生一宋又南方官府以情破法鞭背文面或盛竹絡投諸

江中又鹽鐵酒酤權自漢代其後因之不廢今方新附若欲徵之人必離散制曰鞭背黥面及諸濫刑宜急除之權酤後議十三年罷昭文館拜翰林學士承旨仍詳定禮儀宋平凡其侍從之臣以士子入見者必令見公詢其學行而官之九月享廟拜大禮使明年上以自九月不雨至于三月問可以惠利斯民者公曰糜穀之多無若醪醴麩葉京師列肆百數日釀有多至三百石者月已耗穀萬石百肆計不可勝算與祈神養社費亦不貲宜悉禁絕皆從之初公方奏事得疾忽蹠不能言帝

急命從臣扶出登車至家未醒百日而愈後三年疾再至昏默三日薨壽七十八京師士大夫哭祭如失親戚曰自今帝側圖回天下者豈復有斯人者邪惟僉密院趙良弼賻俸半歲爲位祭其家終喪時孤姪燧仕安西燧僉淮西提刑焯獨舉其柩藁葬京城東南別墅後十八年當元貞二年五月焯徙葬卜于西洛金門山祖塋別兆于輝菊山之陽公天資含宏而仁恕恭敏而儉勤理生惟務本實不事末作未嘗疑人欺已有負其德亦不留怨胷中憂患之來不見言色魏國公每譽其善于

順受人莫可及在京晚屢輟祿雖奉朝請假質券劑盈
束視貧甘心不一出言恃其久故千人間不足于上有
來卽謀必反覆忠告惟恐吾言之不盡及秉筆中書或
咎公獨遺門墻故人公曰用人威權當出天子果若賢
材焉避不聞其瑣尾者烏敢藉權樹親賓市私恩乎他
善衆多今惟表其大益斯世者四其一倡鳴斯道使今
天下鄉校童蒙之師有知以小學四書爲先雖戴惠文
身爲刀筆筐篋之行與非士人亦手披口誦是書求廁
士列者往往多然故中書左丞之制有曰德全天懿學

得聖傳旨固有在于斯也再則中土士夫不知爲廟作
主以奉先祀自公始輝人多化之而祖考妥靈有所三
征西南夷爲陳曹彬取南唐兵不血刃贊神武以不殺
四當世祖淵龍規一幅員之判裂也請開屯田淮蜀移
兵戍之固已起平宋之本及議南伐而難大將又上言
非中書丞相安圖同知樞密布延兩人不可宋平又與
諮謀其新國圖任其降臣隨有兩王作難海隅當十五
年炎燼撲滅而公薨古以揆之晉羊祜首策平吳吳平
而身不及見樂毅有曰善作者不必善成蓋當其時自

明其身不終所事于燕惠數百年後猶能取必于祐今
焉不效于公歟四夫人惟王氏先公卒繼宋氏後公七
年卒公贈少師贈吳興郡夫人及國公魯與完顏氏李
氏皆從封魯國夫人後公三十四年完顏亦卒故三夫
人皆耐煒李出今中奉大夫河南北廉使其忠愿清慎
有克繼先烈之譽二女姊宋娣完顏出姊卒娣繼皆嫁
爲開府忠武公中子杞淮東肅政廉訪使妻皆卒孫尙
孩鳴乎燧生三歲而孤公卵翼之不知其蒙闇教督而
急其成俾粗有聞承乏翰林復世公官恐公事業不能

詳盡不敢干他詞臣故惟自述文不過華質不至俚而
摭其實焉耳矣銘曰惟天聰明視聽自民沃天子心啟
莫非臣舜察邇言昌言禹拜稱聖萬世臣何與在粵若
世祖方龍躍淵載率微車遐蒐逸賢卽輝起之爰置左
右授太子經事靡不叩公感一介盡其平生所學與之
傾敷悃誠書首八事修事以始賢親畏天愛民以次申
以世條揀弊之方施治所宜如紀在綱上總兵民公請
民去上受封國公擇地所上征南詔公陳邊劉上曰汝
言吾行優優展也神武操旣有要天下定一于時有兆

移兵戎邊首蜀尾淮免夫春秋剽殺去來汴置經畧秦
以宣撫三年其民歌舞樂土治效若斯公於之時一出
爲猷不無贊彌又從濟江內難方蹶帝過其歸大統入
繼移昔已試施諸萬方帝思舊人台袞用章公拜稽首
元良未建臣何力有太師顧先改爲大農尋拜左丞申
以責難書存可徵南土旣平諮謀新國昭文禁林必首
見及後聖相承言行其生沒爲法程諡以諱名旣又進
加功臣開府莫尊太師莫尊國魯哀榮若斯大書穹碑
比其生全千祀可賡

南京路總管張公墓誌銘

姚燧

公諱庭珍字國寶曾大考淵大考士明以武力再世爲
金千夫長家臨潢之全州考揖北京都轉運使故又加
北京公子次爲中子沉信易直通毅辦疆綜經緯史尤
長左氏春秋筮仕已存愛民利物志事先帝以典內帑
受知先是高句驪不請徙居海中江華島上遣使問何
由且訶其貳服親擇廷臣可者卽命公時年二十三至
其國王禮事之甚恭書言吾歲入幣大國未嘗不謹臣
職非與未臣而敵已臣而叛者比而大軍歲入邊虔劉

吾人民奴吾子女有吾貨財蹙吾土疆吾是以捨術而完險誠出甚不得已之謀非首鼠他圖爲也未疏黃金以兩計白金以鎰計各千百數爲壽又言誠以是懷懷之言歸聞之上幸止邊軍無歲入願歲幣外別人如今相壽者數歲歲爲謝公勃然曰王以天子之使求貨來耶揮去歸具道王言且保其國無他避掠徒耳上亦悟曰人歲入幣事之又加兵罪之誠何以待不臣而敵已臣而叛者詔令軍止戍邊無人掠自是完東夷室家父子無慮萬億計自將伐宋從至闔中留爲安撫使施治

兵間裹摩創殘外供仗糧不擾而集今上卽位中統建
元自將北伐以公先朝故臣熟西京入漠南路俾置傳
驛兼給餽餉至元四年授同僉吐蕃經畧使兵裁畔離
仁革狠頑渠酋讐撓滋久安順六年授朝列大夫佩金
符責貢安南時已徵天下兵數十萬圍襄陽實爲蹶宋
起本勲臣故相上與諮軍國謀不可一日離側者皆出
行省董師公至其國王立受詔公詰曰王行非止違命
于禮于利害且不熟知揆此邦人民土地不當天朝一
總管治皇帝不欲郡縣王地版籍王民聽其稱藩遣使

諭旨德至渥也且王以與宋輯睦緩急爲援今百萬之師長圍襄陽鳥飛路絕朝夕將拔席卷渡江覆其國都易如振槁王猶倔岸海徼恃爲唇齒自矜尊高事且上聞天威小震無煩遂召中國雲南十萬之師再月可至視邱墟王廟草棘王庭者將不難爲其審策之王屈降拜益慚憤將以兵恐公使力士白刃環衛公迺示怠弛袒寢一室盡擲所懸箭弓刀槩付衛士聽汝何爲天暑渴甚每取江水以進皆溫惡不可飲食及索井汲不許曰吾俗不相悅者多投毒井中殺人公曰自我所求毒

死不恨終汲飲食自是安南君臣多慶公者八年會公以安南貢至襄陽猶未拔卽授行省郎中承事勲貴巉絕不阿惟見之營衛足蹟不及其門商較事宜言宏色厲或有以凌驚見短者故右丞相史忠武公天澤解之曰是其爲心忠正侃侃人也久親其人必實吾言十年襄陽下改省爲行樞密院以勞選中順大夫遙知歸德府行院經歷大軍南歸渡江復行省公復郎中俄軍虎符襄陽路總管兼府尹毀城樓以完廟學散契軍以惜月廩剗弊施宜當其後先明年改監郢復二州位安撫

使上捐魚荻之賦使人厭腥食家給蒸薪月發食以贍
餓乏視便輒行事已劾聞十四年陞嘉議大夫監平江
路位總管上郢復民間去遮馬號送萬數其治平江考
績亦最他路十五年改同知浙東道宣慰使未行改大
司農卿丁內艱時軍興法間喪不得輒行乞犇赴不報
公願還所受制書爲民行省知不可奪歸之旋體楊然
金玉美女色色無有惟文書衣被而已今中書省右丞
相布延舊作伯顏
今正改夙嘗疑爲凌鷲者後顧爲深知公嘗
語人曰諸將渡江無不荒貪獨予與國寶清慎自持聞

者以爲知言公家居四年又終外艱十九年以才起復仍故官嘉議大夫南京路總管兼開封府尹至治之初見星而出見星而歸凡前政積事留獄旬月剖擿皆出尤善發奸伏有控鶴十餘輩比公至僦大第聚居二年黃金橫帶出入飲食街陌縱橫人謂其真也公曰控鶴役在京師久此不行必亂賊也密諭有司以意期三日盡致其黨索贖以來得金帛寶玉服玩典質券契盈室鞠之皆款服物則椎埋所獲妻妾僕使皆掠民子女或娼姬明日告曉市中皆杖死民駭其神捷閭境乏食已

聞未報輒止稅勿輸明年河北大旱民流徙就饒及河朔數萬人郡縣畏損戶罪謾以逃聞省部遣使分道邀之許發倉人給三月食還所籍民聚謀曰吾得食三月負難歸重難勝鬻將何噉且各賣質田廬而南至家何爲愁歎無聊若出一喙公謂其使曰斯民非賊河南非別界皆聖上民社也非不知奉命不輒濟可以無罪誠不忍老稚頓踣吾治甘受禍以活此民則下令諸津急濟果有以專行上告者事下御史大夫卽治廉之境民皆曰吾侯賢牧其爲開封明斷不阿可當今代包拯大

夫察其無他薄責而歸奏請不下秋雨潦河決原武泛
杞灌太康自京北東漭爲巨浸廣員千里昌垣敗屋人
畜流死公括商人漁子船百千艘又編木爲筏具糗糧
載吏離散四出往取避水升邱巢樹者所全活以口計
無慮百千水又齧京城入善利門波流市中晝夜董役
土薪木石盡力以與水鬪不少殺乃崩城堰之城害旣
弭復大發數縣民增外隄防分直爲三直役一月逃罰
作倍起陽武黑石東盡陳留張怒河綿亘百三十里如
斯三月隄防悉完以至元甲申七月二十日卒官舍年

五十六河南之民識與不識如喪其親戚家纔餘俸半
月將歸葬貧不能西開封市民雄財者戶贖之又遣子
弟數百人持錢分程具奠越別治洛陽五百里凡千里
及潼關以其年九月葬西安府咸寧縣洪同鄉少陵原
都運公塋之左夫人何氏溫淑靜端男子三人岳提舉
郢復魚湖崇西蜀行省宣使嵒未仕女子三人一適太
平州錄事韓和一適紀德信一適鞏思齊後三年其季
大中大夫諸蠻夷部宣慰使庭瑞以燧素知公求銘其
墓辭曰年五十六固不云天較齊耄耆孰謂壽考究其

致之豈無以然國苟有利棄身若捐東北雞林挈舟以
使西南雕題登馬已至視數萬里爲步似餘招麾兩王
喉臺指輿吐蕃獷悍化不犯令由積苦勞至不延命壽
也無稱世不爲臧死可有述短不害長襄陽軍謀郢復
民效已實已著猶其小小開封蠲租舟民于河電擊霆
馳懸躬禍羅下燭其忠由明后聖老幹經摧霜風逾勁
大浸稽天降舞龍蛇流死所餘邱木是家仍集舟航乃
筏以繼力求以濟取置平地穴陴摧防萬杵登登役不
踰時隱其阜陵民流他疆我飫其食我疆診傷皆手援

濁恂恂公哉人之騶虞彼饒婪婪橫目虎羆雖古循吏
列傳史冊載筆今功孰作爲匹少陵之原有坊其邱銘
石道周以禳諸幽

宜興州金谷峪靈峯禪寺碑

李泰

大哉佛之爲道也融冶二儀陶甄萬彙實而不有虛而
不無寂用一致物我皆如乘五行以兼濟會萬善以同
歸語其大雖聖人有所不至語其細雖匹夫有所能及
修于身可以冀聖施于政足以治民是以本寺開山住
持慈惠大禪師者海南波羅惠州人俗姓馮氏生而有

異髻亂之歲月覩天開顯耀殿閣及其辨李偶致天兵
宗族失所遂至朔漠乃慨然嘆曰年將弱冠俗務紛紛
豈爲究竟耶發憤遊學至霧靈山大護聖寺日覩峯巒
迴異勝境非常光暈五色夜現金燈久厭塵勞時將至
矣遂禮本山住持沖公菴主薙髮爲師訓以廣仁爲號
服勤旣久學亦優然乃杖錫遊方至宜興州車河川金
谷峪觀其山勢濶壑林泉乃秀麗增勝之地謂同袍曰
古者高尚之士莫不晦迹山林寄情邱壑以成其志所
以然者遠囂塵寂視聽遊心澹泊湛氣沖漠期于適道

而已蓋以境靜而神逸物擁而志亂此處吾可以居之
卽自誅茆結菴以禪爲務餘暇則伐榛剪棘舉下平高
厯經寒暑近四十餘年宏濟之心緇素歸仰廩有儲豐
伐木斲石顧工構殿像設觀音壁輝五彩後堂次成靈
顯閣五雲堂香積廊廡山門舉皆備足有霧靈山慶公
宗主者與師昆季之儔嘗謂衆曰金谷峪仁兄耆獨力
創寺額號靈峯恨無以嘉敬奉大元帝師法旨又奉大
王合旨永護山門仍給師號爲慈惠大禪師如來設教
急務者三一日坐禪二日誦經三日佐助衆事皆爲無

上菩提之因今師剏寺造像置田飯衆使衲子坐進其道一日殞空入覺其澤普被于含靈皆師之力耳師之願力欲以上酬佛祖之蔭端祝皇圖永固佛日恒明普及羣靈同圓種知豈小補哉師享壽七旬有六偶爾四大違和謂門資福誘等曰霧靈祖廣慶宗主願一見之汝爲我請公旣至乃曰此寺剏成艱辛不一汝盡知之吾行化後汝當旣意選能事僧爲其主領勿致頽毀辜我先心公乃然之屬其徒曰可以樹塔立石以旌師行其常住寺北莊產四至界畔刻之于碑陰不致堙沒門

徒福誘等不忘其屬託予爲記再三不已畧具梗概耳
隨爲銘曰人生而靜惟性之真感物而動日喪其淳情
闕日鑿漸流于惡彼雖枯亡不伐萌蘖故聖斯作垂教
于世爲道雖殊同底于治隄以戒防以遏其慾寧以定
室使不遠復緬彼海隅民質而愿非佛莫善非善莫勸
屹彼靈峯巍然峙雄力精德化剏成楚宮惟我仁者爰
寺于此託彼勝境爲國儲祉岑樓峻宇如山之崇其安
厥居篤道逾恭爰伐貞石刻之勲烈值之山河以永改
叔

承德府志卷五十二

藝文 五

賦

國朝

鬪鹿賦

履親王

時維八月序值三秋暑退

仙莊屆白露而光看湛湛涼生靈囿警蒼鹿而聲聽
呦呦隔蘭坂兮烟迷有呼必應下松岡兮雲羃獨
往何求牝牡交馳應各尋其匹偶氣機相感乃竟

視若仇讐嚮分類而異游茲隔羣而互哨欲諧仇
儷因先致其聲聞將效網繆冀共遵其號召勢雖
並立何妨賈勇以憑陵情在必爭豈故恃強而攻
剽突如以決勝負大似雙雄居然若保室家殊堪
一笑於是或深藏夫蒙翳或高據夫嶮巖豪斂相
誇常奮發而攘彼肆行自快遍籠絡以私其豎利
角以難攫意誠有待挺強項而易怒志在無遺以
逸待勞恐四方之尙多窺伺以寡敵衆嗟一戰之
未定安危始跂跂兮疾趨復鷺鷥兮小住蓄威未

逞奚殊磨厲以須銳志方韜反覺從容以素當轟
鼻而似嗅千山遙落腥風及瞠目而前迎萬樹橫
披薄霧計惟事夫并兼義不容夫返顧及其忽焉
相遇驀焉若驚如觸如蠻有洶洶難安之象患得
患失存多多益善之情毛戟張而蝟磔聲雷轉而
風鳴乍竦體而若矜銛鋒互抵遂舉頭而弗讓銑
刃交撐慣角勝以爭雄務當衝而挫敵養茸日久
又逢技癢之秋孳尾期臨轉奏戎掎之績方掩羣
而多獲得朋自樂崇林或羸角而紛逃走險寧辭

峭壁縱未若猘觸之入爻又何事雞鬪之須檄也
哉迺知嗜慾之性常開爭奪之端念蟋蟀之鳴階
每有心於爭長睹螳螂之怒轍還無故而自殘况
大欲之所存寧辭較力仰微情之攸託詎肯懷安
恐覆蕉之夢醒虞擇音之情闌今者寄跡丹邱呼
羣翠巖知時慕侶咸濯濯以懷

仁應候尋媒或德儻而近

輦惟我

皇父天毫體物開萬象于鴻濛

睿藻窮形識百昌之流行謹拜手而獻賦敢詡潘安仁射
雉之篇雖援筆以陳詞毋忘揚執戟雕蟲之辯

鬪鹿賦

質親王

維鬻鬻之角獸實充物於

梁騶有食苹之至樂無翳叢之遠憂以雌以雄旣招
徠乎儕伍或羣或友更攘攸夫匹儔是有爭心頗
異巨蚤之救居然雄長要非蠻觸之讐鬻夫茸以
陰萌銳因夏革枝格則銳可觸林末豐則堅能礪
石雖走險而不辭將忿爭而何惜故解角孕麕之

候數自相依而尋聲孳尾之時猜還生隙時則氣
清榆寒景霽

雲莊露初溽兮湛玉風頻爽兮吹商長楸蕭颯以寫
籟秋英薤靡以霏香當馬騰弓勁之時彼伎伎者
豈遑假息非豺祭鷹征之比卽甦甦也亦逞疆梁
聲氣兮相應材力兮相量入山徑之崎嶇何殊伏
莽踞密林之灌翳宛作爭場則見夫屹兩敵以爭
前轟八叉以相接試焉而近陡覺矜豪突如其來
何煩用謀氣全憑於一擊齒卽刀鉞弊奚待於投

戈角當矛鋏偶然小挫勢益倍其崢嶸豈有中休
勇猶賈其敏捷雜沓平陵之坂棲雀驚巢摧藏幽
蔚之墟喬林振葉殆勝負其將分乃踉蹌而少茶
蓋其始也恃靡厲之孤傑其繼也收衆夥之羣雌
羌勝一而獲百卽奪彼而益茲並無勞乎誘致徑
自快乎取攜獲地應機洵有擅場之樂倏來忽往
竟同掉鞅之奇彼夫鵲喜爭巢雞嗔伏穀鶉鶻奪
粟竦翼曾聞蟋蟀占窩先登罕購青林以擊場爲
戲尙借驍媒野人以由鹿爲長猶須設覆孰若此

三月御屏記 卷三十二
之不傷類以附人非發蹤而勇鬪思決勝以爭雄
恥狐疑而撓逗宜乎秉靈氣於瑤光樂蕃莩于

文囿也况夫棲遲芝徑飲啄蘭除友綺堦之馴鶴偕
銀沼之游魚當山輝川媚之辰殊看景洽況松翠
楓香之頃彌覺情舒閱天上之春秋助風光于

閩苑游壺中之日月邀

顧盼于仙居

皇父乃揆天章博物趨暢

冲襟拂毫素哨以類其情見人事之化裁鬪自率其性觀

天機之呈露無論爲靈爲蠢總原亭毒無私比諸
能躍能飛畧備

燕閔一顧

子臣

欣叨

扈從私摹繪于

前篇敬捧

瑤章增誦讀于

今賦

鬪鹿賦

儀親王

有鹿若逸民過龍沙田父而問曰於鑠哉吾

皇之允文允武也懿時巡以獮田兮率

武烈而由舊閱

萬幾之少閒兮灑

天藻以立就蓋

覽夫甦甦者求牡而嘯羣跂跂焉游牝而競鬪其結耦而
行也恣寢訛以娛嬉其作氣而前也奮犄角以用
救事擬于爭雄勢儕夫禦寇如是者固山虞之未
及詳而實圖經之未嘗究者也子盍爲我言之田
父曰諾若夫金序初殷乎八月兮秋蒐聿邇乎三

田般乎總總兮將踐于木蘭之囿休乎裔裔兮早
駐於

仙苑之巔歷垂屣兮神臯咀帖之控南樓西省也

河熱

古興州本唐奚王西省地
又遼之南樓亦在州北境

叢林澈兮鬱林穹邃之

蕃平仲君遷也其畜則麇麇麇麇麇麇麇麇攸伏
礪阿咸若來前速者超軼躔者迴旋乃或羣或友
孳尾而安焉于是屏玉仗披靈境瞻儻俟之在林
兮

乘吉驄而度嶺年呦鳴而求其友聲兮爰厲響而改其寧

靜豪奪者逞兼井之雄兮覬覦者昧強弱之等急
走險以逐逐兮勢相凌而不相並故其勃怒也氣
迅厲以撼叢薄其觸觸也聲猛獷而激寒颶其甘
心于折衝也何憂乎重耳之伏監其腦其致命于
春戈也何慮乎僑如之軾見夫眉挺角义兮無前
之迎去聲憤齧齟齬兮無後之隨一俯一仰兮觚隙
而動一縱一橫兮兼弱以欺已跋前而躓後猶中
乾而外強惟其懷失儷之是恥喜得偶之有光故
栖枝格撞捩繚緼振突以蹂躪乎叮嚀之場方且

厲飽噬於虎搏逞疾擊于鷹揚夫何鬻鬻之既羸
而壯往不已也何倔彜紆昔而踣復張也何酣爽
傑黠而柔敵剛也彼毘之鬪也如是是其釁也有
由其戕也自作徒爲決失得於么麼而豈知虞人
之不能暫忘也哉二老既退于是臣永璇跪而稱
曰憶往年之從狩幸長哨之稍知獲伊尼以恭

進向

穹廬而敬持

去年扈

駕木蘭子臣永璇

茲林中之鬪

于僧機圖圍哨獲一鹿恭進
獸愧物象之未窺有機斯應莫適而爲行遇貙劉

之候聿符鷲擊之期審化樞之變協驗角力之差
池仰繹

睿裁于茂育豈惟旁暨于鹿斯

鬪鹿賦

成親王

援神經以體物驗金方以瑞獸文斑斑以素綦質
皎皎以緗綢蹄四踣而交蹤角雙歧而戴脰狎挺
龍于中林散瑤光于崇岫採仙蒲而向溫結遐齡
而游園稟馴性而無猜紛和聲而相就感清商之
激揚始求麇而肆鬪於時蕭蕭漠野寥寥素雯寒

風晝厲白露宵淪上藹結凍榆塞澄氛貔虎闕其
攫搏鷗鷺迅其騰騫同摯猛于秋肅變和樂於春
溫矧麇麇之感氣豈羣友而引馴邂逅乎林麓衝
突乎陵原其始也據蒼巖而犝聚倡長哨而情通
恃強梁而挾耦恥矍索而無從旣矜多而妬衆又
攘敵以興戎其繼也捷蹄交赴挺角相攻剡戈轟
項堅鉞剗胸漲雄心而獨進鋌猛力而奚容蔑情
親于舊侶銳紵昔于新茸則有莽莽奔驅囂囂震
駭或憑怒而無前或蓄威而有待或側勢而偏乘

或迂途而巧給或驟捷而心驕或小挫而氣倍傑
儼營厲趯趯踰跨轆轤趨趨布濩蹠躡何竭何盈
甚矣其憊軒峯韞谷響撼崖嶸齧脰橫縱震雷揮
霍鳥警休巢狸惕屏壑于是濯濯濯折嶽嶽跂足
蹙斑毛剝戰勝者昂藏亡羣者落漠填餘勇而未
休振威稜而復作天地細縕萬物化醇凡有血氣
皆有爭心有觸藩之柔毳與莽羽之翰因苟婚媾
而非寇何干戈而日尋衡彼徐女之歸楚又夏姬
之適申儼烝人而尙鬪孰品物而能任諒同求而

異志亦何惑乎紛紜

聖王乃建鳳旆鳴龍騶觀畚廣野講武涼秋發軔于薊北
弭節于興州睇中原之麇麇聆聞館之呦呦慨羣
倫之險走閔人類之陰謀研瑰形以精繹揚麗藻
以冥搜偉休符而肆應綜大化而成周

鬪鹿賦

多羅貝勒永璣

伊沆漉之初寒喜新秋之巒岫

聖德日躋被勲華于文章

仁恩天包逮草木與禽獸塞山含崩芳林木標錦繡呦呦

鳴哨互爭化而汰豪強麋麋伊尼占高岡而逞狼
鬪懿此靈禽遊于

文囿丹楓之嘯兮護茲羣雌白雲之隈兮功歸獨奏
絕有力者爭之益多弱無能者失其所守因離反
合與接爲構題相抵兮山頽支相交兮輻輳或競
于邱陵或聚于林樹將籠所有于幽巖乃併其力
于孤嶼抵其角兮八義蓋所爭兮一侶于是節屆
中秋始就嚶啞聳查丫之角占孳尾之時決其勝
負恃其拄撐爲所敗者是走擇所勝者是隨如爭

穴之絡緯同爭啄之雄雞孳牲牲之子走攸攸之
麇緬生機之勃發合天地之端倪

秋塞大獵賦

并序

汪由敦

乾隆十有四年秋

皇帝獮狩于塞上七月初吉奉

皇太后鑾輿發軔於京師

諸皇子皆扈從經熱河抵木蘭蒙古王公額駙台吉

鱗集迎覲率衆簡精銳以從事于行圍三驅禮成

彌月旋軫

臣

叨侍

清蹕獲觀羽獵之盛竊伏思在昔上林長楊近屬畿甸之
內動稱殷天動地野盡山窮故或恐啟後葉之侈
靡或恐農民不得收歛此相如揚雄之徒所謂雍
容諷諭冀覺悟于一得也今獲生于今日仰觀我
皇清之繼迹垂統

聖天子之不揚光烈將必驟專失所舌撝而不能下臣才
孱不足揚厲

鴻休彰明其所以顧遭逢之幸不可以默謹獻賦曰歲在
屠維月惟夷則白精葢辰金官奉職

天子順時節而布令馬比物而士齊力七萃沈熿以前驅
招搖穆離而直北時則禾黍鋪菜嘉穀被隴蕤蕤
或或控控幪幪彌平疇而無際蔚雲合而濤湧一
莖九穗未足陳太史之瑞兮實穎實粟老農幾不
能名其種亘高原下隰而不可辨兮由郊圻以達
乎邊陲戒衛士之蹂躪引馴馬而避之紛萬寶之
在目雖野裒錦穀谷填瓊璣無足以喻其絢爛而
陸離宜

乘輿之按節而神治也爾乃厯黃圖經赤縣次離宮卽

行殿仍衛室之

前規安樸素而戒營繕覽古北之雄關朗天門之四扇襄
羊乎避暑之清都弭

翠華而息晏寥宇廓清露溥馬躑躑士桓桓林衡翹首而
待命典澤戒事而守官長矛萃縱迺卒澶漫

天子乃鞞唐夾而御腰褭星陳天行以幸木蘭伊並塞之
名王襲衣冠者累百奉湯沐而清肺腑荷

累朝之醲液仰

神武之健行震

天威之赫奕匪微發期會而奔走來庭會青城而有繹貢
飛黃而效賚驅虓虎而執役益以索倫狡騎期門
禁旅追風迅發開石飲羽按轡如怒控弦如舞左
旋右抽忽仰忽俯恒擇肉而命中苟橫驚其必取
爾乃申之以軍律聯之以編伍越重岡陵深阻超
澗壑輔榛栝衆屬目乎前旌肅進止其有序少焉
呼聲譟重圍合四纛馳千騎而首尾應遠近接驥
駢軫轉沸渭迨還封狼跳躑而竄突黃羊騰希而
競捷元熊睽暘而聳顧兔脫走而輕躡麋麋麋

磨之屬總總搏搏拄角交項踴跌而困懾乃抽荆
蒲彎

天弧麗龜決脰自膘達濶試應莖于壹發殪猛虎于負嵎
將以示

威容于替御肆僂佼于公徒故垤視嶄塊睨窄窠而未
嘗不範我之馳驅已乃他他藉藉充物周陔

命効獲之孔多命弛圍而舍諸符解網於天乙罔惠風於
騶虞聿計鮮而頌禽紛馳載而車輸夫乃知練戎
校武異夫從獸之爲娛也昭仁秩禮異夫竭澤而

不留其有餘也閒從掌故竊聞夫木蘭之所自焉
其地也南襟灤江北枕興安左控巴林右引奈曼
翁牛特喀喇沁諸蕃部之環繞而碁布者儼拱衛
于畿寰其山則酋率巖嶙截嶙嶺屹有宮有霍有
岌有岷龍從乎龍堆千疊之崇顛其水則汨澗澤
沸漫域瀆湏爲沮爲澤爲濫爲汎潛演乎羊腸白
折之迴川凡毛角蹄迤之儻儻俟俟者莫不蕃孳
衍息于其間木則樺靡留皮松仍落葉黃榆望秋
而飄霄丹楓經霜而眩暎其他交柯挺幹與夫蒙

茸蒼蕨者復蓼蒨而苳獵其陽則紫菊金蓮揚葩
含芬敷陸緣瀆其陰則嚴霜戕冰慘廩凌競白草
崩鬢蓋數百里之內旬日之中而氣候判乎不同
倏片雲兮散湧灑凍雨兮溶濛或密霰兮交加更
飛雹兮相攻菑畚不可冀其有穫井畝不可卽其
田功是以界以虎落殊其疆索匠氏不營司空弗
度殆扶輿融結之奧區故外藩不敢私有而以供
靈囿之表貉緬惟

聖祖之長駕遠馭荒高山於天作於鑠哉我

皇之紹休繩武拓戶牖于大漠撫列藩而浹之以霽洋咸
冕趨而雀躍且方今烽燧銷聲靈爚寶契革心候
尉謹約梯航琛賫肖翹咸若安可以履泰而忘危
懷安而示弱仰

聖蹟之孔彰煥

遺徽其如昨故不憚涉埃壚而席戎鞍冒風霜而勤旃幕
卽麟趾之振振且豫教習勞而恢之以雄畧不然
夫豈不知

九重之爲安而端拱之足樂也况夫奉

安輿侍左右日靡間于省覲佳辰屆而上

壽視膳給鮮以笑以侑至于

勅幾政披章奏先晨鐘而求衣遲歲蕤于夕漏通萬里于

指掌固八荒之在宥洵

王者之無外沙磧曾不殊于宮園更復

飛毫拈韻颺翔雲驟翩若游龍炳若綉繡雖游藝之餘閒

有以知

神功之日懋尙復進角觝而決勝張畫侯而志毅蓋

睿哲文明信

天縱而時敏而健行不息則純古之多益而單厚由是觀
之不闡

鴻模顯號也承觀

慈豫廣孝也垂裕少成至教也綏懷屏翰宏造也載績武
功要道也行慶頒賚優勞也一舉而諸善備焉此
其爲

聖天子之大獵而翰林子墨者流固不啻持螢爝而當曦
曜也頌曰廣甸膺膺

皇武履兮麇鹿麇麇紛若跂兮我士孔武猷以俟兮躬桓

藩輔執鞭弭兮式歌且舞惟

天子使兮湛露斯溥胥燕喜兮內訓外撫具衆美兮嗣服
仁祖先後一揆兮昭茲來許多受祉兮

哨鹿賦

并序

汪由敦

哨鹿蓋索綸舊俗惟精于獵者能之

聖祖仁皇帝妙解其術歲以白露之候晨興

親舉高年弗倦衆蒙古王公從獵者驚傳以爲神我

皇上行圍之次擇地數往且

御製賦述之雖未曾觀其事者讀焉不啻身歷而熟究也

非夫盡物之性察物之情而文足以達難顯之隱者孰能與於斯

臣承

命授簡踧蹌失措謹獻賦曰

偉中林之攸伏紛或羣而或友當白露之既溥候氣至而挾耦牡僮僮而游牝牝濯濯以求牡恒引脰以長鳴交應聲而疾走旣類別而區分儼畫疆而據守怵同儕之我先狂奔集而恐後蓄忿妬而狷疾貪無厭而廣取乘高驀其越岡就卑宛其在藪恃強焱捷以角逐迎合競進而膠糾爭前騰踏

以奮迅屢舉厲乃而抖擻揆厥聲之多變啣掀唇
而喏口曲者如語直者如詔長者如嘯遽者如吼
虞人以射獵爲耘耔老更事于歲久匪弋獲之爲
長契性靈而狎狙是以殫精竭思爲哨鹿之術焉
以坐致而巧誘也時則嚴寒襲肌濃霜沾衣月冉
冉而欲墮星耿耿而未稀邃谷闐其幽杳陽崖闕
其朝暉蒙茸藂密犖確徑微林無雨而雪雪草不
風而萋萋乃屏徒御卻驂駢弛夏服發忘歸象首
戴角反裘蒙皮三兩爲偶輕躡潛移禁聲斂跡伏

伺忘疲俄遠音之噉爾時迴出於烟霏爰舉長哨
匪笳匪角如倡如和忽徐忽數鼓中氣以散激縱
善辨其罔覺更順旨以頻易恍相招而諧樂斯排
突而徑前魁雄特之卓犖擢高足之伎伎御抗首
而橫恣冒先馳以矜長要衆雌而並至震疾叱以
驚卻瞪睥目而直視尙乘輿而顧戀鬱雄心於一
試昧深機之潛伏似喬鈎而貪餌斯時也伏草自
翳偃側若僵屏息傍睨察於微芒忖疾徐於遠邇
商分判于低昂神機割其雷駭立顛隕而同吭或

鞿鞞之小駒仍決起而踉蹌終犄角以就獲寧漏
網而遠颺羣匹駭其近散雜蹂撞而超驤苟趨疾
而旁驚羌遽引而披攘亦逃生而幸免釋逋竄于
窮荒應節度而巧合審爲樂之多方原夫聖人有
作利用畋漁網罟矰繳弧矢車徒冥氏穴氏山虞
澤虞蓋博取以備物獲三品而充厨亦順時而行
令匪耳目之爲娛至于鶴因媒而鍛羽雉應驍而
碎軀狡同類之傾詐宜仁者之弗圖豈若呈妙解
而捷得奏神伎於一呼旋首頽而臆仰灑毛血於

平蕪又何事騁驂騶于廣甸張羅畢于周陟信哉
物致其精術神於用勤弗辭勞動而皆中窮變態
於擇音釋覆蕉之箭夢補千古之闕文振

鴻篇而卑屈宋體至道以研幾懿五德之兼綜直

智勇之首出擅

多能於天縱貌侍臣之弁劣惟鞠脆而莊誦固不待獻司

原之良箴奏長楊之嘉頌

後哨鹿賦

汪由敦

曉漏沉山月小紅燈明束薪燎

天子方御紫獺乘腰裏出旌門兮透迤卽長薄兮深杳期
門伏飛之倫肩神鎗負象首鞭弭橐鞬奔走先後
聽隔嶺之呦鳴覓前山之羣友於時嚴霜未結山
霧初低谷風凜冽林靄淒迷識途信馬遵路緣蹄
觸響知石聞湍識溪百爾扈蹕鵠立遙俟乃有芻
蕘野夫躑躅而前曰蓋聞古帝王清道而行大昕
而出鸞旗在前傳警聲蹕展輪授綏動必以律僕
御戒嚴尙凜奔軼緊哨鹿之可娛羌無關於政術
顧乃披蒙茸踐齒峯熊羆所馮虎豹所窟搏噬直

前伏莽竊發負險咆哮乘人倉卒此賈山所由致
戒於馳獵而相如殷殷獻規於銜檠也諸大夫食
鼎鍾都貴仕旅進旅退曰俞曰唯借曰未知惜前
紀也知而不言秦越覩也若謂吾豈無心力不能
止退有後言持膝奉已遇茲

堯舜之君顧安忍出此乎時則庶尹常伯盱衡而言曰惡
乎何言之過也今夫泛江海者不以波濤之險而
迴橈登峻坂者不以要駕之虞而脫鞅何則智者
恒預防於先事而勇者必禦患於有備獨不聞掃

三才圖會卷之二十一 雜考 一十五

穴之神鎗固莫當之勳器乎復其開練條之趨騰
遽逡巡而卻避是為趨避也夫沙苑五花渥注汗血
弛法制其何以為治政者夫沙苑五花渥注汗血
越嶄絕以如砥捐重巒以為均邁空澗以奮迅過
蟻封而旋折縱送惟時疾徐按節記曰不躓于山
而躓于垤履康甃夫且致戒更何處乎窺其不蹉
臥且夫哨鹿之為技本索倫之舊俗陋習穿之周
章息長圍之馳逐飭同類之殊羣曼長聲以拊屬
遂尋響以斯奔將直前而立角蓋深啗其所忌而

倏乘其罔覺舉神械而命虔駭電發而颺速用明
智以坐獲懲驕妒而致戮苟取順而失禽弗窮追
而遠蹙譬意釣之忘竿豈夢求於蕉覆夫其指之
以類取之以義逸以待勞出其不意此克敵之長
計也判遲速於俄頃量低昂於分寸揆地形之遠
近究物理之利鈍此制事之大分也

聖哲必因時而熙績明主恒由舊而戒荒方今海宇寧謐
鞮譯梯航恩洽九宇風行萬方然而兜牟之士漸
已遠羈勒而親帑屐奮革之旅亦且鄙弧矢而慕

縹緗夫變古者勢趨於積弱而保泰者力矯於蹈
常此

聖主所爲撫時增惕兢兢焉率

祖制而振乾綱也願樂甘暴露而冒風霜也哉

夜亮木賦

汪由敦

戴斗之區擊壤之儔且耕且牧以蘇以頽暑雨旣
溽澤潦未收風霧蒙晦鳥道阻修堂密迴互榛薄
蛩蟻忽見夫光朗晶瑩璀璨洞明噓燄非紫揚輝
正清騰金蛇而未掣皚火樹之初熒豈傳薪之炯

炯將遺燎於星星爰躡蹠而俯拾煒灼爍而高擎
歸而詫其父老曰叟有覲於此者乎是何僊木之
降靈也時則龐眉三老攜杖彙趨聘貽懽於顧語
其徒曰於樂

山莊實惟天都紫昔

神堯在禘治軼華胥莫羨生茫蕙莆扇蔚朱明清暑駐此
奧溢山川畢獻其瑰異非木殫效其珍符聿有亮
木靡於山隅枝虬氣落然蔚特殊豈伐樹于撐輪
乍分月桂若浮槎而貫斗應掩星榆爰經

聖鑒麗製霞敷增輝緹縹垂比球圖懿我

皇之纘緒丕紹休于

烈祖臨玉塞以行秋厯長原而講武曰止曰時方壺懸圃

亶

天光之照臨雖朽木其作覩殆以供

清賞於幾餘勒

鴻篇於冊府也歟彼隋侯明月之珠田父夜光之璧上林

則鼂采碧琳西都則玫瑰降柏麗則麗矣終浮夸

而多僻又若瑤芝九光華蓋百影舍利現燈於浮

圖朱霞曜靈於丹井奇則奇矣亦丕誕之徒逞豈
如茲木太樸未散大椿靈冥莫知其算幸逃匠石
之斤且免中郎之爨雲蒸日暄精鑠氣鍊厥靈厥
瑩其輝有爛雖潛處于幽遐恒昭晰而達旦良積
久而自彰詎因人而始銜是宜灑金壺摛

宸翰攄藻采之陸離倬爲章於雲漢也聞者矍然而興曰
嘻歎方今

日月之華容光必照螢爝之微亦舒其曜棟梁采栴任各
得宜枯木之末亦且弗遺泯我知識順

帝之則慶斯木之遭逢允克彰夫

聖德

秋郊大獵賦

梁詩正

惟

聖作觀乃文乃武智勇天錫遠邁前古道洽化淳覃敷下

土繼志述事適追

皇祖緬惟

謨烈之垂於鑠蒐苗之舉乘農隙而詰戎兵厯周原而臨

津圃時巡經五十餘年賓服暨四十八部匪徒樂

乎從禽實以資乎講旅爾其寒蟲作語殘蟬咽鳴
域中氣爽塞上秋清開廣野而百里聳疊嶂之千
層露點山楓丹黃成幄潦收石澗清冽無聲草淺
獸肥則儻儻而俟俟風高馬健斯龐龐而駟駟撫
涼晨之方屆應令典之時行

天子邁簡爾卒徒卜焉允吉六師載陳

萬乘以出旌幟飛揚駢騏走軼循一逕以逶迤喜百昌之
茂實雄關瞻眺則馬上

賦詩廣陌詔諏則林間

駐驛戒金吾之漫警無害田禾

詔賦額之量蠲克知良恤遂乃縈紆沙磧攀陟龍嵒飈凌

百谷露隱三峴奮

一人之神武擁千衛之熊熊左右賢王負弓弩者從公子

邁渥注名產效服襄者我駕既同行聯雁翅勢總

鴻網森鶴鷺陳之圖法嚴赤白羽之軍容綺霞輝

色陵日臨空將越桓於七萃訖聲教而四通則見

夫野豕連羣黃羊彌陸雉兔星流麇麇波屬始則

環林箐以成圍繼乃驟岡巒而爭逐任駭獸之馳

奔臨

至尊而懾伏惟時我

皇佩烏號挾夏服澤射麋林卽鹿蹂躪封豨捎接鸞鷲鷹
逞攫拏盧供呼蹴風翎掣耳霜鋒睽目奔莽叢搖
飛鳥頸縮看一發之威張仍三驅之澤渥受殪者
流血朱殷逸圍者驚魂殼殼用循狩野之文藉供
登俎之內陋上林於漢武啜七澤於周穆於是大
綏罷抗上殺紛馱計鮮數獸牲牲孔多兩牡之從
莫比三狐之獲奚過

特賞聿酬平虎旅餘恩兼逮夫鸞坡刀割火燔鱗次駢羅

厥儀以備其禮則那此

聖主載覲

耿光非侈雄風之賦而從臣欣傳盛事欲廣吉日之歌者

也夫

聖烈克善繼繩

大孝尤垂永久有事武功敬求

文母黍禾低拂扶輦腔間幕殿高張問

安門右升幔城而怡

色笑既豫以康視御膳而進肥鮮維旨且有方閱秋中再
經重九受琛有艾納之香介壽薦菊花之酒雖大
漠其偶臨徵

尊養之彌厚臣職司橐筆行效服裝數奉清塵於

豹尾獲瞻

偉績於龍驤力乏策鞭彌慙短馭才非作賦雅慕長楊不
諳釋氏之經未嘗止殺曾讀相如之疏頗鑒垂堂
竊綢繆於未雨願儆戒乎作荒凜登危之明誠懷
御朽之良方永爲後式迪惟

前光歌曰時蒐畋兮奉祭祀戒不虞兮習戎矢考舊典兮

禮經煥新猷兮

天子仰

丕烈之於昭兮奉

慈顏之有喜涼風戒塗兮

法駕北指雲罕兮輕移塞垣兮戾止羽林夾扈兮連鑣番

部來同兮結軌大圍兮周環沿谿谷兮邐迤屹如

山兮逝如水百獸匿兮深林裏月弓星斲兮惟

君之使落飛鳶兮殪大兕法湯仁兮網乃弛大庖充兮娛

慈寧旌門錫兮勞將士簡軍實兮柔遠邇苞桑永固兮干

萬紀

秋郊大獵賦

以天人同澤上下交歡為韻有序

錢陳羣

是歲八月十日己酉

上閱武行至準烏拉代地方道右之圍既合

車駕詣行宮有

旨明日駐驛于此修道左圍及晨

上乘馬出宮門從官之執事圍中者咸先期儲侍臣與大

學士

臣

查郎阿等侍立門右仰瞻

雲日霽色順時魚須之旆旣導雕玉之輿旣隨行未數里

遣侍郎臣傅恒傳

諭臣等綴筆爲賦以紀斯典臣惟大閱載于春秋教田垂

于月合周宣內修政事外攘夷翟復文武之境土
會諸侯于東都以講武事其時詩人爲之賦車攻
賦吉日以書其美弧矢以來茲爲近古後世子虛
上林羽獵諸篇鋪陳迺實君子譏之他若華林之
舉非其時元武之局于其地庾信張說捨擗揚厲
亦無取焉我

皇上法

祖勤民興仁興孝恩澤所覃沾溉庶類乃以安不忘危有
備無患四年冬舉大閱禮六年秋修大獵事八年
幸盛京恭謁

三陵蠲租賜赦進從官階一級中外震疊歌咏明盛今年
七月下澣恭奉

慈闈復修田事凡行圍所過之地皆

聖祖當日三至五至之區塞農野老林立道旁得睹

天顏無異爲兒童時仰覲

神堯也而番部名王之率衆來迎者亦相望于途維時山

川效靈風雨和會

臣

陳羣備員

禁近得隨

輦路末行旃帳濡豪不文是慙謹拜手稽首而作賦曰

收乘令少皞司天禱申房伯道指燕然選車徒者

數萬號賁育者三千揚

祖烈于龍沙平移華蓋奉

慈顏于黃屋廣列細旃肅馬政以訓五戎旣成旣好遵秋

原以瞻百穀實粟實堅下令師中禁蹂躪于長路

沛恩畿近賜田租之半年夜雨知時潤庶草而征
衣不濕秋山入畫罨衆卉而鈴旆自妍于時鑰鎖
元戎屏息凜節穹廬君長抗手獻珍負弓弩者備
東樓之裔通膏沐者列西籬之賓拖豨之矛非假
淬而後利射熊之館不待移而自陳規延袤以星
羅路方千有餘里偁爽塏以枹列圍設一十五巡
肅愼悉暈重圓聖乎又縱烏號自呈滿月天也非
人于是入部分行視前旌以爲導兩翼競進拱大
纛而居中人影環山揮袂雲連黻黼馬蹄踏草風

來香染芎藭匝鷹窠之干嶺審風跡于三峽洵無
幽而不入亦靡奧之弗通凡茲輕鳥道而用命者
莫不因田事而抒忠則見驚羣影獸窟不能營挂
增文禽木不能擇鹿麋麋而緣岡兔爰爰而越陌
黃羊之起殷殷斑雉之飛彳亍狐失冰聽豹迷霧
澤狼雖顧而離披熊欲申而狼藉虓虎迎

天弧以就殲大兕嬰地羅以自搯或迸石而墜崖或獲雙
于射隻縱突圍其延喘終魄褫而神虢爾其角力
既適於羣材獻絕復及於衆養鞞官遞嗾天狗淨

瓘奚奴指頤海青迅往隼脫鞬而奮擊犬帶鈴而
直上小試則似石壓卵大受則如獅搏象中必要
害來必恟况乍騰發于雲間仍馴伏於

御仗况夫德稱于駟力優于馬獸多若陵亘禽墮如雨下
實既登籍矢猶盈把按轡于峩嶲之峯馳驟于廣
莫之野于以見軍旅之止齊而餘勇之可賈也衆
志懌矣

皇情寫矣召墨卿而灑翰何揚風而挖雅爰整七校爰建
長旂序涉涼候歷徧秋郊解湯網之恢廓筮顯比

之象爻簡左牒之上等進

慈寧之嘉肴貴胄公孤頌以肥脆羽林鷓鷩逮以燔炮豈
惟示雨露之均亦以定上下之交是役也發輒流
火迴軫初寒深谷長松迢遞盡乎遼土鐵漿芹菜
館舍覽夫契丹應氣而行鉅典撫景而得大觀示
禦攘課繕完威武耀磐石安惟

德車之遠馭占玉衡之長端賦成紀實歌以志歡歌曰於
鑠

皇旅則時邁兮仁育義正敷天對兮

祖烈重光威無外兮日未靡旃無已太兮又歌曰率左右
兮從羣醜還

宸居兮薦嘉占

天祿申兮昭受式下武兮

萬壽

秋郊大獵賦 并序

劉 綸

臣聞三田詳于王制匪止充庖四隙載自周官爰
勤講武故大閱以義舉大蒐以禮行俾步化示我
行間而風聲貽諸逃聽六師繇茲有赫七德職是

無虧往牒彌文意同一揆伏見

皇帝陛下光宅海寓文武兼資湛恩龐鴻中外蒙福懿惟
祖宗時巡率狩永肩在今咨彼徼荒鱗集仰流內面亦久

迺以乾隆十有四年秋七月戒廬人鳩禁旅交獵

于木蘭由啟塗訖葳事茂典修濃化浹愉愉乎勿

勿乎昭晻之氣通歛誦之音作矣臣菰蘆下走承

跡屬車瞻望清塵退而竊忭不揣禱昧輒受簡以

為之賦目尚迷夫鼯鼠敢云句擬子雲心冀識夫

騶虞或且啜同曼倩焉爾

拊興桓以北睇臻穆納以南職太行緣陲而竦嶂
灤水絕漠而增波六扇關門塞日射丸泥之谷一
圍天幕邊風清勅勒之歌首塗則十二軌方繪秋
原子指掌奉引則三千迺卒圍

法駕以駢羅是時也蓐收告辰大丙陪位雷轉磨斑雲捎
罕翠遺人充其膺儲掌舍操其桓陛

離宮表記里之鼓九堊垣墉

馳道消甌脫之偵一家尉吏古卉服而穹居今雲宿
而露積蓋別部星萃周廬櫛比廣場郵置陶陶遂

遂以待

天子之所有事爾其昭燾昭回莽叢洞開橫襟雁積高枕
龍堆長陸粲粲其垂蟠儀鎗轟轟其轉魁

命大章豎亥之侶程翹關超距之材而止止而行行盲乎
如陽施陰設儼一燾之綰中台也曰左左曰右右
趨乎若箕張翼舒俄雙旌之紉外迴也羌葩列以
茅斑又轅轅而輻輳玦抱珥而環循綱引維而目
就閣閉大壑臆梯接而幢懸齒萃重崖晞人寸而
馬豆于是夏箴抽烏號鼓發縱齊

指麾授快得雋於一呼矧疊雙乎多又乍獠睽以鷹麟
穿腋以刺脰突圍趨起下折角乎犀兕麋麋失穴
離縱上縮跋乎跼蹙猱狄洵不媒而不囿竟何飛
而何走

皇帝迺出和門遵靈囿奉

大安上

慈壽祝湯網斟堯酌則有蕃封君長庭實多儀
頌禽壓案行酒捧匱舂鞫鞠蹙而儼辭昔也荷
皇祖之龍光今焉陪

聖孫之燕私躐三驅于大甸嫺九伐之闕規况親覩巴子
蠶叢之式化會不煩寸纓尺組以靡之又奚埃哆
五柝于漢賦捫十鼓于周詩然後筮師貞而思羣
策圖王會以誌招攜哉謹拜手稽首系之頌曰天
山窿窿塞草廕廕有若馳峯碣磴摺挂有若羊腸
洞泐袞豎

皇帝臨汝如闔外戶金風旣牖

玉趾斯舉員獵員游山祇蹈舞足足般般四靈爲府闔平
至仁皇矣

大武武纘厥

緒仁篤其祐元會萬億登三成五

哨鹿賦

劉綸

皇帝幸上塞修時畋五戎燁七萃闕三扈表禽二虞獻豸
別有守大羅氏之職者以致鹿告擢綏請前厥制
不畧不阱匪蹠匪筌從其類乎神以茲而全者托
于音矣哨可得而傳焉方其未之哨也瞰眾巋伺
叢薄測卉泉闕聚落爲町爲疇旣登場以目營或
迄或夙爰逐跡而臆度良有合乎師行之外謀旁

偵而豫紆夫卷甲銜枚之勝畧至夫白藏露塗青
女霜鋪啟明東耿胸影西晡設宵田之燿火殊夜
獵之戴氈時其簡練比其耦俱太人占之卽鹿無
虞於是坂緣九折隊麗三伍旅屯于郛銳架其阻
聯絡聲援若偃若僂若肱若膂又不翅營陳之六
伐七伐五步七步駢比乎散伏而蹴部也其貌之
則皮其冠也角之芟然首之斑然奚取乎中黃朱
鬣之植髮如竿也其召之則木斯竅也抑之窅然
抗之噉然無需乎淘河鳥脛之大號而小號也當

斯之時密利迦邏踳躄求牡俟俟游牝祈祈
馘谷聲之相答宛命匹而要之退不于乎如遺進
蹙蹙乎如疑恍同同而睥睨訝異異而詆謔彼跚
然其獸舞紛胡爲乎來思此闖然其人立聘不知
夫所爲於焉呼急鎗捫列宿會若連襪解若脫胄
趣後車選徒而舉齒信

天弓不虛夫先穀儻銅牌之可識昨者憶釋網於

帝圍或芝草之能銜今也願捧觴爲

慈壽迺復有司衡之佐典澤之儔希光道周爰諮爰諏進

而稱曰蓋聞至人寓物造化神謀故叩或驢負雉
或媒求意釣者時忘其魚入羣者不驚其鷗苟有
氣乎斯應豈於林乎是接凡天降與地出寧盡縹
以窮鞫方今

聖天子德化醴粹彌洽滢陬庶彙由庚咸和咸柔詎惟在
囿者感姬文而攸伏居山者際重華而與遊也哉

上乃搞天藻

勅展載羅訓典陸雕績

皇綱帝紘囊括乎園內雖有馬鄭專家鄒枚齊輩隸事罕

習卮言失槩未效江陵射者之吹竊陋畝邱封人之對莫不据觚緘喙操牘汗背遷延而辭退

哨鹿賦

并序

于敏中

皇帝臨御以來海宇乂安羣生茂育殊方別區沐

德化而擔威稜者莫不陸讐水慄奔走內附乃履盛惕若

逸不忘勞歲以秋八月蒐于塞上繼繩

祖武有事于哨鹿順時應機卽小喻大義宏且遠爰弭

武帳濡翰抒藻

親製前後哨鹿賦翁若璧合粲然錦襄長言載賡纖悉具

舉美哉洋洋乎天地之大文古今之能事備矣彼
相如賦上林揚雄賦長楊詞夸意騁固瓌瓌不足
稱媿若射雉一賦體物繪情亦可謂擬諸其形容
矣而義囿于文莫能籠函萬有以方

聖製殆猶瓦缶黃鐘難以儕響者也小臣無似承

命給札神惴汗惶不知所云退而齋心殫思積時累日忘
弁鄙之愚誌賡颺之榮譽諸燭火思附光太陽而
蛙黽妄依聲天籟也敬拜手稽首而獻賦曰

蓋聞哨鹿之爲制也實權輿於索倫匪角方以闕

捷弗詭遇以揜羣酌劑乎仁義衷度乎屈伸離合
盡態翕闢互根其動也無端其致也不紛占卽鹿
之無虞厥功媿乎至神猗歟

聖祖爰躬爰親我

后是則纘茲武功

叶

練吉日撰良辰肅周徼戒虞人曳羽

罕靡雲旗

叶

清道按列天行星隙駢衍陸離迺

葭止乎木蘭其爲地也沃莖千里連山逶迤棗業第鬱嶽

崑嵒礧周表包絡以界乎左右

叶

邈給訝之中豁

峙儲胥與槍纍豐彼圃草芊綿猗靡帶以羊腸之

河阻以伊遜之水峻者如削平者如砥曲者窈繚

曠者哆侈聘覽矚於巖原渺不知其遠近叶是蓋

天闢神壤隩衍豐美廣陪漢苑樂均靈囿叶無事

設以周法而足供三田植旌抗綏之所叶若此故

其地乃可喜也爾其磅礴鬱積物產斯聚毛羣羽

族穴藏谷處禽經不暇載獸簿不及舉彼伊尼之

蕃息更日孳而歲廣叶有麇有麇有麇有麇判彼

麇麇差其麇麇叶牲牲跂跂儻儻麇麇七星八歧

雙頭一角殊形而詭狀者蓋不能以更僕數爾乃

白藏屆商風引露旣降木葉墮乳字以時匪靈伊
蠢紛其求牡習焉遊牝旣挾偶以兼羣遂分圻而
畫畛逞曉健以自衛儼環角而植吻或寢或訛或
馴或踏忘他族之實備選同類之相近彼孱弱者
逡巡聘盼已望形而心倪而桀雄者據守夫澤中
方且睥睨旁睽畜趨猛而餘忿故得因勢施巧乘
閒度情攻其無備奪其必爭伊濯濯之與居信呦
呦而善鳴爰制器以象之乃能疾徐進退宛轉而
相迎匪笳而淒匪笛而清脛無取乎洵河管弗效

乎簧笙把宮彈角翕焉中音叶是則哨之爲用所

以握勝而操羸也於時清霜慄慄宿烟蒼莽朧影

西流啟明東上巖韜影以晚峻野合曙而曠曠迺

簡徒御屏衛仗星廬拱和門敞七校靜六轡聘叶玃鐙絕

列以雙導羽騎圉分而特張叶前驅後扈或三或

兩枚肅無譁鈴鼓無響驟蹀躞以相羊於焉望崖

嶺而邁往爰荷長哨被短衣其裘則獺其冠則皮

載以象首出諸篋筍綴毛體之般般聳义角以鬻

鬻擊彼叮嚙挂茲蒼翳始護伏以密伺徐跋張而

仰闕既儲精於聞寂奮先聲以出奇虞原獸之罕
至因舉哨以宣之臂引則響集吻吮則音移噉然
而高竊然而微餘嚙嚙嚙如倡斯隨啾啾紆鬱若
距若追嘹如引吭噓如鼓頤懾狡黠於幽遐應友
聲而是求叶 彳亍旁徨睚盱錯愕將前忽却既進
復沮魂悚悚以狼狽心猓猓而猶豫懼羣匹之或
失矯長鳴以捍禦恣狼戾而獷狻突生猜而觸妬
乍凝聽以曲睨旋擢身而思赴鬱狂迸而陸梁恃
角搶與題注狡焉願鬪警爾相遇斯時也厭躡深

潛屏息矚顧不震不撓不徐不遽迨心煩而伎僂
始悚立以騰奏叶倏脫帽以呈形忽應叱而少住
翳喬桀之殊才遂乃脈脈狃狃子規瞪眙而不能
去於是釋哨具進神鎗規分剗測豪芒心平視審
手正機張奮駢聲激流光繞繞煜煜霆擊雷轟
瞥電火之一掣已中鵠而洞腸或小創之蹶起俄
應聲而復僵亦有去如脫兔駭若驚麀或挺而驚
或怯而廷或芻霍以焮迅或蹙竦以霧藏擗捻躍
而盤辟若負固而不自量準鯨牙之軒轅又無不

殫于廣莫之場至若或騰或倚或羣或友掉而未
來逐之輒走緬驚怖以卻步尙倏眇而抗首膽劣
目眴足蹠跡夙遽聞聲而逋竄莽凌躡而相蹂固
縱之而弗追亦舍旃而弗誘掩不計多獲不厭少
叶失也其常得也其偶斯蓋仁者之事君子所取
又何必畢弋彌谷尉置蔽藪前遮後躡徼虬屬軌
叶他他藉藉乃爲備物而咸有哉既而

皇情洽恩澤宣弭節乎神臯儲與乎皮軒乃論上射乃擇
左肩登於大庖以炙以燔嘗其旨否進諸

大安割鮮染輪野饗從官升觴既酬羣情悅懽咸避席擎

拳鞠脰而頌曰允矣

聖人如天之好生 叶 遊非樂乎耽盤義固準夫秋獮欲左

者左欲右者右有殷湯祝網之仁焉舍逆取順失

禽不誠有周文三驅之訓 叶 焉信乎美善莫得而

形容徵引無藉乎更端者矣矧 愚臣 之孱弱徒授

簡而拘牽臧存忝乎執戟力不勝夫控弦目未睹

秋田之盛身未習講武之班驟與語夫哨鹿等捫

燭而扣槃竊幸蹈詠

奎藻紬繹鴻篇庶聳曠之一振聆鐘簞之在縣縱極揣摩
窺測雍容揄揚曾未能得其涯涘又何足補於邱
山也哉

承德府志卷五十二

承德府志卷五十三

藝文六

詩

宋

奉使契丹道中五言長韻

歐陽修

初旭瑞霞烘都門祖帳供親持使者節曉出大明宮城
闕青烟起樓臺白霧中繡鞵騎躍躍貂袖紫濛濛朔野
驚飈慘邊城畫角雄過橋分一水回首羨孤鴻地里山
川隔天文日月同兒童能走馬婦女亦腰弓度險行愁

失盤高路欲窮山深聞喚鹿林黑自生風松壑寒逾響
冰溪咽復通望平愁驛迴野曠覺天穹駿足來山北輕
禽出海東合圍飛走盡移帳水泉空講信鄰方睦尊賢
禮亦隆斫冰燒酒赤凍鱸縷霜紅白草經春在黃沙盡
日蒙新年風清長歸路雪初融祇事須彊力嗟予乃病
翁深慙漢蘇武歸國不論功

逢范景仁李審言二諫議

劉 敞

怪來原隰滿光華不意相從天一涯久別崇班情未易
少留傾蓋日空斜山連木葉千峯雪地逼龍城萬里沙

深愧壯心輕遠適自嫌憔悴聽悲笳

春陰

朱弁

關河迢遞遶黃沙慘慘陰風塞柳斜
花帶露寒無戲蝶草連雲暗有藏鴉
詩窮莫寫愁如海酒薄難將夢到家
絕域東風竟何事祇應催我鬢邊華

遼

玉石觀音像唱和詩

僧智闕

見說曾爲上馬臺堪嗟當日太輕哉
固將積歲舊凡石又向斯辰刻聖胎
月面渾從毗首出山儀儼似普陀來

願同無用恒有用不譬莊言木鴈材
方池波面躡花臺瞻奉無非唱善哉外現熙怡慈作相
內含溫潤玉爲胎刻雕數向生前就接救專期沒後來
故我至誠無倒意三年用盡兩重材

鄭若愚

文殊臺對普賢臺飾寶塗金卽衆哉聖帝特鎔銀作像
高人又選玉成胎端嚴然自工鑄出光彩俱從星化來
因此道元功德就給孤園內一全材

韓資讓

貞珉未用似湮埋選造觀音衆快哉募匠俄鐫大士相
成形不自凡夫胎琳琅光彩院中滿冰雪威儀天上來
珍重吾師能鑿物從今免屈非常材

趙廷睦

觀音神力不思議舉世歸依頗異哉人各爭奇金作像
工多銜巧木爲胎積年棄石嗟誰顧今日逢師入用來
但蘊貞堅潔白德宏材未見作遺材

梁 援

七尺仙容立殿臺鐫奇鏤異最優哉模將竺域佛爲像

天在月元
卷三十三
三
琢破崑峯石作胎妙相化身從地出慈尊移步下天來
向非師智巧經度誰識藍田舊玉材

趙長敬

昔年避地別燕臺今日因人信美哉貞性果奇成妙相
眸容元不降凡胎燒殘灰劫無凋朽拂盡銖衣任往來
二像端嚴傳萬世法門師匠肯遺材

馬俊

天慶寺前一片石造成觀音神在哉八萬由旬妙高骨
三千世界明月胎潛救衆生苦惱去默傳諸佛心印來

十首新詩讚功德等閑難繼貫休材

劉 瓌

久遺真石混纖埃二像特鐫事卓哉
順俗慈悲須假相出塵神力亦非胎
紹名早授昔師記救苦分臨末世來
蓋世性堅無變易會逢高鑒豈淹材

史仲愛

遺脫貞珉在地臺高人識辦事奇哉
造成補洛山中像不假靡耶腹內胎
種種形容何處現巍巍神力此中來
荒吟讚頌陪諸彥輕重纖莖擅巨材

曲正夫

塵埋雨漬近樓臺
久棄通街亦命哉
今日方成白玉像
昔年誰議紫金胎
人存果驗功須濟
物極終知泰
自來元自御
碑當未建四分材
內一分材

王執中

堅珉刻像降蓬臺
敬禮瞻容睟美哉
救難龍魚鬼與火
度生卵濕化兼胎
侍多諸佛未聞兒
善應諸方無去來
足表英雄心匠力
隨根通變不遺材

闕

光

玉像鑄成置寶臺威嚴神在漢奇哉身披雪氎凝山峯
眉放虹光剖月胎相好盡疑如化出慈悲重爲度生來
向非大士垂精鑒應被凡工作礎材

王仲闕

窅雲披霧下峯臺歲久還逢藻鑿哉相爲應根方有像
性因絕垢自無胎琢磨迥出三身外具足非從一日來
萬法皆山人卽顯空門觸物願同材

孟初

瑞毫輝映紫金臺鑽石尊容煥赫哉山卷碧雲呈玉骨

水搖白月晃珠胎一枝楊柳光嚴住百寶蓮花影像來
珍重吾師承道蔭義林高聳豫章材

張 識

夔峯久劖滯留臺塵履方能遇鑒哉應手刻成白玉像
化身免托子宮胎初疑入夢補隨去又訝隨緣震旦來
從此睟容日瞻仰億年不朽表良材

楊滌瑕

誰認昏蒙明鏡臺吾師智見大雄哉偶窺片石非凡相
特命良工刻聖胎救苦盡隨威力去欲求必應願心來

從前高士有多少不識白山一分材

李師範

相親巍巍佛力栽立承瞻奉亦時哉誰知韞玉貞願償
自是觀音應現胎天慶門前遺舊隱補陀山內恰新來
幽巖此石知多少不遇知人是不材

李闕

和雲巨石拔沉埋鐫作觀音闕二哉營自師心分異體

出由山腹闕二胎端寔相在生羣喜堅固身存闕二來

遭遇若非大闕三材

藝文

張闕

何代何年棄此臺因人得用闕二哉他山原作錯雲在

今日翻成闕二胎只見威儀隨相現不知示闕三來

若非早入名師眼猶被塵埃闕二材

寇闕

誰刻貞珉在寶臺威神之相闕二哉補陀山下白云骨

極樂天中闕二胎能遣衆生憂患去可合千種闕二象

十篇所贊神通力方見吾師闕二材

張嶠

青松影畔昔爲臺大器今方闕二哉拂盡暗塵披素質

鑿開諸相闕二胎圓明獨對靈珠現溫潤常含闕二來

歷劫定隨宏誓在吾師能用闕二材

韓汝礪

御運當時自隗臺豐碑餘剩闕二哉得逢大智鐫成像

益表中心闕二胎塵骨亂隨金鑿去珠光新入闕二來

已聞紀社招吟客盡是皇朝闕二材

僧善闕

巍然獨立絕纖埃相好奇哉復闕哉因覩工移珉作像

方知凡與聖

闕

胎垂恩未省懷悲喜救苦何曾覺

闕

來

三字
闕

材

僧性

闕

神姿刷就置層臺儼雅威靈衆異哉實智已圓于劫相

權儀不

闕

四生胎用興體密復還往定闊悲深去又來

積歲未成英匠別也當遺夢曲

闕

材

僧性覺

枕道常爲避暑臺偶然易質大驚哉鑄成月面舒蟾魄
斷就珠臺露蚌胎龍岳應緣期日往鳳都乘運出塵來

若非英鑒能如此千載湮沉謂不材

案像及詩碑俱在今建昌縣境卧佛洞下四里許
字迹模糊字不可識 欽定志錄其可辨者
二十六首闕數字者存之謂語多未工因
遼詩流傳絕少取備一代篇章今遵錄之

金

春水行

趙秉文

先春宮外春水生鴛鴦飛下寒猶輕綠衣探使一鞭信
春風寫入鳴鞘聲龍旗曉日迎天仗小隊長圍圍月樣
忽聞疊鼓一聲飛輕紋觸破桃花浪內家最愛海東青
錦鞬掣臂翻青冥晴空一擊雪花墮連延十里風毛靡

初得頭鷲誇得雋一騎星馳薦陵寢歎聲沸入萬年鷲
瓊毛傲上千官髻不才無力答湯春羞作長楊侍從臣
閒與老農歌帝力歡呼一曲太平人

扈從行

馬翩翩車轆轤塵土難分真面目年年扈從春水行裁
桑春彩波漾綠綠鞵珠勒大羽箭少年將軍面如玉車
中卜知野鳴匣遙認飛塵郎馬足朝隨鼓聲起暮逐旗
尾宿樂事從今相繼躡聖皇歲歲萬幾暇春水圍鷲秋
射鹿

做郎士元寶刀塞下兒

長安俠少年白馬黃金鞭
侈騎捧長劍官儀如殿前
烟塵生絕塞烽火照甘泉
如聞辭第將遺貌上凌烟

金蓮川

一色天連王氣中離宮風月滿
雲龍向來菡萏香銷盡
何許薔薇露染濃秋水明邊
羅襪步夕陽低處紫金容
長楊獵罷回天仗萬燭煌煌下翠峯

松山道中

松漠三百里飄然一日中山長
雲不斷地迴雪無窮遠

嶺貪殘照深林野晚風烟村一迥首獨鶴下晴空

達北京

小車日日灑征塵卧卽看書坐欠伸露宿風餐二千里
青山無處不隨人

龍山怪松

自笑書生骨相弱倒騎驢看兩三峯天東稍喜無碑讀
踏雪還來看怪松

北都雪望

千山雪盡出樵車一徑雲移去似蛇小屋平頭墟落裏

炊烟起處自人家

北都小雪

邊城小雪試年華
烟冷貔貅十萬家
探使不來人半醉
將軍氈帳卓平沙

中京遇因長老

李之翰

天涯流落偶生還
古刹相逢語夜闌
歎我歸途千里遠
喜君禪榻一身安
松聲不斷風吟細
月影無邊路氣寒
分手山堂更寥索
冷雲衰草伴征鞍

霽川道中

蔡珪

扇底無殘暑西風日夕佳雲山藏客路烟樹記人家小
渡一聲橈斷霞千點雅詩成鞍馬上不覺在天涯

送李天英下第

周昂

不須寂寞恨東歸洗眼三年看一飛試捲波瀾入毫穎
莫教歐九識劉幾

送李經

李純甫

尋張元是人中雄喜如俊鶻盤秋空怒如怪獸拔古松
老我不敢要其鋒更著短馬時緩頰得囊無底眼如月
斫頭不厲面如鐵一說未窮復一說勸敵相扼已錚錚

二豪同軍又連衡屏山直欲把降旌不意人間有阿經
阿經環奇天下士筆頭風雨三千字醉倒謫仙元不死
時借奇兵攻二子縱飲高歌燕市中相士一笑生春風
人憎鬼妬愁天公經奪吾弟還遼東短周醉別默無語
聶張亦作衝冠怒阿經老淚如秋雨只有屏山拔劍舞
拔劍舞擊劍欲人非庚鹿將如何秋天萬里一明月西
風吹夢飛關河此心耿耿軒轅鏡底用兒女肩相摩有
智無智三十里眉睫之間見吾弟

張謂伯玉
周謂晦之

寄李天英

高憲

稻結蒼蒼陂已枯西風剪剪弄楸榆蒹葭水陸魚梁迴
蟋蟀聲高山驛孤社甕新成元亮酒并刀細落季鷹鱸
作詩遠寄霜前鴈人在海東天一隅

寄京父

王渥

憶昔相從在寢邱城南城北縱懽遊杏花聯句香隨馬
野水添杯浪拍舟邂逅又成三月別飄零合負一春愁
汝陽淮甸經行徧應有新詩爲我留

祖道趙王應詔詩

張華

崇選穆穆利建明德一作明明於顯穆親時惟我王稟姿自

然玉質金相光宅舊趙鎮作冀方休寵曲錫備物煥章
發軔上京出自天邑百寮饑行縉紳具集軒冕峩峩冠
蓋習習戀德惟懷永歎弗及

四哀詩之一

元好問

冀京父

先公藻鑑識終童會拔崑山玉一峯不見連城沽白壁
蚤聞烈火燎黃琮重圍急變紛紛口九地忠魂耿耿胸
欲弔雲南無覓處士林能不泣相逢

贈利州侯神童

生十四月識字予見時
生二十一月識無算

牙牙點妝杏蕾紅阿兄抱之來學宮今春學語語未正
 已能見書識名姓隨指隨讀無數重多生想會文字中
 極知之無不足訝更恐雜誦難爲功土中松粒龍爪脫
 萬牛邱山起毫末君不見黃金寶鼎翡翠青未要春宮
 許衣鉢人間失卻麻神童明星煌煌出蒼龍只知江陵
 圖籍盡一火誰謂死草生華風遺山老子未老在見汝
 吐焰如長虹

見字
金鼎

會州道中

馬舜卿

山腰薄雪炫朝曦未放陽和入燒痕一片長安世情月

梨花院落幾黃昏

元

陰山

八月陰山雪滿沙清光凝目眩生花插天絕壁噴晴月
擎海層巒吸翠霞松檜叢中疏畎畝藤蘿深處有人家
橫空千里雄西域江左名山不足誇

鹿尾

鑿輿秋獮獵南岡鹿尾分甘賜尙方濃色殷殷紅玉髓
微香馥馥紫瓊漿韭花醋辣同葱薤芥屑差辛類桂薑

何似羶根蘸濃液流匙滑飯大家嘗

扈從冬狩 并序

癸巳扈從冬狩獨予誦書于穹廬中因自譏云

天皇冬狩自行兵白旌一麾長圍成長圍不知幾千里

蟄龍震慄山神驚長圍布置如圓陣方騎雲屯賈魚進

千羣野馬雜山羊赤熊白鹿奔青麇壯士彎弓殞奇獸

更驅虎豹逐貪狼 御開有馴豹縱之以搏野獸 獨有中書倦遊客放

下羶簾讀周易

題灤陽胡氏雪溪卷

虞集

積雪平沙陰山道射虎殘年不知老豈識船如天上坐
翠竹爲帷樹爲葆昔乞鏡湖苦不早白髮如絲照清潦
卅年此地若相逢應著漁蓑脫貂帽

金人出塞圖

海風吹沙如捲濤高爲陀磧深爲壕築壘其上嚴周遭
名王專居氣振豪肉食湏飲田爲遨八月草白風颼颼
馬食草實輕骨毛加弦試弓復置橐今日不樂心恹恹
什什伍伍呼其曹銀黃兔鷓明繡袍鷓鴣小管隨鳴鞞
背孤向虛出北臯海東之鷲王不驕錦鞞金鏃紅絨條

按習久蓄思一超是時晶清天翳絕鴛鴦東來雲帖帖
去地萬仞天一瞥離婁屬望目力竭微如聞音鷺一掣
束身直上不同折遂使孤飛一片雪頃刻平蕪灑毛血
爭誇得雋頓足悅挂兔懸瓊何足說旌旗先歸向城闕
落日悲風起騷屑烟塵滿城鼓微咽大酋要王具甘歆
王亦欣然沃焦熱闕支出迎騎小駝琵琶兩姬紅顴頰
歌舞迭進醉燭滅穹廬斜轉瓊瑜月

飛豹行

王 惲

中統二年冬十有一月大駕北狩

時在魚兒泊

詔平

章塔齊爾公以虎符發兵於燕旣集取道居庸
合圍於湯山之東逐飛豹取獸獲焉時予以事
東走幕府駐馬顧盼亦有一嚼之快因作此歌

子時爲左

司都事

二年幽陵閱邱甲詔遺謀臣連夜發春蒐秋獮是尋常
况復軍容從獵法一聲畫鼓肅霜威千騎平崗捲晴雪
長圍漸合湯山東兩翼閃閃牙旗紅飛鷹走犬漢人事
以豹取獸何其雄馬蹄蹴麋歛左興赤絛撤鏃驚龍騰
錦雲一縱飛塵起三軍耳後秋風生豹雖逸才不自惜

雨血風毛摧大敵風烟慘淡晚歸來思君更上單于臺
血埋萬甲戰方銳爪牙正藉方剛才古人以鹿喻天下
得失中間繫真假元戎茲獵以開先我作車攻補周雅
大笑南朝曹景宗誇獵空驚弦霹靂何曾夢見北方強
竟墮閉車甘偃息揚鞭回首漢家營一點槍纓野烟碧

案湯山在今豐寧縣境內大閣兒西南四十里爲開平之東南故序云以事東走幕府也

沙陀行

郝經

老鼠山陰界牆北隱隱磷磷起沙磧泉腴草美地高寒
王氣瑰雄當斗極幾回秦漢儘消沉隔斷中原沒行跡

坡陀瀾漫重復重舊樂新尖宛如一天傾海倒白浪枯
中有生龍千萬匹雲屯霧郁無畔岸水灑煙浮川谷溢
駮驪窟宅簸蕩寬驟駁康莊戛磨密參差不斷動魚文
汹瘴相銜翻蟻隙噴風掣電脫兔疾色別羣分鮮錦織
春迴凍裂怒蹄齧蹋碎冰天轟霹靂分馳茁壯賈餘俊
突兀權奇縮生力角伏踈促口叉豁目凸銅毬凹溝脊
鯨鬣瀾翻鳳臆橫山字圓平尾梢直飄飄舉是萬里足
往往玉立八九尺雪壓草根脂滿口不解人間有阜樾
腹腴氣猛穩且馴不喜牽籠喜迎敵隘視河山渾一抹

仰首西風聽鳴鏑古來伯樂未曾見天下更無多馬國
國初西北半天紅房駟光芒遠天策振前白馬飛下天
青草年年益蕃息開國一戰何所須木鎗五千跨生駒
百萬山崩排堵牆乘勝逐北過燕都更得金源四十萬
大青小青絕世無回戈卻取西南夷奄有渥洼與余吾
長鬚巨鼻入監牧大宛空羣王作奴崑崙蹴平飲河源
瑤池月窟皆長驅沙陀拓境數萬里驥騄驍騰古無比
金粟堆空漢月沈馬上真人作天子鬢端不在宴賜年
斗尾堆金勢難止西域既定右臂舉卓旗隨風便南指

迅鋒踏破李王城抄騎直入杏花營小關透漏潼關敗
嶢峯扶出汴梁驚黃流見底江漢狹我馬正渴方橫行
中原無人馬有足殘城破屋不足平風聲鶴唳皆落膽
但言有馬不問兵旣平西海復南海馬鳴蕭蕭迴旆旌
歸來罷戰合長圍令如殺敵誰敢違包山絡海數千里
西稍把手隔年期一朝圍合密鐵匝馬耳戢戢爲籬籬
百獸擁起自衝蹙骨牙挂角傷毛皮先開一面放三日
然後共施弧矢威黃羊野馬不足數躡躡龜兕驅熊羆
赤霧不散肉山赭乾坤模糊血淋漓長楊上林莫大誇

舍長露短彼一時向令見此無復獵相如枉用多文辭
以戰爲獵國俗然况乃萬里皆鞭笞馬多地廣兵力勁
將士能將馬爲命終身騎射不離鞍辛苦生獐殆天性
每將饑渴勒狂橫一飽一肥無復病逸逸都無水草態
變化自有真龍性鼓鼙聲動便開張人人據鞍皆王良
直入飲血鬻頭顱查牙生人渴枯腸所向空闕都無敵
遂令四海皆天王駝駝錦背高崔嵬玉帛萬國來梯航
琵琶絃急曳落高醜顏半醉馬乳香玉脂瀲灩玻璃滑
浮動酥顆金粟黃供官大羣肉擁腫揮霍瀕洞如酒漿

馬頭一撲驚孱顏橫截數尺琢玉鞍幃革編珠排碎錦
繁纓小鈴絡金環前朝不數大無價九采奪目誰敢看
五花虎文稱裝束踏地恐破驕且閑大官牽來至尊御
馬前拜舞朝百蠻此時息民立紀綱泰山四維萬世安
地無與大兵無強何用更舉祗自殘天生此馬爲天下
敵盡兵窮亦當罷五十年來不摘鞍安得瘡痍被王化
但願沙陀馬無數會見中原有新戶深宮九重不動塵
永使驩駟脫羈弄

北嶺行

中原南北限兩嶺野狐高出大庾頂舉頭冠日尾插坤
橫亘一脊繚絕境五臺南望如培塿下視九州在深井
上有太古老死冰沙埋土食光炯炯盤磴滑硬草無根
枯石摩天墮生礦南人上來不敢前撲面欲倒風色猛
坡陀白骨與山齊慘澹萬里殺氣冷嶺北乾坤士馬雄
雪滿弓刀霜滿頸稀星如盃斗直上太白如月人有影
寄語漢家守城將莫向沙場浪馳騁

天鷲曲

袁 桷

天鷲頸瘦身重肥夜宿官蕩羣成圍蘆根噠噠水蒲滑

翅足蹙曳難輕飛參差旋地數百尺宛轉培風借雙翮
翻身入雲高帖天下嘔蓬蒿去無跡五坊手擊海東靑
側眼光透瑤臺層解條脫帽窮碧落以掌疾擱東西傾
離披交旋百尋袞蒼鷹助擊隨勢遠初如風輪舞長竿
末若銀毬下平坂逢頭喘息來獻官天顏一笑催傳餐
不如家鷄柵中生死守免使羽林春秋水邊走

楊花曲

上都楊花瘦且堅葉葉不展圓如錢年年飛花作端午
遠客乍見心茫然上都飄雪不知數此花與雪相旋舞

黃鸝聲絕孤雁鳴萬騎千車互來去手攀短條心欲絕
宛轉成毬恨初結寒風飛蓬卷車輪點點相亞隨相滅
南鄰蕩子衣夜單曉望日出如黃綿辛勤掇拾不敢棄
願刮龜毛同作瓊

灤河

近山馬昂髮遠山鳳翥羽百谷奔亂流屈曲長蛇赴維
時雨新過急溜糟牀注居人漚爲井千屨集沙步寒光
澄玉膏甘冽過牛乳茲泉成白溝巨浸合沮洳蓮芡充
餽糧魚蝦足租賦塞翁話疇昔陞彼成險固往事不復

論云云日東去

灤河吟

灤河上游陔涓涓僅如帶偏嶺下橫渡復遶行都外頗
聞會衆流既遠勢滂沛雖違禹貢道獨與東海會乃知
能自致天壤無廣大

北行歌

馬祖常

君不見李陵臺白龍堆自古戰士不敢來黃雲千里雁
影暗北風裂旗馬首回漢家衛霍今何用見說軍還如
裹痛不思百口仰食恩豈念一身推轂送如今天子皇

威遠大磧金山烽燧鮮卻將此地建陪京灤水回環抱
山轉萬井喧聞車戛輪翠華歲歲修時巡親王覲圭荆
玉盡侍臣朝絃纘珠新高昌句麗子入學交趾蠻官貢
鱗角斗米三錢金如土國人謳歌將軍樂將軍樂四海
清吾皇省方豈田獵觀風察俗知太平

灤水秋風詞

柳 貫

朶樓清曉常祠罷吾殿新秋曲宴回御帛功由寒女出
分頒恩自九天來

後灤水秋風詞

界牆窟尾砂如雪灤河背頭風捲空泰和未必全盛日
幾驛雲州避暑宮

旋卷木皮斟醴酪半籠高帽敵風砂丈夫射獵婦當御
水草肥甘行處家

還次桓州

塞雨初乾草未霜穹廬秋色滿沙場割鮮俎上薦黃鼠
獻獲腰間懸白狼別部烏桓知幾族他山稽落是何方
長雲西北天如水想見旌旗瀚海光

過柳河

貢師泰

野曠山寒露易霜短榆疎柳路茫茫雨來黃潦聚成海
風過白沙堆作岡驛館到時逢數騎馳車宿處錯羣羊
客懷正爾無聊賴忽見南飛雁一行

至正十一年秋七月巡按松州虎賁分司時山谷
寒甚公事絕少明日卽還爲賦此

秋風撼撼衣綿薄夜雨蕭蕭燭焰低萬里江南纔夢覺
此身原是客遼西

雲葉繽紛雪弄花小營近午卻排衙分司御史渾無事
又鞚青驄踏白沙

北方巫者降神歌

吳 棻

天深洞房月漆黑巫女擊鼓唱歌發高粱鐵鐙懸半空
塞向堊戶跡不通酒肉滂沱靜几席箏琶朋指妻霜風
暗中鏗然那敢觸寒外祇神喚來速隴坻水草肥馬羣
門巷光輝耀狼豕舉家側耳聽語言出無入有凌崑崙
妖狐聲音共叫嘯健鶻影勢同飛翻甌脫故王大獵處
燕支廢積黃沙樹休屠收像接秦宮于闐請駟開漢路
古今世事一渺茫楚襪越女幾災祥是耶非耶降靈場
麒麟披髮跨大荒

塞上曲

迺賢

秋高砂磧地椒稀
貂帽狐裘晚出圍
射得白狼懸馬上
吹笳夜半月中歸

馬乳新桐玉滿瓶
沙羊黃鼠割來腥
蹋歌盡醉營盤晚
鞭鼓聲中按海靑

桓州

陳孚

躍馬長城外方知
眼界寬晴天雷雨
急暑夜雪霜寒鐵
騎秋呼鷗金盤曉
薦糴柳營弓劍滿
容我一儒冠

詐馬行

周伯琦

國家之制乘輿北幸上京以六月吉日命宿衛大臣及近侍服所賜只孫珠翠金寶衣冠腰帶盛飾名馬清晨自城外各持綵仗列隊馳入禁中于是上盛服御殿臨觀乃大張宴爲樂惟宗王戚里宿衛大臣前列行酒餘各以所職敘坐合飲諸坊奏大樂陳百戲如是者凡三日而罷其佩服日一易大官用羊二千噉馬三匹他費稱是名之曰只孫宴只孫華言一色衣也俗呼曰詐馬筵至元六年歲庚辰忝職翰林扈從至

上京六月廿一日與國子助教罷君叔亨得縱
觀焉因賦詐馬行以紀所見

華鞍鏤玉連錢驄彩暈簇轡珠英重鉤膺障顛鞞鏡叢
星鈴絲校聲瓏瓏高冠豔服皆王公良辰盛會如雲從
明珠絡翠光龍葱文繪縷金紆晴虹犀毘萬寶腰鞞紅
揚鑣迅策無留蹤一躍千里莫游龍溼漑奇種皆避鋒
藹如飛仙集崆峒乘鸞跨鳳來層空是時閭闔含薰風
上京六月如初冬金枝滴露冰華濃水晶殿閣搖瀛蓬
扶桑海色朝曛曛天子方御龍光宮袞衣玉璫同重瞳

臨軒下接天威崇大宴三日酣羣棕萬羊鬻炙萬甕醲
九州水陸千官供曼延角觥呈巧雄紫衣妙舞衣細蜂
鈞天合奏春融融獅獅虎嘯跳豹熊山呼鼉抹萬姓同
曲欄紅藥翻簾欏柳枝飛蕩搖蒼松錦花瑤草烟茸茸
龍岡環拱灤水宗當年定鼎成周隆宗藩磐石指顧中
興王彛典歲一逢發揚在德并宗功康衢擊壤登時雍
豈獨耀武彰聲容願今聖壽齊華嵩四門大啟達四聰
臣歌天保君彤弓更圖王會傳無窮

送閣學士赴上都

李孝光

從宮萬騎擁鑾輿東閣詞臣載寶書
雨過草肥金絡馬
月明山轉紫駝車
龍庭日近瀛洲路
灤水天高玉帝居
明日仙凡便相隔
少年寮吏謾躊躇

灤京雜詠一百首

錄五
十首

楊允孚

東涼亭下水濛濛
敕賜遊船兩兩紅
回紇舞時杯在手
玉奴歸去馬嘶風

南國鄉音漸漸稀
朔風吹雪上征衣
邊鴻飛過桓州去
更向窮陰何處飛

窩名檐子果何如
野草黃雲入畫圖
弧矢縱懸仍覓侶

塞前番語笑人迂

驅車偏嶺客南還始見村姬笑整鬢誰信片雲三十里

寒暄只隔此重山

過人到偏嶺之北面不可洗頭不可梳冷極故也過此始有暖意素非高

嶺寒氣止隔于此良可怪也歎

此良可怪也歎

李陵臺畔野雲低月白風清狼夜啼健卒五千歸未得

至今芳草綠萋萋

此地去上京百里許

歡喜坡邊望禁城鸞翔鳳翥卿雲清舉杯一吸灤陽酒

消盡南來百感情

鐵蕃竿上草如茵澹澹東風六月春高柳豈堪供過客

好花留待蹋青人自軀耳 柔蹋青人即宮人也

聖祖初臨建國城風飛雷動螽蟄龍驚月生滄海千山白

日出扶桑萬國明上京大山舊傳有龍居之

北闕東風昨夜回今朝瑞氣集蓬萊日光未透香鑪起

御道聲聲駝鼓來駝鼓也

撒道黃塵輦路過香焚萬室格天酥兩行排列金錢豹

欽察將軍上馬駝

大安閣下晚風收海月團圓照上頭誰道人間三伏節

水晶宮裏十分秋大安閣上京大內也別有水晶殿

四傑君前拜不名輪番內直淡辰更蓬萊山上羣仙集
得似王孫世祿榮四傑卽四怯薛也或稱也可怯薛者卽大怯薛之稱是之謂不名當三問
夜所以淡辰
一更者也

北極修門不暫開兩行宮柳護蒼苔有時金鎖因何掣

聖駕棕毛殿裏回

棕毛殿在大韓耳朶

結綵爲樓不用肩角聲扶上日初明龍駒河北王來覲
直入金門下馬行

相國門前柳未花不多嫩綠便藏鴉東風吹得濃陰合
散入都城百萬家

千官萬騎到山椒，箇箇金鞍雉尾高。下馬一齊催入宴。

玉闌干外換宮袍。

每年六月三日詐馬筵席所以喻其盛事也。千官以雉尾飾馬入宴。

錦衣行處狻猊習，詐馬筵前虎豹良。特教雲和罷弦管。

君王有意聽堯綱。

詐馬筵開盛陳奇獸宴享既具必一

禮有文飲有節矣。雲和署隸儀鳳司樂掌天下樂工。

儀鳳伶官樂既成，仙風吹送下蓬瀛。花冠簇簇停歌舞。

獨喜簫韶奏太平。

儀鳳司天下樂工隸焉。每宴教坊美女必花冠錦繡以備供奉。

麗日初明瑞氣開，千官錫宴集蓬萊。黃門控馬天街立。

丞相簪花御苑回。

聿來新貢又殊方重譯寧誇自越裳馴象明珠龜九尾

皇王不寶壽無疆

萬歲山有九尾龜

嘉魚貢自黑龍江西域葡萄酒更良南土至奇誇鳳髓

北陲異品是黃羊

黑龍江即哈入都魚也鳳髓茶名黃羊北方所產御膳用

太平天子重文曹閣建奎章選俊髦一日六龍天上去

至今黃帕御牀高

昔文宗建奎章閣于大內年深灑掃睹御榻之歸然感而賦此

內人調膳侍君王玉仗平明出建章宰相乍臨闈闔表

小臣傳旨賜湯羊

御前厨常膳有日小厨房大厨房小厨房則內人入珍之奉是也大厨房

則宣徽所掌湯羊是也白內及外外膳既畢羣臣始入
奏事每湯羊一膳具數十餐餘必賜左右大臣日以

爲常子常職

賜故悉其詩

仙娥隱約上簾鉤
笑倚闌干出殿頭
鸚鵡臨階呼萬歲

白翎深院度清秋

香車七寶固姑袍
旋摘修翎付女曹
別院笙歌承宴早

御園花簇小金桃

凡車中載固姑其上羽毛又尺許拔付女侍手持對坐車中雖后妃駝象

亦然

鳳樓春暖翠重重
內禁門開曉日紅
寶馬香車金錯節

太平公主幸離宮

湯羊內膳日差排
紅帖呼名到玉階
底事金吾呵不住

腰間懸得象牙牌

東城無樹起西風百折河流遶塞通河上驅車應昌府

月明偏照魯王宮

內宴重開馬湏澆嚴程有旨出丹霄羽林衛士桓桓集

太僕龍車款款調

馬湏馬嬾子也每年八月開馬嬾子宴始奏起程太僕寺掌馬者

鸞車八月政高翔玉勒彫鞍萬騎忙天上龍歸纔帶雨

城頭夜午又經霜

每年起其夕即霜異哉

南坡暖翠接雲屏雲散風輕弄午晴寄語行人停去馬

六龍飛上計歸程

南坡乃納寶地也文遊人罕至焉

雍容環珮肅千官空設番僧止雨壇自是半晴天氣好

螺聲吹起宿雲寒

西番種類不一每卽殊禮宴享大會則設止雨壇於殿隅時因所見以發

一晒

正元紫禁肅朝儀御榻中間寶帕提玉母壽詞歌未徹

雪花片片彩雲低

元夕華鐙帶雪看佳人翠袖自禁寒平生不作蠶桑計

只解青驄繡繡鞍

試數窻間九九圖餘寒消盡暖回初梅花點遍無餘白

看到今朝是杏株

冬至後貼梅花一枝于窻間佳人曉妝以胭脂日塗一圈八十一圈既足

變作杏花
卽疑同矣

脫園窈窕意如何羅綺香風漾綠波信是唐宮行樂處

水邊三月麗人多上巳日灤京士女競作繡圈臨水棄之卽修禊之義也

葡萄萬斛壓香醪華屋神仙意氣豪酬節涼糕猶末品

內家先散小絨絳重午節也

百戲遊城又及時西方佛子閣宏規綵雲隱旌旗過

翠閣深深玉笛吹每年六月望日帝師以百戲入內從西華入然後登城設宴謂之遊皇城

也

紫菊花開香滿衣地椒生處乳羊肥羶房納石茶添火

有女褰裳拾糞歸

紫菊花惟灤京有之名公多見題品地椒草牛羊食之其肉香肥納石韃

靴

為愛琵琶調有情月高未放酒杯停新腔翻得涼州曲

彈出天鷲避海青

海青擊天鷲新聲也

海紅不似花紅好杏子何如巴欖良更說高麗生菜美

總輸山後麝菰香

海紅花紅巴欖仁皆果名高麗人以此上菜裹飯食之尖山產麝菰

偶因試馬小盤桓明德門前御道寬樓下綠楊樓上酒

年年萬國會衣冠

明德門午門也

不須白粲備晨炊乳酪羊酥塞北奇泥土炕牀銀甕酒

佳人椎髻語侏離

白日擅房撒萬星名王酣宴惜婷婷李陵臺北連天草
直到開平縣裏青

東風吹暖柳如烟寄語行人緩著鞭燕舞巧防鴉鶻落
馬嘶驚起駱駝眠

時雨初肥芍藥苗脆甘味壓酒腸消揚州簾卷東風裏
曾惜名花第一嬌

霜寒塞月青山瘦草實平坡黃鼠肥欲問前朝開宴處

白頭宮使往還稀

文宗會開宴
于南坡故云

御饌官厨不較餘金門掌膳意勤如更分光祿瓶中酒

爛醉歸時月上初

凡御膳及民間者謂之貢餘光祿寺掌御酒

灤京九月雪花飛香壓萸囊與夢違鴈字不來家萬里

狐裘旋買換征衣

出塞書生瘦馬騎野雲片片故相隨凍生耳鼻雪堪理

冷入肝腸酒強支

凡凍耳鼻卽以雪揉之方同近火則脫

案元中統二年改興松二州屬上都路元興州爲今灤平豐寧二縣地而元之上京卽今多倫諾爾與豐寧縣北境毗連故元人上都詩附採數家於此取備塞垣掌故耳

黑谷東路山

朱德潤

高岡盤崔巍白石落絕壑鳴泉咽古竇巖麓淨如削
想融化初元氣下磅礴山靈託奇範株脈下連絡大峯
齊雲霄羣嶠入雲腳朱闌圍碧瓦隱見仙人宅良境不
可負行將理芒屨

冬至日白雪道中偶成錄呈朱叔茂郎中段惟德
魯子暈二都司仍希于張伯高叅議郭幹卿治
書于兩司幕長及按郭郎中邢孟直諸公處以
區區薄况達之

曹伯啟

槲葉蕭蕭朔吹寒山行病瘦怯衣單馳驅一帶灤江險
彷彿重經蜀道難旅邸僦牀雖自愧繡衣持斧要同看
窮途卻值書雲節秫酒糠燈語夜闌

明

塞上謠

張昱

莽然路失龍沙西
桐酒中人軟似泥
馬上毳衣歌刺刺
往還都是射鵰兒

野蠶作繭絲玉玉
乳鷄浴沙聲谷谷
駱駝孀子多醉人
氊帳雪寒留客宿

出塞曲

尹耕

鷹鵝淬劍鵠調弓獵罷陰山落日紅鐵騎不嘶沙磧草
牙旗飛掣桔槔風

上谷歌

貔貅十萬陣堂堂自古安危繫朔方東下鼓聲連碣石
西來亭障帶河湟分兵久戍勞充國借箸前籌賴子房
聞道暫留諸部落拔營今已遁遐荒

塞上曲

謝榛

旌旗蕩野塞雲開金鼓連天朔雁同落日半山追北騎

卷之三
三
彎弓直過李陵臺

飛將龍沙逐北還
夜驅駝馬入燕關
城頭殘月誰橫笛
吹落梅花雪滿山

塞下

路出古雲州
風沙吹不休
烏鳶下空磧
駝馬渡寒流
地曠邊聲動
天高朔氣浮
霜連窮海夕
月照大荒秋
擊鼓蕃王醉
吹笳漢女愁
龍城可復取
俠士幾封侯

塞北感懷

王 清

西風關外雪初晴
懷古思鄉百感生
玉帳枕戈人萬里

鐵衣傳箭夜三更夢回絕域烏桓戍戰罷空山勅勒營
烽火微茫天路遠月中鴻雁起秋聲

承德府志卷五十三

承德府志卷五十四

藝文七

國朝

恭和

聖製常山峪行宮元韻

汪由敦

碧嶂開

行殿

宸遊廿載前

文孫揚

大烈

法駕閱重邊

駐輦循軒檻分甘憶

几筵

貽謀全盛日休養屢豐年積歲林增密經秋壑更妍

宸章據至孝繩

武頌時肩

恭和

聖製波羅河屯作元韻

行殿清秋曲蓋停嵐光環繞翠爲屏百年藩部蒙
恩澤萬里邊陲慶久寧樂奏廣筵羅毳幕歡騰夾陛拜
珠庭

鴻猷遠紹

神堯烈雨露頻霑塞草馨

恭和

聖製行營元韻

千帳拱星營如弦

御路清黃中閑

法座壁合儼重城列部仍聯署分門各建旌風雲入

睿想箕畢協羣情甫草宣言狩屏藩會遠迎車攻邁周雅
宸藻更天成

秋迴蒼茫野天低平遠山鉤陳肅周衛壁壘警嚴
關風幕千燈聚霜弧半月彎遙雲橫作帶近澗曲
如環班馬凌晨發明馳向夕閒咸欽

聲教訖絕塞達瀛寰

恭和

聖製罷獵出崖口元韻

歸程經谷口獵騎散千羣氣尙從公壯情緣拜

賜欣懷柔

先烈遠繼述

聖心殷一讀豐碑句乾坤煥大文

恭和

聖製波羅行宮作元韻

輦路逶迤候獵歸

離宮閒敞暫相違菊花過節留餘

豔時重陽後二日

松翠凌

空散遠暉弭節偶閒從味道詰戎深意在防微

三才名月示 卷三十一
山莊隔日應重到坐攬朝嵐與夕霏

恭和

聖製汲伊遜水烹茶元韻

秘製三清稱絕品竹爐風雅名高甚佳泉往往天作合相
得益彰

精鑿審

皇都玉泉塞伊遜下澤蘊奇鍾異稟崑山傍玉石抵
鵲行汲尋常付廚廩一從

眞賞達

至尊第一之名斯共稔

行秋哨鹿入木蘭溯源百曲頻咨諭撒圍虎帳試注茲味
別溜澗入無朕松枝石銚活火煎雲腴雋永清不
凜雖云地遠遐荒隔那比玉泉依席社金漿甘醴
何足方半月程供大官飪

恭和

聖製山莊燈詞八首元韻

萬樹天花燦遠空燈筵例比

禁園中

仙莊夏景過元夜大地歡聲內外同

寶幃光搖五色雲踏歌聲裏漏聲聞尋槿宛轉新
翻樣馬伎驍騰舊絕羣

夏宵山近氣微寒萬盞燈疑九陌看絕勝昨秋三
五夜桂輪冰淨露珠團

零露

恩濃賦藜蕭丹霞百尺建神標人間天上渾難辨不夜城

中第一宵

鈞天日聽瑯璈樂良夜還燒錦帶燈拜舞遙稱無

量壽琉璃寶界集神僧

花散千枝驚豔發光流百道絕空緣虹橋幻出通
仙跡寶字排成拱

御筵

巖嵐林影紛成彩絳闕琳宮慶此宵瀛海蓬山能
是否鬱蕭臺上列仙朝

千枝渠盤帳前陳西域休誇百轉輪豈獨明王蒙
遠耀祥光朗照萬方人

恭和

聖製金蓮花元韻

灼爍爭看爛綺霞傳來嘉種自龍沙

御袍拂處風初定玉砌開時日未斜淨植寧慚君子德清

芬故在法王家承恩撒炬休相比不是尋常設色

花

恭和

聖製清舒山館元韻

登臨到處皆堪賞入夏尤于山館宜擎蓋有香蓮

吐萼繁陰似織柳垂絲晝情好鳥無心喚欲雨閒

雲作意遲靜裏天機隨領畧晚來明月入簾窺

恭和

聖製板升元韻

巢居苦風穴苦雨象取大社肇棟宇疆診所畏習
俗殊氊作穹廬恒聚處平沙廣漠格爾多駢馬滿
谷羊滿阿誰教架構作籬落遂闢村莊藝麥天候
吏無呵容轉徙塞山到處營疆理或齊或晉失業
民接踵栖依挈妻子一家中外樂時平舊史堪嘆
詫板升祇今煙火通隣里當日風塵擾甲兵輸幣

歲增虧帑用馬市纔成旋請封拜牲契塔爲寇資
蒙古稱漢人爲契塔蓋契丹之訛遼宋接境故以此爲通稱耳 隱然敵國聲勢重
名藩內屬餘百年不逐水草事力田從獵公徒隨
彈鞬迎

繼除道待行邊懷柔布德

聖化宣板升更賴

天藻傳

恭和

聖製魚石屏歌元韻

少見多怪紛然疑偉哉造物能爾爲由融而結誰
指揮異石片片羅鯤鯢頑礪乃復藏神奇宛見綠
波游泳姿出聽豈緊聞絃徽銜鈎那待投竿絲乍
疑妙繪網箋遺咲花影弄垂柳枝或乃匠巧神工
施刻畫鬢鬣分荆移想當秋水無津涯鱗鱗潑潑
時紛其曝腮跋浪凌空虛叶此樂未許惠子知滄
桑何代倏若斯帶還爲礪匪夷思炎飈曠日漢沫
滋大鈞飛燄陶青泥一氣所到理異宜石凝水態
層層披魚爲石質息不吹麻源螺蚌有先期製屏

不藉丹青緇重以

天章煌煌垂西陽博物驗在茲

恭和

聖製常山峪行宮疊舊作元韻

雲軒青嶂外霞磴結林前

大獮方行令酬勳爲定邊遵途屆

靈囿頓宿撫文筵迴憶初臨日俄經十五年烟嵐猶

滃蔚風日更清妍八景

披吟處新松正及肩

恭和

聖製熱河啟蹕幸木蘭之作元韻

乘時肄武舊章循
白露初過叨鹿牲
峰指玲瓏林
霞褰雲垂糺縵曉
輪囷疇咨封事郵
函速志喜

宸篇點筆頻那待
周陟誇遠服

天威早懾大宛人

恭和

聖製出古北口詠古元韻

北門雄鎖鑰設險有嚴關
一綫通戎索千重矗塞

山雉樓空曲上鳥道翠微間
往昔藩籬重防秋士
馬難時清邊備遠民
晏古風還羽騎駸駸度雲峯
相對閒

恭和

聖製行圍卽事元韻

半嶺霜風颯颯來
萬山高處絕纖埃
欲齊衆志罷
千騎應識天生用
五材白氈乍迎朝
日上黃旗高
捲朔雲開

據鞍批荅軍郵速那待飛書趣

入聲 召枚

馬騰弓勁稱行秋極目穹窿遠勢邁猛虎伏崖林
霧暗驚禽躍澗日光浮細尋伊遼河流曲遙辨長
城古蹟留卽景

拈吟待圍合飛箋曾不費冥搜

屬橐列纛力恢張險越屨巖躡紀堂潮海沈溶迴
地軸風雲翕集揭乾綱繩聯碁布行無跡環合規
圍制有常肄武正勤

籌遠略大風歌就興飛揚

恭和

聖製山村元韻

塞外常苦寒種禾取其早地癯既遲發雨稀復易
稿行行傍山村結穗實堅好彌望但黃茂攬之粒
俱飽婦孺各恬熙鷄豚亦馴擾

宸遊信多樂勝賞滿馳道

恭和

聖製谷中元韻

谷裏人家成小聚火耕歲久地迴涼曲依巖壑指
爲屋平碾坡坳掃作場經歲吏呼曾不到中田婦

饒亦相莊從

遊恍見康衢象民氣知無莠種妨

恭和

聖製瓊廬元韻

白氎剪裁潔文筠插架平自然成廣厚寧用侈彫

薨霜隔簾衣重香凝

黼座清由來陶復製存古見

深情

恭和

聖製曉行二首元韻

蔣溥

疎星幾點逗林標塞意將添白露朝修黛日環深
淺谷偃虹頻接短長橋山田穗重懸珠顆沙岸花
明濕翠翹卻望層霄多霽色

龍旗展處瑞烟飄

蒼霞片片石磷磷欲采秋芳向澗蘋金菡萏光分
疊巘玉琮瑤響瀉迴津烟中翠剎初開曙雨後青
楓不染塵碌碡村村場圃築

睿懷猶軫塞農貧

恭和

聖製九日元韻

獵場此日恰周遭
塞外風雲氣象豪
排檻山光干

疊秀生花

天藻九秋高
萸囊佩處香
盈袖菊盞斟
來色映袍從古獲

熊占得士侍臣紀實喜抽毫

熊次日京師發榜
皇上親射二

恭和

聖製題小金山元韻

中央小朶即飛閣
絕頂蓮花建紫廬
秋水似雲圍

曲檻孤峯如畫映方諸綺明練靜滄江遠樹隱樓
開碧澗虛

睿思不殊浮玉勝勝于浮玉轉清疎

恭和

聖製清舒山館元韻

鶴捧爐香燕拂書清秋山館日長舒結爲塵外烟
霞窟移就村間水竹居林靄乍霏朝旭潤茶聲輕
颺午風徐惜陰檢點魚樂詩地分明

筆力餘

恭和

聖製塞田元韻

阪田競高低迤邐接塞外入夏土脈乾播種尙有
待宵旰勞

聖心甘澤還立沛良苗何油油陂塘互縈帶慮歉轉獲穰
三農慶應最碧溪水潺湲未爲秋稼害明昭

帝所貽穎粟民斯賴塞天霜氣遲自卜收穫倍想見築場
時萬井農情快

恭和

聖製射元韻

節應騶虞樂備官

九重神藝許齊看良遊詎數華林射

至德真同矍相觀穀滿雕弧風力勁棚開豹的月光圍共

知

聖武超前古朱鷺聲傳萬衆歡

恭和

聖製出古北口元韻

錢陳羣

巒嶠左折限燕遼一線天門轟半霄遠勢晴添蒼

隼健輕程秋與紫駝驕千盤迴互山容淨十館更
番士氣調遼史自古北口東北迤
邐七百里內凡列館十扶杖關民低笑
語共傳

日類類

神堯

恭和

聖製蒙古土風雜詠十二首元韻

乳筩

孰論得髓孰論皮似莢何曾一矢遺毛孔直參無

方集卷之三
卷五十四
漏義元霜要悟欲流時最憐初達先知跪只恐生
駒未受羈候火定教通味外醞醕應向此中移

荒田

偶紆

翠蹕雲中騎來看黃沙雨後田試歷塞垣無棄地方知

聖澤本同天縱橫自屬東南外樹藝仍居遊牧前力作不
勞成歲事昇平一飽故依然

鄂博

疊成齒齒復磷磷此是山川正直神便有攝儀行

過客何曾施敬路
旁人由來樸魯無
淫祀終古祈
求有歲申桐乳
災牛存典禮
居然風俗譜
岐隴

革囊

一笈從前抵一奴

行旅
諺語

拚擋家具此焉俱爲筐不

用裁江竹盛飪何妨當飯孟利涉亂流傳古法考
工紉製陋諸儒蕭然囊橐隨行李自笑真成蕩落

軀

柴車

聞說紫芝乘此隱而今遺法寨垣多

元德秀罷官
後嘗乘此柴車

往來陸
渾山中
不巾不幅偏行遠
非櫓非篙亦渡河
載月
咿鴉同小艇
拖泥穩便比輕馳
曾叨扈從

陪車後沙路相逢一簇過

骨占

神占卽可號神羊
火象于焉義取揚灼
豕旣從呈
坼兆仔肩如響定
襪祥繁昌早驗
明年牧近止能
知遠戍郎魚亦問
晴雞問卜乾坤至
奧豈終藏

馬竿

子子綏綏及腹繩
駛駛未許縱驍騰
若非竿勢先

馴致那得鞭絲便奏能罷釣任公時拂水脫旄蘇
相偶踰陵盡驅天馬來

天廡絕技材官庶足稱

兒版

乳花啼笑劇堪憐韋紉雙絲貼兩肩不用歌詞傳
醜面豈因束縛礙吞拳牌頭籍免添丁稅臂上絲
穿長命錢更指熊祥牀寢地壁間弧矢正高懸

灰簡

布白編韋可代言結繩而後此苞元新陳遞嬗人

稱便開闔虛中道可存春蚓秋蛇無定跡剡藤魚
子不分門學書紙費成徒語執簡應同傳笏論

竹筆

如錐蘸墨便能揮老健中書未放歸豈假象犀稱

玉筍敢邀湯沐著紅衣

茗書間製筆有
名大紅袍者

透來紙背

方知是認去毫端只恐非倘得

幾餘親一試行間鸞鳳會同飛

口琴

獨絃琴是口中吹匠氏偏工以冶爲老眼看來真

似鑷春葱撥去恰成絲聲迴合節箏應讓舌轉如
流鶯未知

行殿薰風傳解慍雷門布鼓笑闕氏

轉經

磨兜妙義自無文佛力風行衆所欣清淨輪迴原
自在波羅密諦本難聞萬緣旋轉空王國一手扶
搖大地垠象教由來能護國焚修莫說誦持勤

恭和

聖製灤陽別墅元韻

何年成別墅一徑入雲深
虛室風生座高秋月滿
林山明呈畫卷水急響琴音
歲歲遊觀地天然入

睿吟

恭和

聖製至避暑山莊卽事得句元韻

玉輦初臨放好晴祥雲出岫早來迎
千山翠色宜朝爽四

野歡聲見衆情縱有池亭供

眺覽時於場圃望充盈
敬思四十年前事

祖德難忘本至誠

恭和

御題紀

恩堂元韻

卅載前叨

眷育恩

山莊猶是舊林園
觀光此日思

文祖侍宴當年

識聖孫

康熙壬寅年春
侍宴蒙

上於 圓明園之牡丹臺
聖祖眷顧其年扈侍 山莊

賜居於萬壑松風今於
園顏堂口紀
恩以申感慕
御 翠黛千峯秋

日冷丹松萬壑晚風翻於今亭沼

留題處

念念追維凜

訓言

恭和

聖製塞草元韻

恩深無處不培滋紅滿楓林綠滿陂塞外溪山吟未了還

將小草入

新詩

恭和

聖製千尺雪元韻

曾經江外看飛雪又喜從遊到此間千尺泉聲穿
石罅似聽琴筑響秋山

亭邊對瀑思前夢却比江南景更優

江南寒山
有亭對瀑

智樂天機原在水好從活潑問源頭

鬢鬢白髮叨

恩遇石徑探幽步未嫻恰與香山詩句合忙人到此亦須

閒

恭和

聖製行園二首一韻前章卽景後章卽事元韻

獵騎凌晨繞翠微
秋深景色暢天機
平原草綠莎
爲毯曲磴苔斑石
有衣遠樹經霜林
欲瘦野萃著
雨鹿初肥岡頭立
馬渾如畫一望蒼烟幕四圍
晴靄初生遠黛微
穿林連中妙神機
槍排虎穴風
生岫草沒驢蹄
露滿衣七稜頻分泉府

賜千官屢飮大庖肥
由來武備傳秋獮不忘

先勞式九圍

恭和

聖製兩間房行宮卽景元韻

恰在濃陰古木間數椽清淨接通闌環村曲引溪
中水入戶平看屋裏山只愛桑麻饒野趣還容童
叟近

天顏誰知午夜傳銀箭猶凜

時幾未肯閒

恭和

聖製山莊起程之作元韻

梁詩正

山館兩宵資憩息塞程初軻樹麾旌宜秋薄霧方
侵曉解事西風乍作晴翠挹青螺峯遠近香飄華
黍畝縱橫佇看重譯賢王集望拜前騶效款誠

恭和

聖製瓊廬元韻

度地措持穩隨程舒卷如延青窗半敞生白室中
虛乙夜明然燭重簾護展書莫論寬與窄天地一

瓊廬

恭和

聖製出古北口元韻

沈起元

嚴關非漢月非秦村落雲連古戍堙紫塞漫傳重
險地青山長住太平人礪泉漲後聲猶壯農尸豐
時俗盡淳邊草邊花承

輦道欣將膏露灑清塵

恭和

聖製曉行二首元韻

仗外青峯峙翠標

六龍法駕啟晴朝初暎半映玲瓏壑淺水斜通迤邐橋巖

樹綠低風動
樾野花紅
亞露垂翹
村民遙識停

鸞馭時有天香夾道飄

澗泉迴繞碧磷磷
點綴涼波發渚蘋
隱隱曉鴉聞
遠寺遙遙嘶馬渡
前津如杵塞畝多
嘉穎似沐秋
林絕點塵足慰

皇衷唯稔歲倉箱
寧患小民貧

恭和

聖製入古北口元韻

誰言天險出神工
中外今知雨露同
秋入闕城清

輦路日臨

仙仗絢霜楓萬家殷阜人烟聚百雉巍峩地勢雄多
少邊民深愛戴

鸞迴遮拜繡旗風

恭和

聖製行營元韻

劉綸

帳殿啟連營邊垣入望清魁杓區九野

華蓋接重城掌舍傳施栝行人識抗旌徼荒來按部
琛賫競輸情夜竈烟光散晨裝爽氣迎昇平如可

繪

王會佇圖成

侍從千廬合臨流復面山

龍光依

日馭虎旅衛

天關燈幌明星耀弓衣寶月彎知時壺漏永戒道戟枝環

列肆柴車便長騶灑馬閒共欣隨豹尾勝絕擅人

寰

恭和

聖製永恬居元韻

東巖花發晨西嶺雲歸暮居常與之恬山亦永其
趣

聖性皆天遊停鑣竚清路此中亦邱壑太古心已具於焉

契真詮象外得言寤靈臺及卷阿名義資補注

恭和

聖製於木蘭作元韻

朔野古甌脫置頓若鄉縣四十有八部三年歌載
見不待披黃圖要荒等侯甸因資軍實修用使巖

疆奠

泉甘而草肥樂此羣材園賓服敢自封獻地供蒐

狩伐樹禁射生育物與時茂上名多巴顏富也德產

信云富

巖花候

葱輦向暖爭爛斑秋風未滿旆令序遲初寒簡卒佐游徼

負弩來傳餐

聖孝調六膳揜鮮喜登盤

鍵關設榘木地利匪專美表界蕃落間避馬行且

止天山成

上苑往牒罕倫比遠馭在堂階

前猷隆至理

文武常兼資伊古垂令譽我

皇勤玉趾習勞溯厥初穆納控輿桓指掌羅方隅邊垣饒

稔黍蹴踏防前驅

申旦集徒御洞壑開深幽講武協天行募收正司

秋驩嘒知獲雋不于紛攀留捐鞍看

頒會戢戢多駢頭

郵籤促封匭

問夜關

堯心復此寸陰惜罷獵先

成吟詞臣如望洋微消慚酌斟嗤彼上林賦矢此卷阿音

一舍便移徙萬竈騰炳光柴車行叱叱作市牽牛

羊權迎衆君長誚日咸擎觴上

壽聽山呼

錫祚垂鴻龐

時巡考虞典架阻通四隩陳風更觀物

性天徵所樂晴雲歛天末萬笏插清昊願言勒貞珉紀實

崇典要

恭和

聖製熱河啟蹕幸木蘭之作元韻

灤河繞塞首途循雉介風高聽鹿牲迎勒草香聞
掩藹展圍山勢看盤困大宛選騎調良並穆納

旋轅送喜頻兩歲陪

筵許三接奉琛還待後來人

恭和

聖製塞山元韻

穆納嵐光繪嫩涼餘歎淨滌快褰裳積中野水穿
沙響

莊畔高禾出屋長夜拭玉蟾遲遠榭晴摩霜隼趁平
岡木蘭萬頃如香海崖口懸知葉未黃

恭和

聖製含粹齋元韻

一區架構有餘清納納虛檐出厰平與顥氣俱非
假象得天倪露是含精太元著草亭空峙秋水成

篇檻漫橫會取

名齋真義蘊兼含孔思復周情

恭和

聖製駐行營元韻

一重兩重碧嶂開千騎萬騎

黃城駐星廬匝匝翊

帷宮高下風竿辨蹊路行行設榭更通橋秋原延矚
無邊趣司盟舊部馳傳來屬吏新藩踐更赴根移
苜蓿抽嫩芻種獻蒲桃壓清醕佳名沃壤多巴顏

德產從知饒美富扈圍西旅競懽呼
叉手脫帽難
言論金牙潮海坐自嗤
莆草上蘭空掌故

時政悉率

皇情怡允文允武

家法貽鋪叙不數陳
倉碣典則寧誇勅勒詩

膚功已奏繕軍實
登三咸五夫何疑

和門珥筆請爲紀
時萬時億恢

鴻基

恭和

聖製出崖口元韻

磨崖大字紀

親蒐旋軫渾忘路阻修翠嶂雙排開石骨朱闌一折界雲
頭迴瞻雁砦鴻天晚直指烟村水市秋此際

觀風知倍喜坻京比似去時稠

恭和

聖製萬樹園賜布魯特觀烟火元韻

交光燈月一時盈敷坐擎觴共洽情舞入魚龍隨
隱現篆成蟲鳥更分明騰聲合到無雷國散彩疑

遊不夜城使者來從星宿海底教瞠目舉怔營

恭和

聖製射元韻

簽名

行殿引材官

御射先容列侍看法

祖天弓

神所授序賢臣鵠德爲觀骹飛筵羽穿長埒的暈聯珠破

小團按部蕃王能入殼

賜衣鞠脰奉

宸歡

恭和

聖製繪韻樓元韻

常言畫境奇如真肖羣動於真又疑畫天倪鑒無
孔乃知韻勝時衆妙此兼總樓額

署新銜山靈亦驚寵盡發烟雲局一一

奎章奉

恭和

聖製塞山風景元韻

下帳傳鈔上塞吟
九邊佳勝繪分陰
青莎間後重茵淺
絳葉秋前一幕深
馬埒

長筵因雨罷鹿場
清筆待霜尋天山
卓歇同餘暖負弩
懽增黍谷心

恭和

御製命製鹿椅並題以句元韻

有美丰茸質言裁
曲象能卽供

當宁御猶記列仙
乘武帳威難缺文
茵雅合承

雲莊遵

鶴馭

寶閣度

龍興制擬攷工補時兼月令徵

賦形昭物則異巧底須稱

恭和

聖製登永佑寺舍利塔作歌元韻

興桓古之北口北槃槃捺鉢凌虛無

山莊闕刹鑠雙楔其上乃有穹塔縹緲懸仙都辨方

協紀厥位良史告吉卜臚見足闕堪輿誣青羅

萬樹

園名

翠矗一峯錘影互離卽不數螺尖浮玉鈴語

流南徐中央九級平安旁出八櫺拓

化工司契象外呈形模佛說標身標口此標意

見

御製玉峯

塔詩注

印可五際皈三途我

皇省成隳括臚本末豐碑典重靈元扶溯昔肇營四衛拉

特敏關至

事具御製塔記

疆索泰濛戴極聚米同闡

鄂兩年準部五年回部

勲大集及茲周甲事半功倍運掌如示諸

是塔以十年工竣

載瞻

普寧

寺亦以四部來歸時

勅建

崇閣走重譯氣壓固爾扎

廟

西陲舊日名廟

膜拜鎮彼墟矧復環以降藩比屋爲爻

閭

山莊東北皆達什達瓦部衆所居

看取

行秋絕頂

王會開全圖

恭和

聖製塞瓜元韻

阿克敦

塞瓜別種亦常蔬風雨田間

採錄餘縷縷繩牽縈蔓後離離實好繫門初麤梁炊得餐

能佐甘瓠烹來味儘如七月詩中應補入不愁老
圃食無魚

恭和

聖製卽事元韻

帷宮隨事洽清歡露氣初凝木石寒列嶂依營詩境
遠高原縱轡獵場寬水筒行汲泉環繞樵斧聲聞
路曲盤自是遊情契真宰江南塞北豈殊觀

恭和

聖製山田元韻

嵇璜

凡民務生計詎宜禁所之關外山可田歲久蕪不
治蒙古事畜牧肥瘠俱所遺邊氓窺此利招攜來
窮黎連塍及寸壤人力無不齊幸茲風雨時辛苦
慰一犁磽确變腴土游曠兩有資分疆或興議

帝命下所司務俾中外安民隱若察眉

恭和

聖製雙塔山元韻

率堵波明人畫圖雙尖馬耳故應殊一鞭重指灤
河北絕勝扁舟西子湖

恭和

聖製出古北口元韻

一峯留斡控羣山古塞巒嶠是北關秋嶺風迴雲
氣合邊牆雨漬土花殷來庭遠服通輶傳迎

輦風聲動市闌底事長城誇設險八荒已在戶庭間

恭和

聖製遊獅子園憶舊元韻

獅子園舊傍塞園陪萬丈榮光勝境開庭際樨松今
合抱道旁耆老昔童孩有那最憶

前規遠無逸長遵

家法來望裏青峯羅佛髻頻經宿雨淨炎埃

恭和

聖製布達拉廟瞻禮用去歲韻元韻

觀稼因之臨梵界風旛動處集鴻賓共欣法侶都
迎

佛邨識

宸衷卻爲人初地香隨

仙仗聚諸天花映嶺雲杉神僧遠越流沙至

拈示禪宗

得句頌

恭和

聖製蒙古田元韻

大漠逐水草擇善處斯去地氣本難齊不耕何以
獲內外扎薩克人矣備藩牧羣領與谷量蕃滋是
所務裸蕎雖耐寒霜早亦可慮中外今一家風尙
已非故耕鑿習而安雨暘籌以豫板升得攸居花
當又何懼或專學農圃分地嫻力作或仍習射生

獷野性已除撥茶兼屯穀萬里安且固前代三衛
人擁強恃殷庶茲同編戶者頗識田間趣我

皇舉秋蒐講武歲有素名王扈三驅

至意於是寓綏遠兼畏懷奚待象胥論

前題

邊氓耕獵牧三者不可去蒙古寢忘舊乃惟力播

穫叶昔時靠天收猶不廢獵牧叶

國朝設用之從征在軍務農而不習武是宜善所慮

洪惟

文皇朝大勲紀掌故蒙古實先服勅者使備豫今聞青海

嬉嘗偪黑帳懼

黑帳房番人

耕耜何不為獵牧何不作

厄魯特諸部獵牧豈其除給之暖地耕飽則遐情

固如村板升稠依山種落庶叶馴為邊外風近同

邊內趣

皇心願以籌部落還其素射獵畜牧勤兵即農隙寓爾田

報有秋舊俗重

宣諭

恭和

聖製上駟元韻

聖人盡物性至理通馭馬止須害者捐不患知者寡往年
慶武成西極歸宇下渥注之所產歲貢其常也飛
黃來服皂龍媒亦紛若但得牧養方寧以奔蹊舍
除募則於春庇所則於夏僕緣而拊之順時馬弗
訝

玉轡控自安金埒塵不惹俶儻權奇姿豈至汗盈把
駿尾偶肅肅仍旣閑且

皇心悅以豫薄言斯駟者良由愛護致亦本性馴雅習慣

成自然勞逸不可假格物在類情停鞭

得句寫

恭和

聖製山田元韻

金德瑛

高低皆犖稱有人疆場之斷石關荆棘始覺蕪穢
治當昔生齒寡土或有曠遺五方今雜聚招徠憫
窮黎老幼攜筐餉丁壯用力齊颯然山雨過頰汗
把一犁艱難且勿說猶勝全無資拊循民爭奪疆
界慎職司庶幾礪瘠壤樂業咸開眉

承德府志卷五十四

承德府志

卷五十四

藝文

三

三行三

三

承德府志卷五十五

藝文 八

國朝

恭和

聖製塞上秋蒐奉

皇太后自圓明園啟蹕六韻

德保

玉輦天邊發行看塞上秋

時巡遵

祖訓講武展

皇猷乾惕深

行幄

恩波遍宿郵蘭輿承

色笑郅屋入詢訛官柳迎

清蹕

宸章記舊遊馬前隨指點佳氣擁山頭

恭和

聖製長城元韻

長城設險勢方豪空憶亡羊尙補牢但使雄關分

內外遂教滄海動波濤金墉不解蕭牆患粉堞曾
同束馬勞干古人來城上望笑他堅壘敵弓刀

恭和

聖製灤陽別墅元韻

烟抹崇巒草色青灤河環抱碧泠泠檻依幽壑風
當戶座俯清流月在庭試馬正逢秋隼健開軒偏
愛野芳馨吾

皇茂對添佳興隱約秋聲靜裏聽

恭和

聖製小金山元韻

緬思浮玉山嶒嶸勢破砢下臨萬里江上結千年
果何如此峯秀數椽適延坐藉彼以金名無須錦
繡裹登臨仰

聖蹤結構天成妥卽小作大觀山靈應許可

恭和

聖製桂元韻

丹桂當秋帶露鮮香飄

御製恰開筵月輪枝滿逢嘉慶山館聲和應

睿篇影向高低千樹合花看中外一家連秋來多少延齡
蕊散馥無如此卉賢

恭和

聖製霧元韻

寒山吐霧標神奇氤氳一氣頃刻移千峯萬峯海
濤立溶溶濔濔迷東西沾衣欲濕不成雨妙哉噓
噏伊誰爲幔城曉啟

六飛御白曦掩映分旌旗乍濃忽淡闔復闢老樹莫辨丹
黃枝有時天風截山麓朶朶倏現芙蓉池谷神迎

鬻各獻技似驅雲族空中馳合圍萬馬霜蹄迸狐兔竄伏
麋鹿迷神武天縱整以暇

祖法垂示歌繩其回觀侍從涉相失按轡遣使勞詢咨

睿藻一揮碧宇豁微臣悚息慚賡詩

恭和

聖製行圍獲白鹿詩元韻

車駕動仙靈瑤光散碧星含貞馴在野應瑞獻於庭潔愛

秋雲壑游宜上苑亭出羣標素質養性飽芳苓得
不煩彤矢歸看映玉駟壽仁徵物象何必著丹經

恭和

聖製行圍四詠元韻

撒圍

千二百軍士分旗逐隊行不知山崩劣祗凜令嚴
明左右飛雙翼迴環列五旌恭勤諸部落踴躍沿

皇情

待圍

箕斗天邊下停鞭立水涯自知收縱得無不往來
宜霜迴盤鵬路風高射虎時攻車猶未合吉日早

歌詩

合圍

高低緣谷勢密布網堪稱整似縱橫陣嚴如戒律
僧三驅士同力壹發

聖多能講武

皇猷盛秋蒐舊典仍

罷圍

圍罷烟雲捲情聯中外歡

頒恩到藩服觀獵及彈冠育物仁開網陳牲

孝奉盤喜承

文母宴愛日上風竿

恭和

聖製出古北口元韻

扃鑰天開鎮北遼
奇峯聳翠勢凌霄
地連榆塞關河壯
草偃秋風雉免驕
漢代邊防亭障險
清時士馬角弓調

六龍巡狩乘農隙
繩武於今仰

聖堯

恭和

聖製熱河思舊元韻

乘時講武事

聖德自光前
帳殿張雲外
瑠弓挂日邊

省方遵古制
柔遠賜佳筵

祖訓思今日

宸章麗萬年
山川饒古意
花草放新妍

遊豫勤宵旰
唐虞足比肩

恭和

聖製灤陽別墅元韻

葱鬱沿堤草色青
灤河環抱碧泠泠
纔看暑雨收
林薄忽放閒雲入
戶庭駿馬逸隨秋
隼健野蜂遊
趁晚花馨九松山畔延

宸賞萬派濤聲靜裏聽

恭和

聖製夜亮木四首元韻

繁英落盡剩根條
朽木誰云不可雕
埋沒幾年隨
腐草光華何意近
瓊霄晶熒似共珠
囊啟照灼還

同玉燭調

聖代祇今無棄物微材騰耀到山寮

何勞大匠費剛裁
僵卧沉沉碧水隈
徑尺珎華餘遠照
萬枝燈焰此先開
繼離恍使星辰見
投暗應教魍魅回
豈是神魚脫釣後
昆明銜取夜光來

幾度春秋雨露滋
陽生陰長幻神奇
傳經誤認燃藜日
照字還勝映雪時
牕外影連新月上
案前光射短檠移
非關改火清明節
鑽燧輝生古樹枝

榆關幽壑歛濃陰
奕奕菁華映遠林
自是循環徵

物理由來剝復見天心拈花不用傳真諦野燒無
端過碧潯捧讀

宸章工賦物朽枯何幸入謳吟

恭和

聖製千尺雪元韻

石髓導山腹雲液融崖垠驚聲落千尺直下垂淵
淪緣溪數洞洑涵碧無纖塵誰瀉一串珠婉轉光
照人似鼓七條絃雅韻招遊賓赤城與水簾彷彿
圖畫陳汲泉淪新茗清味尤怡神仰參

智仁性山水常相親

恭和

聖製彈汗行元韻

皇帝御宸翰題作彈汗行臣竊按汗義乃是君長稱稽昔

各部未內屬蝸角鼠穴尙紛爭自我

太祖

太宗啟鴻業恩威徧洽諸邊城四十九旗稽首受封號無
敢仍以汗爲名彈汗行百餘年間烽燧不作海宇
清九夷八蠻內面獻琛賚垂之史乘增光榮伊犁

僂拉促浸各拓新疆上古來版圖無如今代之恢
宏曩者四喀爾喀先効順錫以汗號貽孫曾準部
四汗繼其軌寧謐不復煩天兵哂彼唐宗特好事
賜號書乃將尊號更彈汗行大化洋溢人各輸其
情諸王貝勒翼翼衛神京曰惟我

皇適追

聖祖優卹不須彈壓萬禩歌隆平

恭和

御題煙雨樓二首元韻

貌得鴛鴦湖畔景

省方咸識爲民勤
霏霏雨浥浮檣影
漠漠烟衝浴鷺羣
珠箔捲雲銷暑氣
琤闌倚漢繪星文
憑高閒眺

宸襟愜十里風荷散遠芬

不數仙家十二樓
無邊清賞鎮相投
烟波鏡裏涵空翠
旗蓋花間紀

豫遊時雨

天顏頻有喜

宵衣農事未忘憂
眼前便是嘉禾景
還問嘉禾得似不

恭和

聖製札什倫布廟疊去歲韻元韻

華嚴彈指卽須彌西梵名宗此祝釐試手兜羅原
寂寂廣眉珠火總熙熙金繩貝葉雲霏字紫鉢曇
花露裊枝靜向圓蒲參妙諦

九重端拱正無爲

恭和

聖製行圍四詠元韻

撒圍

介福

獵騎衝霜動深林踏葉行乍看初日起漸覺萬山
明馬度梯雲路人呼出樹旌諸藩忻效命踴躍奉

皇情

待圍

山半

行城列圍來遠澗涯令同嚴陣日典與詰戎宜一線

綿聯處雙旌合抱時

微臣

忻從獵吉日續賡詩

合圍

塞外秋蒐候寧同羽獵稱霜寒明似雪石古瘦于

僧撇捩弦聲發超騰馬力能一圍更一嶺樂意不相仍

罷圍

恩威式蕃服遊豫博

慈歡摯羽歸鷹架天閑卸馬冠腥頰中使騎

賜重大官盤拜

澤歸廬晚燈光認遠竿

恭和

聖製灤陽別墅元韻

秦蕙田

水勢山容一攬收

翠華臨幸正清秋
四圍烟樹紛無數
百道風泉在上頭
奇境得來因地設

藻思溢出似川流
碧波清嶂幽尋處
歲歲榮經

御墨留

恭和

聖製山莊燈詞元韻

王際華

玉塞宵涼碧宇空

離宮景乍度天中
來賓新得焉耆長

錫宴元宵事例同

萬綠叢中散火雲雷轟電激四山聞映波百道金
蛇掣彷彿紅旗競渡羣

纔挹冰漿瑪瑙寒魚龍百戲儘教看忽驚火樹銀
花發映月連星并作團

喜對薰風詠蓼蕭雲霞繞幕赤城標芳園已過黃
梅雨月色燈光又此宵

綠樹雲中

雙鳳輦紅蕖地畔九華燈光明界卽蓮花界照徹三千現

古僧

從來雁磧天西遠
還結鼇山海上緣
湛露三霄霑
毳幕華林萬
帳共芳筵

正是星橋初起處
莫教玉漏易催宵

龍光日日榮
三接絳幘傳呼又早朝

花開頃刻幻俱陳
燈影旋移轉玉輪
忭舞西來諸
部曲從今常作太平人

恭和

聖製山莊燈詞元韻

錢維城

萬樹園開朗太空放燈如在上元中觀光初接狼
臙部應與朝正舊例同

萬點攢星五色雲空中雷轉遠山聞鼓聲未驟紅
初結火鳳銀龍各一羣

不知明月水晶寒并對晴山火齊看夜氣自澄天
宇淨鏡光融徹錦輪團

初聞烟氣若燔蕭旋有霞光似建標嘉會勝情都
不減藕花香裏試燈宵

錦幄還垂五綵線蓮花合作九華燈更看寶樹玲

瓏塢疑有琉璃界裏僧

烏澣亦登同樂苑素娥偏結葢珠緣已過仙艾靈
絲節重預傳柑撒荔筵

到來玉塞招涼地猶是金吾放禁宵麗正門開千
隊入

山莊仍設正衙朝

魚龍曼衍畢分陳歡洽終宵轉玉輪好語西戎全
入觀來同

上國踏歌人

恭和

聖製濬溪元韻

苑溪漲急雨雨過流不奮疏之利用鉤濬爾去其填
新淤既漸通前源乃徐進出山濁復清繞岸曲而
迅舟豈泛堂坳橋寧滓泥印晝夜活活來不猛亦
不恪

聖人利濟仁視此亦川濬

恭和

聖製清舒山館元韻

陳惠華

是地炎歊從不到此中邱壑總相宜棲林鶴起驚
松籟山岫雲來帶雨絲臨水能教塵垢淨看山不
覺夕陽遲靜便何處煩囂著只許蟾光入夜窺

恭和

聖製出古北口元韻

夢麟

馬足輕塵馬首山翠微
雉裏達嚴關雁沙風掃連
雲白綺樹林高帶雨
殷烟靜丹梯閤畫角天開碧
嶂見通闕

聖朝不用丸泥塞萬里
伊犁指顧間

恭和

聖製入崖口元韻

觀保

甌脫天開屹兩崖到來眼底得清佳
疊屏山訝馳
峯似度嶺人看蟻垤皆嵐氣每於雲氣合松聲時
與水聲諧

習勞不為游觀樂好景偏如竚

睿懷

恭和

聖製塞山元韻

塞外山多氣早涼如花紅葉已裳裳雲開諸嶺駢
峯出雨洗寥空鳥道長榆柳數家依曲澗牛羊千
隊散平岡秋光到處邀

宸豫况是陂陀稼已黃

恭和

聖製灤陽別墅元韻

別館

詒模遠雲屏入望深泉甘魚在藻山靜鳥依林自有烟霞

色何須絲竹音

幾餘欣寓目景物助

清吟

恭和

聖製澹軒元韻

塞山秋雨過澄潭一甌積正如醴無源隨處湧靈
液縈洞澹不流方圓漾瑤壁層軒俯青光瑟瑟動
瑤席遙企川上心

皇情有餘適

恭和

聖製兩間房行宮卽景元韻

熙熙景繪往來間真有衢尊酌市闔路折平沙逢

古戍

是日過古城川

烟消一角露秋山

對時慶協農夫願較藝懽騰猛士顏仰見分陰珍尺璧還

將

睿藻答

幾間

御製有著句聊消片刻間句

恭和

聖製至喀喇河屯卽事元韻

原田嶽岫岫頌旣平翰屏肅肅馬 踴迎緩期

特沛如春澤閱歲偏殷就

日誠高樹欲遮雲去跡遙村忽遞雨來聲

時驟雨
卽止

拍隄漲

水流方急又聽山蟬噪晚晴

恭和

聖製常山峪行宮疊舊作元韻

董邦達

睿畧馳方遠

宸遊跡憶前

行宮重駐驛諸將近收邊秋色迎

鸞輅山光拱

御筵憑軒增勝槩觀稼樂豐年

舊墨龍蛇勁

新題藻采妍計程山館邇蕃部集駢肩

恭和

聖製山村元韻

八月納禾稼塞外西成早山田黃盡勻熟異科上
稿糜芑種自嘉結粒堅且好遠邊成樂土入口終
年飽婦子皆優游雞犬不相擾得此功誰歸蕩平

頌

王道

恭和

聖製出崖口元韻

寶鞞彫弧罷講蒐

六龍迴蹕引途修
千行灌水縈旗首
一路仙雲簇馬頭
攬轡共知循舊徑
看山又是近深秋
鷓鴣行扈從重經
過同望林巒萬疊稠

恭和

聖製放鶴亭對作歌元韻

清標玉立何亭亭芝田飲啄恒關情自入

蓬萊叨豢養舊時六翮生茸翎愛向

天家傍瑤檻九臯鳴出生成感食粟將雛意已便翔雲警

露心何慊懷

仁戀

德鶴有斯補經應繼浮邱寫

恭和

聖製出古北口詠古元韻

紀昀

翠輦臨邊塞檀州有故關南來通一綫北顧見羣山連弩
思前代偏槍近此間飛猱行尙怯高鳥度應艱蘇
轍題詩出王曾奉使還何如今一統秋曉戍樓閒

恭和

聖製熱河啟蹕之作元韻

武列河頭雁過時勾陳羽衛啟通達紅飄霜葉楓
千樹綠繞寒澌水一涯蹠躩花驄隨

日馭玲瓏芝蓋散雲綈如聞蕃落諸渠長會獵梁鄒到恐
遲

卷五十一
恭和

聖製行圍卽事元韻

長林豐草射生來石逕清無半點埃
冀馬於今皆逸足燕犀自古是良材
行分鷺鶴雙旌動氣逐風雲萬里開

聖主臨邊軍令肅無譁不用更銜枚

獵獵風聲大漠秋高原塞馬力初遒
旌旗影帶寒雲捲組練光含曉日浮
霜隼盤空爭搏擊天狼避箭敢遲留
中黃奮欲摧彫虎荷戟深嚴更一搜

雲罕天弧歲歲張儒生何用戒垂堂諸蕃震疊星
從斗七萃森嚴網在綱蹴踏崑崙猶奮迅鞭笞頡
利只尋常銘勲尙薄岐陽鼓遮莫區區侈馬揚

恭和

聖製至避暑山莊卽事元韻

裘日修

山莊到處秋如畫勝日來時境是仙壯士扈行

親校射名王入覲歲開筵

謀深帷幄皆長算吟到禽魚有夙緣此地只如房闈丙年

年

清蹕與周旋

恭和

聖製熱河啟蹕之作元韻

小駐還當啟

蹕時曛曛初日照通遼人言白草黃沙地身到青山綠水
涯八月田功觀晚穫三秋花事賞芳蕤塞垣未覺
西風冷閏歲應知節稍遲

恭和

聖製雨獵元韻

長林豐草何遶哉平時獵騎不敢來奔狐擾鹿叢
虎跡館熊窟兔驕雉媒

大獮乘秋行至止鷺鵠魚麗安足擬左縈右拂射壘雙手
驚角駭圍中起挽水天河真兆喜兩腳垂垂近堪
指弦鳴爾覺點聲麤弓勁不愁膠力弛須知師律
寓行圍號令如山今見此

恭和

聖製行圍卽事元韻

仗外圍嚴斷往來萬蹄蹴踏不生埃黃衫煜煜文

昌將翠羽翹翹武庫材耳後鴟鳴飛箭過懷中月
滿引弓開詞臣屬目

旌門下款段追隨揖馬枚

樹樹金風葉葉秋饑鷹直下力初遭雲排兩翼呼
聲合日麗中權

御氣浮馳道

龍旗遙掩冉看城

鸞輅少遲留賡吟每捧

瑤牋出獨愧枯腸韻苦搜

絡海包山大翁張

神機猶是運朝堂華夷共戴環

辰極文武兼資揭

帝網眼底風雲生咫尺草間狐兔只尋常卽看一矢天狼

殪凱奏西來喜氣揚

恭和

聖製至避暑山莊卽事元韻

錢大昕

到處林亭宜入畫望來巖壑宛疑仙澄泓水展空
明鏡峭蒨山當翰墨筵滿眼禽魚皆至樂會心草

本有真緣昇平中外承

嘉讌好待秋深

羽葆旋

恭和

聖製行圍卽事元韻

森嚴羽仗自

天來兩霽重嵐掃碧埃控鶴三千神策士飛龍十二上襄
材令懸旌旆和門合陣布風雲大幕開講武六軍
皆整肅不煩司馬戒銜枚

野闊天高九日秋伊松河上塞風遒

玉鞭乍到輕烟拂

紫幄初開瑞靄浮雲入望中皆澹蕩山當佳處暫停
留廣成欲進詞臣頌詰屈空慙短韻搜

彌山絡野勢分張變化神機自

廟堂蕃部傾心瞻

法仗降王泥首懾

天綱握奇齊列龍蛇陣懷

德遙迎日月常頻見玉門西奏捷櫓槍掃盡

國威揚

恭和

聖製雨獵元韻

劉統勳

獵以肄武傳有哉中權直冒秋霖來揚威制勝在
弧矢非弩非網非圍媒軍聲已動不遽止轟雷激
電難比擬膠霑濕中轉奇白羽落處蒼鹿起沾
濡無愁得雉喜氣挾風霆運臂指乃知

聖意戒遲回弛者難張張易弛勗哉勇決重戎行蠡測管
窺見如此

恭和

聖製行圍卽事元韻

紫氣黃雲匝地來
寒山影裏動纖埃
平添西極追風足
饒有東丹射鹿材
賦就長楊難自炫
營連細柳不輕開
蕭蕭靜聽鳴鞭響
我士無譁底用枚

榮回玉勒

詠新秋馬上

篇章韻更道黃葉
試茶新火活蒼鷹
趁兔片雲浮凸凹
巖壑如常履窈窕
林泉爲少留
何物擇人行
舐掌伏

飛矛利

勅重搜

蕃部旌旄左右張
躬桓先已會明堂
行行隊似星
分野井井條如網
左網箭殪天狼
隨指嗾芝銜銀
鹿見尋常便從羽
獵圖

王會吉日車攻漫頌揚

恭和

聖製行營元韻

興桓之北松漠南
肅肅勾陳羽衛駐
疊嶂遙連紫

塞垠行塵卻指紅雲路崔嵬

帳殿臨高原丹林翠壑天然趣大海蕩蕩水所歸諸
蕃來似百川赴馬牛恒以山谷量酏乳時論斛石
酤燒當無弋肩摩從駭愕中華強且富昆彌動色
相顧盼贊普傳言互告諭此間氣象真堂堂絕漠
威行良有故軍容嚴整神融怡疆域式廓

帝命貽欲將

王會入圖畫豈但石鼓陳歌詩蓋地之圖驂白鹿聞
風而至其奚疑

聲靈震疊邁邃古大哉玉檢明堂基

恭和

聖製九日元韻

黃花開放趁秋陽

黼幄平臨射雉場侍從欲陳幽蜡美蕃渠新設糗梁
香紫萸盞泛爭承露白雁聲多欲落霜更喜寒山
都似畫登高一望翠低昂

恭和

聖製出崖口元韻

講武連旬舉大蒐

六飛親涉道途修已陳虎旅行松漠競擁

龍旗渡索頭

伊遜河卽水經注之索頭水

此地諸藩爭送

輦古來長塹笑防秋躬桓濟濟陪

嘉宴取次金罇湛露稠

恭和

聖製萬樹園賜布魯特觀烟火元韻

列溪秋水夜盈盈月色燈光倍有情萬里旃裘聯
隊入千枝火樹照人明直將玉燭通銀漢坐覓琉

璃湧化城料得傳言徧西域聞風爭拜護羌營

恭和

聖製瀑源元韻

靈源通地脈懸瀑穿天孔曲徑落崕岈危磴圍穹
崑雨晴沫濺裾秋入雲飛隴披榛若拳犖列蔓如
開籠魚遊力上溯鳥過影倒覆崖張一派垂映盪
千條攏空手照晶晶顛氣浮滄滄資深詎待濬奔
嶮知難擁此中湏洞含其下波濤洶皓魄滿欲流
素奩寒不動象爲石甕注用作嶽蓮聳根極四溟

會鑿謝五丁勇萬古玉膏流半夜神光湧

恭和

聖製山行元韻

勤民紀事動成詩尋鹿山行寓

靜思偶以入林成野趣轉因

摘句得新知幽深巖壑藏無盡格準風騷出愈奇
罨畫雲

巒迴夕照清機環引

聖情怡

恭和

聖製肩輿入西峪卽景成什元韻

山外愛哈呀山中喜平行西峪具靈秀佳處隨意

轉恭繹

卽景詩語如圖畫展泉坳可灌溉石筍宜致輦入望情已

遙旣過興猶繾雜花與時鳥點綴悉完善目謀詎

無暇

神瑩景自辨倪黃富邱壑雋味嗜一嚮到此應憮然拘墟

知不免

恭和

聖製入崖口元韻

崖外穀登場崖中雉網張霜留千樹白日轉萬峯
黃驅任前禽去蹄寧得免忘明朝傳

大獵宛馬試騰驤

恭和

聖製峽琴軒元韻

于敏中

軒前動操衆山皆攫醜無心韻自諧悟徹匣中兼
指上聽從挂壁復橫階傳聲谷遞清和奏入律風
調

解阜懷

相賞更餘真意在天然松石軫徽排

恭和

聖製滄浪嶼元韻

芳嶼臨清流秀色在階砌動影沖融間倒浸翠微
翠迴風澹漪瀾觸景紛妙詣歌從孺子聆亭仿詩
人置

淵懷湛然澄一理函萬事

恭和

聖製登四面雲山亭子作歌元韻

四山環合雲深處
繚白縈青泊然遇
笠亭螺徑凌
嶢嶢

吟朗烟霄若神助
層雲盪胸西復東
卑之列岫羅牕中
逸情遠出陶謝上
活色恍與倪黃逢

閭風蔣蔣俯塵世
聚米周知八鴻事
居高視遠覩縹緲
呈臚列川原可數計
秋山明燼秋日懸黃雲
鋪隴覘豐年腰鎌行刈
霜信前擔歸困鹿人頰
肩

恭和

聖製瀑源元韻

懸洪瀉會青噴薄泯罅孔萌柢塊無垠天瓢剡穹
崑權輿導江沱濫觴溯岷隴織路奧復峭潛窟翳
若籠近覘疏窅寥霅然始發罅沓訝湯釜沸漉詫
竹筍攏綫溜巖脚穿匹練雲根滃游漑旣以泄黜
儵不得壅驥渴歛鸞駮雷輶殷甸洶突竄盪相摩
緘紐靜卽動慧惟灞漑欲激或嶒崿聳氣母所胚
凝拗勢如養勇

天倪闕鴻濛言泉萬派湧

恭和

聖製出古北口得詩四首元韻

巖關洞闕

綵旂過塞上風雲儼護呵形勝此間南北合全收
雨戒入山河

舊部新蕃侍獵同周法漫詡上林中梁駟何有長
城限今日伊西是外墉

維魚豐兆信猗歟處處茨梁蔽舍廬關外懽聲比
巖內什三兔賦

詔隨輿

秋半恰宜巖鹿哨霜前
初見塞鴻征丹楓綠柳參
差間一幅營邱畫裏行

恭和

聖製山行元韻

塞苑山呈畫裏詩意行
隨處發

清思風雲引勝延
緣入泉石逢佳閱
歷知尋鹿蹊迴餘曠

奧

探驪句得總神奇

知仁翕闢真機益動適天倪卽靜怡

恭和

聖製萬樹園賜宴卽席得句元韻

天香馥郁玉津長苑樹陰清

御幄張上

壽奉觴旋右陛示

慈錫爵引中央屏藩職貢虔無懈瀛海兵銷樂且康兩序

班行聞好語西濛秋稼滿倉箱

恭和

聖製肩輿入西峪卽景成什元韻

苑西多阻山入峪喜曠行風來谷含峭雲斷徑忽轉
巖扉窅窅闕峰燈凹凸展山堂峙秀起登級可容
輦新境臻益佳迴蹊陟餘繼因高乃見下道德絜
矩善譬之登岱崧培塿一覽辨瑣若列餽釘鬱若
陳膾鸞圖經標洞天穿鑿嗤未免

恭和

聖製登四面雲山亭子作歌元韻

山亭竄立霄漢上諸峯羅列山腰齊夏雲四面幻

雲海蓮花擎出蓮葉低西霞東照南積雪餘縈繚
者皆能稽

俯覽遂造閩風頂時有靄靄緣來蹊涼生嘘吹通顛氣冷
然恍見飈輪躋干巖萬壑在指顧晴晦瞥爾殊零
霰每來

吟眺敞蕭宇鐫刻翠墨光厓谿山靈呵護復解事更囑爽
籟邀

新題

恭和

聖製移松元韻

松性本勁達移植當夏長卽離叢薄翳乃識泰宇
蕩左詩慰蔭鬱瓌筆釋枯強自天栽者培得地全
所養幸因潤溽暑矧復託豐壤疎碧倚石森新柯
眇庭敞之而勢與遂埴塹滋益廣詎惟十年計行
作百尺想

恭和

聖製濬溪元韻

山溪挾沙易濁淤濁者宜滌淤宜疏今來

苑沼值清夏因勢利導

籌良圖斗泥畚益培塿長丈葑掩讓淺萍鋪襪襪照影時
下鷺灑瀉數計多遊魚樂成事半功乃倍既復舊
跡恢新模決渠歌欲徵鄭白祝田笑豈鄰淳于嘗
聞卽小可喻大神禹剔囊之智猶是乎

恭和

聖製味甘書屋元韻

煎茶味其甘寓意事甌銚酌茲石泉腴藐彼崖蜜
誚臨流可用汲詎襲餅綆貌

書屋清且佳隨宜適真好竹鑪貯山房異名乃同調

恭和

聖製喀喇河屯行宮作元韻

望裏

雲莊嶺路東川原迺邇景尤同鱗居歲阜村烟密獵
騎秋肥塞草豐遠水拖藍縈

畫墅小山浮玉冠花宮

清吟漸覺輪輝滿仙籙三元月近中

恭和

聖製至避暑山莊作元韻

雲山四面蔚林光

天闢神臯

聖闕莊貉表

行蒐驥逸驟雁臣入

覲旅中黃

駐將輝罕循東道規得都綱

控北荒井里殷闡豐已屢

卽功猶爲

厖田康

恭和

聖製登舍利塔元韻

奇觀創龍塞傑構超雁臺戶豁星斗入標跨風雲
 開斷手十年索躡足九級鬼法華寶全湧祇樹香
 交迴塔傍卽萬樹園遠駐西竺輪俯殷南山雷瀕洞通顯
 氣玲瓏淨氛埃鷺翼此翥騫象步時徂徊諸天妙
 鬘護極頂瞻如來

恭和

聖製灤陽別墅元韻

仙墅灤河北登臨歲月深
新涼生礪戶遠景帶巖
林水淨魚知樂秋高鹿有音
夜來還聽雨簷瀑助

清吟

恭和

聖製至避暑山莊卽事得句元韻

嶺路雲開敞曉晴

仙莊如畫馬頭迎涼颺最愜

延薰意秋稼尤紓

省歛情香界裝因安遠設

安遠廟仿因爾扎廟之式爲之
諸蕃素重黃教來觀者

尤增
拈喜

星廬環似會朝盈

麗正門內增設各部院
直廬一如正朝之制

更

欣市值平於昔樂在綏豐信益誠

恭和

聖製塞垣元韻

繚垣迤邐亘崇阿佳景環生塞苑多雲削芙蓉排

萬嶂波澄綺練貫雙河人家烟樹春城似

仙界林巒福地過檢點山經兼水志操觚其奈尠聞

何

時奉
河志

臣亦恭與校勘
編韉熱河

恭和

聖製網魚元韻

澄湖魚計滋出網豐且美大哉

好生仁多取非所喜銀絲足縷膾素箸矜失水縱之任泳

潛洋洋化機裏伊誰觀朶頤而欲動食指敬惟曩

南巡陳漁罷淍彼

祇候屢

南巡駐西湖地方大吏陳漁舟

勅罷之以遂方春生育

之令順時全鯤鮪亭育準乎此與物留有餘是亦愛

之理

恭和

聖製待鹿元韻

千峯紫碧夕爽來鹿羣濯濯秋山隈馴依嘯侶自
麇至譬彼遠服懷綏袞或飲於池或蹲地或食苹
蒿蔭林翠咸若及物全天倪

茂對以時豈生意待之不迫詎鋌走躑躅芳坡任先後如
大舜居適與遊聞

文王囿樂其有

山莊木蘭判若何子

示獮茲育和哨期猶可兩旬計西風涼未翮鴛鴦

恭和

聖製行圍二首一韻前章卽景後章卽事

木蘭今歲峭涼微峯景青紅錦一機信雁叫雲初
作字候蛩飲露未催衣人過短袂迴溪窄馬趁平
蕪帶雨肥布漲家家猶露坐無須楫楸地鑪圍
周陞初合曙熹微按隊分旌待

指機總爲

先勞操轡組共欽

神武御弓衣

參連中鹿坡前磴

三賜名騶塞上肥孱弱未嫻陪羽獵割鮮何幸屢

頌
圍

恭和

聖製兩間房行宮卽景元韻

塞隄迴望翠微間

行籓連村帶隧闔兩桁涼移橐駝樹一房雲渲大癡山堆

盤珍品叨

頌獲列坐榮階荷

賜顏早捧研朱

詩帖下

聖人真惜寸陰閒

恭和

聖製出古北口元韻

嚴關洞敞

蹕郵遵塞外猶然甸服民笑彼長城紛繕築孰爲魏趙孰

爲秦

節臨處暑露微涼禾黍鋪茶近拂裳萬騎騰驤環

擁衛共瞻良吉

御飛黃

良吉黃上所御名馬也

雲開留鞞度遙蹊藩部迎

鑾鞠騰齊比似雁臣孚

德信何人不奉大車輓

恭和

聖製駐喀喇河屯元韻

當時元魏建方城舊跡淆訛辨始明

舊時以喀喇河屯等為白

檀諸縣地今遵

旨較輯熱河志乃知長城以外實漢晉郡縣所不及惟北魏始于建安州治

方城縣益信
此說之誤

萬姓板升成土著百年沃壤變刀耕

灤河東繞

宮牆碧葦峪西來

輦路晴向晚灑塵微雨過鳴鳩不用載前旌

恭和

聖製夜遊山月作歌元韻

太古塞上太古月碧落秋光靜相寄霞標轟化須
彌巔一鏡飛凌大輪四

乘驄迎月綠丹梯超出尋常泛湖例貧哉溪數登虬

龍何有東坡矜赤壁玉清七寶光映鞍

俯視壺嶠朗厓際蟾蜍爬沙亦吐輝桂華窅窞本無翳
雲螭直躡最上層

返轡環洲指如意還語纖阿策虺騎碾向天心景全萃

恭和

聖製秀起堂元韻

仙莊宜畫復宜居西峪

登臨盡攬諸四面屏圍皆罨翠中天堂冠欲凌虛雲蒸樹
角看成采秋澹峯眉許列疏應有山靈喜相語

未游先得慰僊予

每年
堂今年初

駐蹕數日後方至秀起
莊山莊卽至其處

恭和

聖製永安莽喀元韻

場選榆林迤右邊

大營
古語謂有榆樹處也圍場在
駐海拉蘇台蒙

大營
西南白沙紅樹景天然

寶駟到處頻呼雋

射連中四鹿衆皆歡呼
上乘寶吉駟馳

華褶

頒來儼序賢

是日蒙古王公有于
賜黃褶二人花翎四人以旌其能

御前射鹿者蒙

圍準十三初發軔

今歲自永安莽喀至塔
里雅圖凡十三圍場

騎掄干

二各彎弦擇肥馳進

慈寧僖

御前侍衛馳進

上以親射鹿

皇太后

遣

纘武承

歡例萬年

恭和

聖製灤陽別墅放歌元韻

竇光鼐

興桓千山灤水出

離宮經構半水陽就中架巖開別墅旋環俯視舟可

方南有留幹古塞之嵒嶙北有

山莊列岫之環張在昔

仁祖日肆覲羅名王四十八部享

大邦車牛煇蠶解膏薌我

阜歲狩躋斯堂維時

聲教訖伊犁哈薩布露同部二萬餘里如要荒啟

仙館兮重扇眄崇阿兮千常翠雲迴榭生虛涼小金

山宛浮澄江林丹潤碧相炫燿夕嵐晚照含餘蒼

天風瑟瑟石瀨湯湯

浩歌叢雲晞景扶桑

微臣

授簡局強韻徒慚墨守同公羊

恭和

聖製口外元韻

古北雄關外千山應接多峯迴常礙目路轉每循
河

省歲籌暘雨連雲多麥禾好風資長養輕拂

翠旗過

恭和

聖製塞湖載月之作元韻

塞山歛夕霏

涼館延浩景明湖碧無烟漱灑餘百頃具舟倚南磯

目遊心已領維時月幾望皓然上岑嶺

蘭槩邀素輝沿泛足嘉境汗漫琉璃界浮動山河影

棹移輪猶遲纜結練逾靜

睿思寄廣寒雲漢相與永觀海欲溯瀾汲深愧短綆

承德府志卷五十五